



毘陵集卷八

外制

葉適寶謨閣待制知建康府兼沿江制置使制

朕緬懷函夏式重陪京維昔秣陵有孫仲謀劉玄德之論在于今  
江左與漢河內唐東都之地均惟時保釐必在俊傑具官葉某天  
才英邁神慮安閒學廣問多務緝先民之緒任重道遠不蘄近俗  
之名嘉挹注之不盈趣延登而入侍而志計懇到裨益弘多嗟議  
論之折衷實獻納之攸賴朕惟藜藿之不采莫強樽俎之折衝方  
圖制勝之自中重惜爾身之在外然念石頭之形勢實爲江左之  
重輕爰升次對之班允副居畱之望噫覽神州之風景勿謂無人  
撫地險之山川亦足用武其往敷于聲教以思啓于封疆

劉光世除太尉淮南制置使制

履至尊而制六合莫先禦侮之圖賞有功而勸百僚敢後酬庸之  
典顧予寡昧撫時艱虞眷右武之辰思復隆平之業矧本兵之寄

尤資英傑之才咸造于庭明聽朕計具官某識慮精敏性資沈雄  
久宣衛社之忠茂著干城之略稟山西之勁氣事不辭難運堂上  
之奇兵算無遺策蚤頒將鉞祗扈殿巖外總制于元戎內視儀于  
公保威名播于夷夏嘉績藹于旂常爰念敵騎北侵鑿與南渡眾  
披靡而引避獨慷慨而請行捍蔽江流屹若長城之固折衝淮甸  
隱然敵國之威繫控扼之殊勞曾褒崇之未稱是用酌詔功之上  
賞進掌武之崇資位益久虛器非輕授若古命數有加印綬之榮  
視今官儀實亞台衡之後增衍爰田之賦併加眞食之封下僉穆  
于師言外增華于帥闕於戲有常德而立武事朕方依爾猷爲無  
寵利以居成功卿何勞于戒訓尚恢遠略嗣有寵章

葉夢得除尚書左丞制

朕惟天下之事總于文昌綱維政幾實賴丞轄日者敵騎北乘匹  
馬南渡政事衝決圖籍散亡朕欲經理庶務舍其舊而新是圖非  
得耆明博通之士而謀之鮮克有濟具官某精微之學兼明乎古

今強敏之才不擇乎劇易兩直鑿禁蔚爲詞宗再領版曹實藉心  
計論思獻納宏益居多朕方深共政之圖宜正頻虛之位攄發底  
蘊革弊扶衰以助朕有爲是所望于爾也其體眷懷無廢朕命  
盧益除尚書左丞制

朕以眇眇之身奉丕丕之緒雖臨御聽斷仰法祖宗而謀謨贊襄  
實賴丞弼眷求舊德協圖康功具官某德度粹夷英姿亮達經濟  
之才足以決巨細之務淹該之學足以通古今之宜中外踐揚望  
實休顯昨登右府參幹樞衡嘗共濟于艱難未少攄于素蘊遽辭  
機政殊拂師言念強敵之憑陵想舊人之風采載惟二轄實總萬  
幾有嘉難進之風申畀頻虛之位尚期展略以副虛懷

張澂除尚書右丞制

朕聞古人有云未至而言固常爲虛及其已至又無所及此人所  
以難言言所以難聽而上下蔽塞禍亂相尋人主往往悔悟而不  
能救朕遭時多艱匹馬南渡登用賢俊庶幾改圖具官某學造古

人之全才周當世之用赤心事上有孜孜奉國之公正色立朝有蹇蹇匪躬之節曩由詞掖擢長憲臺進藥石之良規發著龜之先見南渡之事卿嘗豫言庸臣蔽蒙以及于難中夜悼念流涕何追今方易柱改弦鼎新百度揆之清議蔽于朕心進轄文昌參決大政朕蓋有媿于初而圖功于後也益罄遠猷以濟大業朕意所屬爾其欽哉

薛昂除尚書左丞制

立后王君公之職惟以乂民須股肱心膂之臣共爲同體不有君子孰成厥功眷我舊人乃心王室俾復預政罔有間言具官某爲老成人以儒術用柔亦不茹秉大雅之明和而不流蹈中庸之德乃者釋位丞轄宣勞輔藩思聞嘉猷復畀舊物用舉陶不仁者遠國其庶幾聞樂正好善則優人有所恃爾其謹守國是克協典常使六官羣卿並序厥位四方庶俗永底于成爾亦休哉

季陵除中書舍人制

朕惟艱難之時雖從事軍旅以圖恢復然亦必有威責之令文告之詞風動四方使之退聽言之不文行之不遠具官某學博而貫于古才敏而宜于今文詞之工士論推美郎曹宰屬洵更劇煩奉常螭坳載歷華近茲疇人望俾代予言庶幾播告之修不匿厥指拊循疲民而父老惜須臾之死鼓舞流俗而武夫懷感激之心則于當今乃爲稱職

范宗尹除中書舍人制

朕觀三代而上訓誥誓命載爲六經後世老師宿儒白首不能究至唐奉天詔書雖一時武夫悍卒至于揮涕感激何三代之言難明而奉天之詔易喻也蓋三代之言醇質簡古貽萬世之訓奉天之詔哀痛深切濟一時之危精粗淺深固不相準其有補于世亦豈異也朕博求譽髦寘之詞掖具官某學該綜而能文氣剛方而有守發宣和之冊具聞譽謬之言立靖康之朝尤著論思之益茲久淹于湖海諒彌富于經綸乃復賜環俾從掌制蓋將求藥言于

季輔問古事于仲舒不特取詞命之有補于世而已也尚勉之哉  
葉夢得除知洪州制

朕惟大江之西爲支郡十悉統于豫章郡蓋據九江上流凡由荆襄順流而下有建瓴之勢顧朕時巡建康嚴飭備禦而豫章之地實爲襟喉簡求時髦作我藩翰具官某稽古之學足以濟時應變之才足以撥劇登廊廟而贊經綸之業制國用而幹盈虛之權無施不宜有言底績輟從邇列殿此大邦使隱然長城有以折衝制勝于無形實朕所以用爾之意也祇服朕命往其懋哉

張浚除禮部尚書制

六經之道同歸而禮樂之用爲急記禮者必曰軍旅有禮故武功成用兵者必曰少長有禮而師可用則禮豈端爲治世設哉朕遭時多艱方以馬上治天下而不敢忘俎豆意出于此具官某高明而重厚剛毅而裕和博敏之學足以濟時清修之節足以厲世論事則嬰鱗而不懼治劇則游刃而有餘曩由臺端擢貳宗伯因時

繇蒞咸適所宜以至贊軍畫以居中總戎旃而殿後智勇之略尤簡朕心長茲春官宣穆羣聽然豈特用爾以禮文之事而已哉論思獻納以助朕有爲蓋所望于爾也往祇厥官無替朕命

孫覲除戶部尚書制

朕獲承至尊適際艱運郡邑殘破而賦入滋削邊郵俶擾而費出無窮將因陋就寡而不爲遠圖則有國不足之憂將仰取俯拾而不遺餘力則有民不堪之患欲付是柄實難其人具官某學問醇深言奇而適于用智慮英敏遭變而知其權才無不宜用然後見當乘輿一旦南渡之後而行闕百須竝起之時幹旋盈虛指顧辦給效見已試亟升八座之崇國恃以強仁富九年之積周冢宰制國用蓋垂量入爲出之規唐宰相兼度支乃貽剝下媚上之誚其體慈儉之意益圖均節之方爾所優爲盍俟多訓

賈安宅落致仕除吏部侍郎制

天下無事則獵纓整襟以進取而有餘天下有事則褰裳濡足以

馳救而不足君子之行藏進退適于義而已矣厥今海內繹騷國勢單弱羣聚天下之英雋而共圖之蓋褰裳濡足之時也具官某才周而用博學富而詞工奉對廣廷文冠多士升華從橐望臨一時顧當強仕之年而有乞身之請雖揮金娛老有慕于古人念仄席求賢盍存于王室況天官高選銓敘羣才僉曰汝諧勉爲朕起其體眷待務罄論思

中書舍人黃唐傳林適除待制宮祠制

朕以冲眇屬茲艱危加惠臣工使之均勞逸而全進退不吝名器所以興豪傑而圖治功矧予邇聯以疾來諗式頒寵渥庸示眷私具官某學術粹醇操履端潔通云學識高明才猷敏劭掌綸言于西掖方於論思扈鑾馭以南巡偶愆于衛養重違勤請俾卽便安爰升次對之華乃畀眞祠之逸顧朕宵衣旰食于上羣臣纓冠濡足之時諒雅意于朝廷當不忘于畎畝往服朕命思罄乃忠

鄭穀除中丞制

晉叔向曰大臣重祿而不諫小臣畏罪而不言此患之大者肆予寡昧奉列聖丕基重罹多艱大啟言路思得直諫之士付耳目之寄肆加詢攷實難其人具官某以剛毅敢言之姿懷精忠享上之志踐歷諫省規益居多深明治亂之幾力辨忠賢之實已試之效著乎朝僉執法于中蔽自朕志爾其展盡底蘊入告嘉猷朕虛心委己以聽焉必體至懷寧俟多訓

觀文殿學士中太一宮使兼侍讀

此下缺姓名

除應道軍節度上清寶

錄宮使制

參華祕殿久陪清禁之嚴錫命齋壇就易眞祠之逸豈名器之可假實文武之兼資允穆師言誕揚渙號具官某器博而用遠實茂而聲宏碩學貫乎九流敏識通乎萬務資以忠藎知無不爲安于行藏綽有餘裕夙懋踐揚之績寢階華近之途頃參乘于政機賴翊襄于帝載式是百辟揉此萬邦俯從均逸之求益閱宣勞之舊肆加顯職雍容琳館之游仍侍中宸綉繹金華之業閱日滋久告

猷益嘉是用載疇顯庸申錫徽號眷東吳之奧壤肇建節旄繫上  
清之殊庭實藏金簡豈獨侯藩之倚重亦惟道化之由興併獎耆  
明庸勸羣下於戲專節制于外朕方隆體貌之誠侍燕間于中爾  
尚罄論思之美顧惟舊德寧俟訓辭

毘陵集卷八

毘陵集卷九

內制

賜江南安撫大使呂頤浩詔

卿以元勳舊弼出殿大藩姦宄亂常提師薄伐冒犯鋒鏑跋履山  
川雖未收斬將擧旗之功亦可見推軀徇國之誼方時艱棘寒氣  
滋隆次舍之間節宣是慎今遣中使賜卿銀合茶藥想宜知悉  
賜呂頤浩乞宮觀不允詔

省所奏乞宮觀事卿出偃外藩力捍狂寇臥護諸將蔽遮行朝隱  
然長城中外倚重忽覽來奏引疾旬間雖高冲退之懷殊拂倚毗  
之意今諸將進兵塵擊軍聲已張精神折衝政有資于元老藥石  
自輔其務究于遠猷協濟多艱毋復有請所乞不允

又

省所奏乞宮祠事具悉比者李成越境南渡抗逆王師有吞噬江  
左之心卿以舊弼臥護諸將扼其奔衝使諸將盡銳征討克復郡

縣而賊不敢出一騎以窺饒信行朝恃以無恐者卿之功也朕方倚毗共滅此賊露章引疾殊拂朕聞朕之待卿自謂無媿至于兵將分合務濟事機非關重輕殆不得已諒卿體國必悉朕懷卿宜少安厥次勉卒乃功以稱朕始終眷遇之意勿復有請

又

朕以卿勳舊委卿江南所賴精神折衝儀型百辟亦非專以吏事責卿向聞移疾求去數遣使輶手筆開諭至于再三朕之待卿盡矣比覽來奏猶未視事欲遂前請何未體朕眷委之意也以卿平日志不辭難乃貽避事之譏忠以享上而蹈慢命之戒朕竊爲卿惜之況今寇攘未除防秋在邇遠近百執宜惜寸陰卿爲大臣與國同體而必欲求去何以責將士之用命率臣庶以赴功朕顧江南非卿誰可卿雖力請朕志不移今遣內侍某撫問候卿視事訖奏卿宜深諒勿復有辭

賜呂頤浩詔

卿以元宰出殿藩州慨然帥師援九江之圍引義竭誠不擇劇易比覽捷報已收奇功斬馘執俘前後非一戰艦旗鼓獲致亦多緬想忠勞良極嘉歎輔臣奏卿出入行間衝冒風雨稍愆調護尤用惻然今專遣內侍撫問仍賜卿馬一匹并鍍金銀鞍轡一副至可領也

賜浙東制置使張俊詔

朕比委卿提重兵制置兩浙事宜本圖數日間與卿會于明州今聞明州錢糧空乏豈能聚兵又聞敵人或由常州或由宣徽或由衢婺以犯越州設謀措意專在朕躬若失浙邦朕將焉避中夜思念寢食靡寧今已委郭仲荀辛企宗同力捍禦惟卿忠勇事朕累年共嘗險艱備著勞效昨者提兵勤王定計復辟朕非卿則倡義誰先卿舍朕則前功俱棄君臣之際休戚是同今則水陸道窮宗社危甚卿宜協謀戮力共捍賊兵若能破敵保我越邦當加王爵以酬忠蓋卿宜深悉朕不食言



又朕自艱難以來竭國帑以養士捐好爵以勸功緩急之際鮮復爲用或望風畏怯或臨敵奔潰朕甚悼之今者敵騎遽犯浙東朕方避地海隅遠邇震懼卿獨奮忠誼請畱明州秣馬厲兵爲決戰計剡章來上三軍賈勇敢觀志畫良極歎嘉比聞敵遣偏師止數百輩涉遠勞敝勢宜易圖卿以精甲十倍阻險迎擊必可萬全朕有不次之賞以待卿下及將士次第褒擢更宜申嚴紀律毋致侵擾官私惟卿腹心之將朕所倚毗必副眷懷寧俟多訓故茲示諭想宜知悉

賜兩浙制置使韓世忠詔

邇者金人南渡遽陷建康復遣偏師徑趨杭越朕以宗社之重暫避其鋒然念敵人勞師深入冒犯阻險殘暴無厭殆天亡之時也比在會稽呂頤浩獻議欲會京口邀截歸路以爲永圖方須卿來講究利害遽覽來奏及圖上方略實契朕懷惟卿忠憤之誠謀慮

之審千里之外不謀而同載觀規圖深所嘉歎倘能投機一戰取勝則中興宋祚惟卿之功不次之賞朕不敢靳凡獲賊所有資財玉帛盡予將士已令降空名告劄二百道用資激賞及助軍需勉踐爾言以副期待故茲詔示想宜知悉

又

卿比統率舟師邀擊敵寇忠勇之節遠近所聞相距大江殆將兩月殺傷莫計俘馘良多茲捷奏之屢聞嘉茂勳之鮮儷豈謂濟師之失援致隳定亂之全功然成敗者天理之難知而勝負亦兵家之常事度尚所亡之少少豈足介懷淮陰益辦于多多尚觀來效卿其撫傷痍之眾上俘馘之功以及戰亡竝當賞賚今差內侍某前去撫問如欲便赴行在卽仰疾速起發前來或且駐師江陰休養士卒卽令下戶部行下所屬應副錢糧故茲示諭想宜知悉賜福建制置使辛企宗詔

朕眷七閩險遠瘠薄俗旣纖嗇以趨利間多椎剽而爲奸州縣之

吏初既失于拊循盜賊之萌又復稽于彈戢馴致紛擾莫獲奠居  
朕比委卿制置一路入境問俗不憚險艱折馘執俘洵聞勝捷士  
卒之氣既振姦宄之鋒自摧緬想忠勤良極嘉歎益翦除于黨類  
期綏靖于里閭訖其外庸貯有褒陟故茲示諭想宜知悉  
賜陝西宣撫處置使張浚詔

金人去冬兩路深入南蹂洪撫以至筠袁東陷昇杭以及明越朕  
以宗社至重父兄未還遠避敵鋒求保基緒而我將士懷積年憤  
鬱之志乘驕敵勞敝之師各輸厥忠人自爲怒張俊迎戰于鄞水  
劉光世邀擊于江西周望以大軍控禦于嘉禾趙立擁義旅驅攘  
于淮甸捷書日報俘馘踵來敵人挫傷前所未有爰念既得地利  
之險以保江浙兼亦因天時之便以規河山惟卿忠翊朕躬勳在  
王室宣風邊徼備著勤勞宜屬壯猷共恢遠略蓋聞敵人用兵深  
忌暑月要卽騎卒解甲弛鞍之際稍資秦兵投石超距之餘于五  
月間徑擣巢窟一由同州渡渭以取蒲解一由鄜延界渡河以取

晉隰俯從戰勝百倍之氣仰符前王六月之征用我計之未嘗出  
敵人之不意竊謂一舉可圖萬全卿宜審度事機益深籌慮勉卒  
賢業無規近功庶幾盡復兩河迎還二聖以底中興之烈豈不偉

歟

又

朕以疆場多虞風塵未靜東巡江左倏已逾年西顧秦中邈焉萬  
里念王靈之阻闕將使指以宣風卿位冠樞衡勳昭社稷挺忠精  
之特操早被簡知秉經濟之遠猷靡辭煩劇曩疇咨而臨遣獨慷  
慨以請行載涉炎涼備宣忠力蒐卒補乘旣大振于軍聲摘伏發  
奸復少蘇于民瘼每閱封章之上具形憂國之誠爰遣使軺往宣  
德意載念高秋在候殘敵未還恐尚肆于貪謀蓋有資于外援宜  
提勁旅豫控上流諒惟心德之同必體國家之急朕所倚重盍煩  
訓辭故茲親筆示諭想宜知悉

又

卿宣威關陝備著忠勞遣將出師屢聞勝捷昨得七月奏已復鄜  
延一路及京兆府等載觀規畫良極歎嘉仍期八月進兵圖取蒲  
解自是之後音驛不聞夙夜惟念頗深西顧之憂蓋聞金人會兵  
進銳以窺陝右深恐萬一或墮敵計更宜珍重以收全功今朕畱  
會稽沿江捍禦頗嚴淮甸敵人不敵南渡但江南諸盜未靜已遣  
張俊同池帥呂頤浩悉力剪除皆不足慮計卿欲知因令密院遣  
人問卿動息軍事曲折可悉以聞

又斬趙哲待罪

比聞金人糾合重兵力圖關陝惟卿倚重寬我顧憂雖提五路之  
全師乃當百戰之勅敵非賞罰信號令明不撓不疑鮮克有濟邇  
來縱敵玩寇驕惰成風卿能明節制之權正逗撓之律罰一勸百  
孰謂不然引咎露章益見忠謹況乃一勝一負兵家之常所亡不  
多無足介意更圖後舉以收全功其堅乃心益務持重庶幾盡復  
境土以成中興之烈朕之所望也所待罪放想宜知悉

又

朕眷關中天下根本卿將使指爲朕遠行載涉歲華具宣忠力自  
得去年九月所上章尋降親筆放罪去訖比覽呂頤浩奏謂卿失  
利之後退保興州欲取閒道至熙河點兵以圖再舉朕復聞此宵  
旰增憂重以山川阻脩道路榛梗音驛不至已逾半年機事之間  
難于逾度復念自古成敗不可必期卿宜審量事機擇利而處敵  
人既悉重兵以窺秦蜀而我師挫傷之餘或未能長驅而深入也  
第宜謹守關塞益務持重儻或牽制狂敵不能南侵則亦惟卿之  
功當忍小忿徐爲後圖近者李成跳梁剽殘江南數州已委呂頤  
浩張俊掎角進兵大獲勝捷想此逆賊不日勦除而淮甸殘敵亦  
稍引去諒卿聞之當亦少寬憂國之意人回宜悉具彼中事宜曲  
折一一聞奏

又

比得卿三月四日奏待罪及乞選委重臣鎮撫關陝事具悉卿宜

風陝服久著忠勤失地喪師頗增憂顧夫敵以乘勝不可當之鋒我以新集不素練之卒眾寡堅脆固不可侔欲一戰以收功豈萬全之可必天未悔禍既往莫追然敵人既得志于三秦必垂涎于全蜀而又南牧之寇尚頓淮揚則吞噬江左之心猶未已也卿宜收合煨散養銳待時但能據險堅壁謹守要害既以保固四川之地又能牽制南下之師則亦惟卿之功兵忿者亡古人所戒毋疾戰以規近利毋深入以蹈覆車益遠乃猷毋忽朕命相去萬里音驛罕通次舍之間更宜尚慎所待罪放免

浙西親征詔

朕念中原之微弱憤強敵之憑陵固嘗屈己以請和尚復阻兵而肆虐比由海徼還次越邦赤子流離殆失耕桑之候聚廬焚蕩盡爲瓦礫之場咎在朕躬禍貽爾眾幸民心之未替知天命之攸歸然而殘寇尚假息于江堧潰卒復肆行于近境坐念傷痛詎容懷安是思晉文桑下之謀遠跡漢高馬上之略斥嬪御膳羞之奉躬

鞍馬甲冑之勞董率六師巡行列部既欲撫綏于凋瘵又將彈戢于姦偷庶幾消弭禍災圖回基緒尚賴朝廷將士州縣吏民戮力奉公忘家徇國各務殫于忠赤用弘濟于艱難朕以四月某日巡幸浙西所有六官百司並留越州

賜門下詔

朕顧德弗類遭時多虞臨民馭朽索之危涉道濟巨川之遠向者敬師深入國步載艱永惟責躬避位之圖專爲講好息兵之計力祈大國冀迎二聖以遄歸庶保丕基可致四方之綏靜今則奉太母之慈訓念嗣君之幼冲致兵民推戴之誠諭內外請祈之切謂防秋在邇當愛日以有爲謂遣使出疆恐尋盟而未遂露章狎至復辟爲期朕以太后之旨不敢違羣下之情不可卻孫辭靡獲任重難堪仰太母之慈仁許同聽斷肆眇躬之寡昧敢憚憂勤朕惟東朝有垂簾保佑之勞元子有踐阼纂承之託上徽稱于長樂以致四海之歡正豕嗣于青宮以繫萬民之望式頒溫詔誕告多方

鳴呼有臣三千實倚同心之助十年七百復開過曆之期更資中外之交修庶格神天之協右咨爾有眾咸體至懷太后宜上尊號曰隆祐皇太后令有司擇日奏請嗣君宜立爲皇太子令有司擇日備禮冊命施行所有三月六日赦書應干恩賞等事有司疾速施行如有稽違重寘典刑故茲詔示想宜知悉

又

朕遭時艱危兩宮北狩實賴隆祐皇太后母儀天下保佑朕躬菲德寡祐奄臻禍變伏讀遺誥貶降禮儀固宜仰遵慈仁之訓爰念太上皇帝繼統于哲宗靖康垂簾授位于冲眇中更苗劉之變尤高社稷之功雖正隆名未極大養非盡尊崇之典曷昭仰報之誠隆祐皇太后應干典禮可比擬欽聖憲肅皇后故事令有司討論詳定以聞朕以繼體之重當從重服以稱孝思之意故茲詔示想宜知悉

又

朕惟隆祐皇太后坤儀如昨敢奉有期永懷夫保佑之功務極其哀榮之典爰念蒙垢于紹聖之末卽瑤華而退居復位于上皇之初實欽聖之慈旨屬姦諛之當制乃隱沒而不言未洗謗傷久淹歲月肆朕纂紹逢時艱難雖正隆名未伸褒冊將卽廟庭而登配豈容典禮之久稽用詔攸司載加追賚可令禮部太常寺討論合行冊禮及奏告天地宗廟等事申尚書省

太后賜門下詔

敕門下以公滅私者哲王之明訓右賢左戚者治世之遠圖吾以寡昧之資際艱難之運永惟付託之重盍辭保佑之勞聽政垂簾非眇躬之得已遭時多壘豈故事之敢遵已裁御府之膳羞仍損家庭之恩數靡敢伸于私諱恐涉僭踰復申劾于本宗以防干撓乃掌兵于內外或庀職于朝廷事屬嫌疑理宜避免克自抑畏期感格于天心始于憂勤庶緝熙于治道咨爾有眾咸體至懷除膳羞已裁減外其因垂簾應干恩數痛行減省故事當諱父名亦更

不避以稱吾恭已抑畏之意本宗子弟已降詔旨不任要職不于私第見宰執不干于朝政可令今後不得任內外掌兵官及在京并行闕職事官忠厚見提舉巡幸一行事務亦罷故茲詔示想宜知悉

賜中書侍郎王孝迪赴闕詔

敕孝迪朕遭時艱危宵旰求治實賴左右前後協恭戮力以圖康功卿譽望才猷簡于朕志圖任共政時惟舊人召還廟堂允資經濟固宜朝聞命夕引道也倚注滋久未聞造朝其悉大臣體國之誠無徇匹夫小廉之節亟祗新命以副虛懷已除卿中書侍郎詔書到日卿星夜起發前來赴行闕不得更有辭免故茲詔示想宜知悉春暄卿比平安好遣書指不多及

賜浙西安撫大使劉光世詔

承州殘敵攻圍山陽諸鎮之師逗撓不進以卿任兼將相勳望特隆已卽指揮竝聽節制比見探報王師砮柵皆在高郵之南去楚

向遠勢不相及深慮淹久致失事機脅亡之憂于卿爲重宜速渡大江以身督戰庶使諸鎮用命戮力盡忠亟解山陽之圍一掃垂盡之敵朕亦議遣大軍以爲卿援諒卿體國必悉朕懷

賜張浚特進學士院詔

浚躬率將士列屯兩淮以至經理上流皆中機會邇者逆賊擁眾深入蹂踐淮西浚親臨大江以身督戰將士賈勇一勦無遺而襄漢之間捷書屢上勳勞顯著深用歎嘉宜有褒升以勸列位

賜江南西路安撫大使朱勝非詔

朕比裂江北之地分置鎮撫以捍外寇眷惟江南密邇行在復擇勳望之臣建三大帥所賴心德惟一精神折衝稽之公言蔽自朕志卿惟舊弼朕所眷知九江上流倚卿爲重意其朝聞命夕引道也抗章遜避殊拂朕懷朕以艱難累歲夙夜究圖小大之臣所宜戮力呂頤浩劉光世皆以復辟之勳當一面之重授任而往罔敢憚行庶幾公忠表倡列位卿其體國勿復固辭除已令學士院降

詔并遣使撫問外故茲親筆宜悉朕懷

朕建三大帥控臨兩淮率用勳德大臣以隆方面之寄卿惟故相朕所眷知畀卿九江選任實重除命之下已淹歲時猶未奉詔之藩塞惟視事彈章累上謂朕失刑命令儻或廢于大臣法度豈復申于百執朕亦恐道途尚梗或致愆期而典憲遽加有傷體貌益思全度務極始終卿宜念九江收復之初百姓凋弊之極卽日引道往見吏民拊摩瘡痍招輯流冗不獨道卿遲慢之責亦得以副朕勤恤之心毋復稽留重招物議故茲詔示其體至懷

賜威武大將軍曲端詔

朕遭時多艱移蹕暫避眷關中阻山帶河之勢爲天下勁兵健馬之區捍我邊虞倚時將略邈在遐外惕然顧懷曩臨遣于樞臣俾昭宣于德意惟卿姿稟沈毅世篤忠勳久提貔虎之師式著疆場之略比覽行臺之近奏益知分閫之賢勞已建殊名俾護諸將旁

兼制于五路外折衝于二邊用彰推轂之誠復峻廉車之秩寵嘉特異眷倚可知庶圖展盡于猷爲豈復致疑于讒間朕念隆上都而觀萬國孰踰關陝之雄得猛士以守四方遠相韓彭之烈其體朕志無愧前修

賜孔彥舟詔

汝頃事朕藩邸具知忠勤從軍累年頗著勞績比聞提兵遽入湖南公肆侵擾遠近驚疑以謂汝有攀附之恩亦復如此爲天下笑朕爲汝惜之諒因軍兵闕糧非汝本意昨已除汝正任觀察使湖南副總管想已祇受今聞李成遣馬進攻圍江州江南大擾呂頤浩已統萬人問罪朕以行在防秋未欲繼發大兵汝可統率部曲解圍江州併力以討馬進候勦除淨盡入覲行在不特以功贖過朕當以節度使授卿勉立大功務全終始故茲親筆宜悉朕懷

賜浙東宣撫副使郭仲荀詔

朕以金人渡江移幸旁郡委卿宣撫浙部統率將士以捍強敵始

欲俟朕駐蹕明州期卿等來今會到錢穀數極微小深憂乏絕以  
飢我師而又探聞敵師已圍建康分兵由常或宣徽或衢婺以窺  
會稽則區區之意專在朕躬又思敵人雖強勞師遠襲已非所利  
而況吳越阻山帶江地皆沮洳道徑隘狹得地之利于茲爲多若  
以逸待勞以少擊眾資卿忠智誠非所難又思國家艱難以來裁  
損百費竭力養兵若俟緩急以保衛爲名不復接戰已非本意而  
又君臣聚首竄身海隅縱獲生存豈不有愧朕中夜思念寢食靡  
遑今卿與張浚辛企宗有甲兵二萬并李鄴所聚民兵亦約萬人  
西阻濤江南依山險以此眾戰誰能禦之卿宜審思以身督戰大  
將以下有不用命當以軍法從事俟卿戰退大敵功狀來上卽除  
卿同知樞密院事故茲親筆卿宜知悉

賜嚴州柳約詔

金人入寇遽犯臨安復遣偏師遠及明越朕方避地遵海而南將  
士惰驕鮮復用命卿守偏邦慨然請行欲與諸郡合從克復吳會

比覽來文良用嘉歎今張俊在明州已聞捷報韓世忠全軍在樵  
李杜充在儀真各圖邀擊已令周望遣陳思恭統兵前去收復臨  
安卿更審量事宜統率將士土豪以決進討如不可躬行卽選將  
官前去候立功績當不次褒擢其餘將士土豪等第推恩故茲親  
筆想宜知悉

賜新除端明殿學士同簽書樞密院事鄭穀辭免恩命不允詔

敕鄭穀省所奏辭免恩命事具悉朕纂承丕緒蒙訓東朝國步多  
艱允賴股肱之力邊陲制勝尤先帷幄之籌博選人豪俾參兵柄  
卿純心許國厚德鎮時諫垣多補過之規憲府著摧剛之節直而  
不撓屹砥柱于中流行其所知灼元龜之先見已信願言之行兼  
圖濟武之文宜密贊于樞機亟延登于廊廟允符公望何事撝謙  
往卽官常毋替朕命所請宜不允故茲詔示想宜知悉

賜新除端明殿學士同簽書樞密院事李邴辭免恩命不允詔

敕李邴省所奏辭免恩命事具悉朕以寡昧屬茲艱虞內侮外陵



國有阽危之勢將驕卒惰人無賈勇之心顧經世之鴻才付本兵之重寄卿器姿閱達問學淵深粲然華國之文藉甚映時之望復登鼇禁小心蓋得于鄭細肆演綸言大手每煩于德裕已賴揮毫之助更資借箸之謀入贊鴻樞實諧清議曷過形于奏牘欲懇避于恩章往卽欽承體茲眷待所請宜不允故茲詔示想宜知悉

賜新除戶部尚書孫覲辭免恩命不允詔

敕孫覲省所奏劄子辭免戶部尚書恩命事具悉文學政事昔爲兩科文學之士患于虛浮而無實用政事之才患于固陋而無遠謀求其兼全付以劇任卿以文學則博通古今而有可用之實以政事則練達利害而有經遠之謀惟時地官實總國用制多寡之數以節其出入幹盈虛之權以通其有無卿蓋優爲何足遜避惟長與貳事任略同循次而遷公議僉穆亟祗成命務體眷懷所請宜不允故茲詔示想宜知悉

賜新除翰林院學士李邴辭免恩命不允詔

敕李邴省所奏辭免恩命具悉朕惟纂承大統雖有事于戎昭鼓勛多方亦莫先于文告簡求雋老寓直禁林卿學探本原文參經緯發揮七制曩聞黃絹之詞流落兩朝宜復青氈之舊仍於論思之益豈專潤色之工成命旣頒公言胥穆盍煩沖挹亟體眷懷所請宜不允故茲詔示想宜知悉

賜右諫議大夫鄭穀乞待罪不允詔

敕鄭穀省所奏乞待罪事具悉比以強敵歲侵中原日削奄入淮甸駐蹕吳中引咎責躬以弭禍變卿以忠義之節譽諤之言宏益居多庸臣沮傷不悉聽用肆予寡昧方賴箴規屏居固辭非朕之志往安厥次益罄乃忠所辭宜不允故茲詔示想宜知悉

賜新除御史中丞鄭穀辭免恩命不允詔

敕鄭穀省所奏辭免恩命事具悉朕聞良藥有苦口之利明鑑無見疵之尤惟求讜言有補治道方並告猷之益式圖已試之功卿遠識造微純誠許國踐揚諫省箴規久著于青蒲擢長臺端彈擊

竝觀于白簡宜亟殫于忠赤以弘濟于艱虞何執撝謙尚形遜避  
往祇成命益體眷懷所請宜不允故茲詔示想宜知悉

賜新除中書侍郎王孝迪辭免恩命不允詔

敕孝迪省所奏辭免恩命事具悉天下有緩急之勢君子有行藏  
之時上既求賢而圖濟于艱虞下思行道以自期于著見則君臣  
相得而治功可成卿望臨一時身兼數器顧予眇質允賴于交修  
惟爾舊人乃先于圖任況茲國勢未振政本久虛何弗體于眷懷  
尚曲形于謙挹亟踐厥次無復有辭所請宜不允故茲詔示想宜  
知悉春暄卿比平安好遣書指不多及

賜新除徽猷閣待制康允之辭免恩命不允詔

敕允之省所奏劄子辭免恩命事具悉朕省方觀民錄德定位式  
示臣工之勸豈容名器之私卿識慮精明風力强敏壽春假守而  
羣偷辟易隱若長城之賢武林開藩而于室晏安熏然慈父之政  
肆加詢攷備見忠勞可無勸賞之公以慰借畱之願賜金增秩頒

漢室之璽書簪筆持荷綴甘泉之法從增華使節允協師言何必  
撝謙尚仍固避往祇成命亟體至懷所請宜不允故茲詔示想宜  
知悉

賜資政殿學士葉夢得辭免知洪州恩命不允詔

敕夢得省所奏劄子辭免知洪州恩命事具悉朕惟才能之士可  
與有爲而或失之輕道德之士可與有守而或失之緩乃選于眾  
兼用所長卿學問深博而道德足以鎮浮識慮精明而才能足以  
辦劇眷南昌之都會實行闕之藩維輟吾重臣殿此南服惟鎮浮  
而不擾乃能綏靖兵民惟辦劇而不勞乃能鎮服姦暴允穆清議  
寧煩固辭式遄其行無替朕命所請宜不允故茲詔示想宜知悉  
賜淮南諸鎮詔

朕秉德弗類遭時多虞敵騎憑陵貪殘滋甚乘輿播越艱險備嘗  
永懷祖宗積累之勤遠念父兄劫遷之難下憫黎元之荼毒近傷  
井邑之陵夷跼地躅天痛心疾首比旋師于江浙尚牧馬于淮堧

靜言淹久之因復有窺乘之意爰念肇分列鎮實控賊巢奮忠誼以致身必思賈勇顧寇戎之在境諒已疚心矧盛夏之亢陽屬敵營之解甲弓弩弛緩鞍馬疲羸事亦易圖機不容失宜倡齊公九合之義共成宣王六月之征擊其情歸庶有符于往志貴乎拙速當毋失于天時懋建非常之勳卽膺不次之賞候詔書到日可會合諸鎮同共勦除淮甸金人餘黨以成大功故茲親筆示諭想宜知悉

賜御營都統制辛企宗詔

朕比委卿于會稽固非得已始圖駐蹕馳驛召卿今聞敵師之東專欲窺朕四明空乏無以聚兵朕之精兵皆會吳越若不依地利之險阻作士氣以驅攘則君臣竄身去將焉避中夜思念圖濟艱危已詔仲荀俊戮力協謀以捍遠寇況聞分兵而來其徒必不眾多惟卿宗族被遇累朝卿之忠嘉朕所體悉告辭之際屢布悃誠若皆以入衛爲心則天下非朕所有卿宜體國家之急忘位貌之

殊賈勇爭先無致嫌隙賞罰之柄朕不敢私儻有成功卽頒旄鉞示茲親筆朕不食言

明州奏捷賜詔

朕觀國家自金人入寇以來士氣沮喪莫敢櫻其鋒者今復遣輕兵深入四明卿賈勇先登以身督戰大獲勝捷忠誼之節俘馘之功獨高一時載覽封章良極嘉歎已令張公裕具海船二百隻前去以俟凱還更宜勉勵以全大功毋使匹馬生還是所望于卿者懋功之賞朕不敢私故茲親筆獎諭想宜知悉



回賀知福州曾尚書啟

伏審起從祠館就領价藩望實前孚已歎何來之暮教條始布固將不令而行屏翰增隆摺紳胥慶恭惟某官剛毅有立悃悞無華懿文足以潤色帝猷遠識足以經綸庶務踐揚要劇藹著事功久從嶺海之游益注朝廷之意惟是閩粵稍遠于行闕矧經寇虐之震驚猶爲東南全盛之奧區故屬老成而臥治諒識鄭崇之革履卽頒宣帝之璽書而某頃以非才亦嘗承乏近觀舊政故慙播秬之前側聽輿言必謂無禰之昔尚賴匿瑕之大德庶逃司敗之深文先辱賤勝第深銘感

回賀知揚州葉待制啟

伏審外庸旣著克宣疆場之威次對復升誕布絲綸之寵藩垣增重紳笏交歡伏惟某官識慮敏明才猷秀傑學問由于世濟風績藹于民謠自結重旒之知寢膺持橐之選鑠金之口歎滄訛之交興匪石之心歷險夷而不貳比者捍窺乘之強敵撫凋瘵之餘民

恩威竝行聲實兼茂宜還從列以慰公言歸僞境之侵疆更賴折衝之略致行朝之奠枕益隆夾輔之勳屬弭駕之云初拜飛緘之遽及未遑贊喜先辱謙光欣感之誠敷宣罔旣回賀知溫州章尚書啟

伏審輟六卿之長于中臺牧千里之民于便郡褰帷視事擊壤騰歡恭惟某官學造精微氣涵剛大志節更險夷而不貳才術遇盤錯而有餘折狂悖之氣于危疑之時抗忠嘉之言于獻納之地張旛絕域自青終軍之纓返命行朝不棄蘇武之節益隆天眷進長地官方須柄用之榮遽得蕃宣之請惟義所在與時偕行識革履之聲豈容久外促鋒車之召竝聽來歸慙慶牘之未馳辱榮函之先及靜言欣感曷究敷宣

賀朱相公除右僕射啟

伏審大廷敷號舊弼登庸宿望昭宣慰蒼生之傾屬同心翊戴扶黃屋以尊安中外歡愉華夷讐服竊以九重旰食軫國步之迍邐

四海疚心歎人謀之回適急于赴功則攘臂以事兵力膠于應變則拱手以須天時類失厥中無益于治宜得魁壘豪傑之士以爲經綸康濟之圖人固患于難知政莫先于任舊恭惟某官學窮道奧識探幾先德度恢闓撓汪汪之陂而不濁才猷敏達游恢恢之刃而有餘曩警蹕之時巡倚鈞衡而爰立一德始熙于帝載兩兇遽亂于國經八柱承天卽正高明之位五龍夾日灼知潛授之功扶顛談笑之餘遠引江湖之上謗書一篋何傷丹扆之深知細札十行旋趣鋒車而入覲邇英晝訪宣室夜前衮衣繡裳旣喜歸于姬旦命圭相印復加禮于裴公固應展盡夫遠猷豈復規圖于近效裕民積粟以固邦本詎專兵力之強嘗膽枕戈以修政刑亦戒天時之變將見運籌帷幄以決勝于千里端委廟堂以爲準于百僚沃心清燕之間拭目中興之盛某頃升從橐嘗蒙薦慰之私比解藩符復忝交承之契仰止熒煌之座稱慶無階茶然衰病之蹤依歸有所祇聞新拜喜倍常情

賀張知院除右僕射啓

恭審渙號大廷晉升良弼宸衷簡注見考慎之得人國勢尊榮知治安之有日竊以君臣相遇古今至難玩歲愒日則必悔于噬臍趨事赴功則每虞于掣肘故時君克斷裴度所以成功而朝議多違羊祜不能如意自非天意悔禍人謀允臧則何能用大度之言于以啓中興之運恭惟某官奇才命世遠略濟時洗日咸池功素高于社稷捫參蜀道名已振于蠻夷雖更夷險之殊不替始終之遇屬傳羽檄趣駕鋒車復正位于樞機仍撫師于疆場運籌帷幄而決勝于千里致敵騎之宵奔端委廟堂而爲準于百僚副輿人之夙望實惟圖舊何止策勳伊尹一德以享天心無間然矣漢高五載而成帝業尚竊遲之益堅帶礪之盟增煥鼎鐘之勒某辱知最久贊喜尤深閩海相從已熟衰殘之迹荆溪休老願諧退縮之心頌詠之私名言罔旣

賀趙相公除左僕射啓

伏審決定大策建中興不拔之基褒賞元勳正上宰久虛之位王  
庭孚號海宇交歡竊以赤烏袞衣美征東之姬旦命圭相印答平  
蔡之裴公播在聲詩光于簡冊況卻憑陵之巨敵有開恢復之宏  
規示丕勸于羣工宜首膺于異數恭惟某官直方而不撓惇大而  
有容獻納論思夙著排姦之節贊襄輔弼尤高經遠之謀惟光武  
能推赤心而絳侯可屬大事會羽書之遽至奉革輅以徂征師律  
一新坐據江山之險捷書屢上幾成京觀之封致醜類之宵奔本  
嘉猷之辰告射雕賈勇雖多李廣之無雙指獸收功誰出蕭何之  
第一宜頒宸綽首冠台躔舍爵之賞旣行歸疆之期可待某逃聞  
誕告喜越常情昔忝同升謬託金蘭之契老思自放願諧邱壑之  
求頌詠之私敷宣莫究

回馬運使啓

伏審抗旌俯次于近封視印已從于刮目姦媮之吏聳威望之前  
孚凋瘵之民跂寬條之下逮羣心相慶一路所同伏惟某官智識

高亮而詳練于事機才猷敏強而緣飾以儒雅念江表瘡痍之未  
復縈淵衷宵旰之不忘顧將上不乏于邦儲下少舒于民力類非  
文俗吏之所能辦故屈老成人而不爲嫌某茶然衰病之蹤求去  
未遂仰止帡幪之託爲幸滋多修慶牘而未遑辱榮函之遽及感  
慚之至敷述奚周

代郡侯賀應運使啓

竊審榮拜宸綸就更使節允資心計上幹邦儲入境宣風涓辰視  
事恭以某官機猷敏濟業履粹明出逢熙盛之辰益茂經綸之志  
久茲詳試蔚有休稱寢膺睿哲之簡求洊被光華之臨遣領均輸  
于淮甸已聞百室之盈總轉漕于浙邦用充九年之蓄仁疇茂最  
入踐華資某偶此叨恩鼎來假守稔聞德望適在鄭君之鄉行遂  
郊迎聊繼蜀人之寵依仁竊幸稱慶無階跂詠攸深名言罔喻  
回賀郭少傅啓

伏審頒大廷之顯制進亞傅之崇資凡預觀瞻同深林蹈恭惟某

官勳高列辟望著三朝入扈殿廬壯儀刑于陛戟出分帥闡聳威  
譽于邊陲曩聞烽火之累傳屬仰海邦之靜治介圭歸覲宜膺眷  
獎之隆孤棘升華增重蕃宣之寄某披瀝惟舊荷照尤深側聞綸  
綍之誕揚方媿藤牋之獨後過蒙謙眷第極感銘  
回江東二漕啓

叨膺宸旨俾鎮陪都揣分引辭方徹九重之聽飛文垂慶蓋踰十  
部之賢深惟留鑰之司非曰養疴之地顧宦情已矣老將至而止  
合投間病骨枵然力旣愆而豈宜任重此蓋某官誠心樂善屈己  
定交借妙語而陰辱推揚先眾人而俯加勞問方頒諭詔少安衡  
宇之居莫敘謝誠姑報珍函之寵感慙之至敷敘奚殫

福州到任謝宰執啓

起自三吳之故里游更兩越之名藩試用罔效委寄加隆嫌于擇  
事不敢力陳疾病之身卽已到官于是具宣寬大之詔惟七閩之  
巨鎮接五嶺之炎荒地狹而山谷深民貧而風俗悍向由劇寇屢

欲窺乘繼以大兵頻資供億致公私之儲掃地加夏秋之旱流金  
不堪歎息愁恨之聲宜有還定安集之政顧如某者心雖許國才  
不適時進無補于謀謨退不堪于煩劇承流補郡曾訟詬之未清  
假寵經帷辱召環之遽及第緣衰茶屢控忱誠未奉俞音更叨煩  
使此蓋伏遇某官才高而兼濟道大而有容惠綏外服之民開濟  
中興之運念傷夷之凋郡當解煩苛故畀付于陳人使專牧養敢  
不鞭策駑鈍拊摩瘡痍儻正信之教興庶幾弭亂雖催科之政拙  
詎敢辭勞

再知紹興府到任謝宰執啓

觸熱之官諷辰視印在私良便仍昔所臨政拙心勞吏民習知其  
駑鈍頭童齒豁魚鳥亦怪其衰殘伏念某向誤聖神之知徧更中  
外之任由寵榮之踰分致盈滿之挺炎疾病相仍長恐膏肓之逼  
聰明不及益知體脾之難顧共理之寄大懼于曠瘵而投閒之章  
屢關于聽覽既不責其避事又復畀以便藩此蓋伏遇某官光輔



聖時丕隆賢業威加有截收召公辟國之勳鈞播無私得伊尹格  
天之道欲拊循于凋瘵尤慎簡于循良遂致陳人復叨舊物適使  
軺之驟至乘帥閩之暫虛冥搜殆甚于察淵公取不嫌于竭澤方  
遠夷之猾夏當海徼之防秋而乃帑無宿儲吏罷月俸欲剝膚椎  
髓恐非仁政之宜而折骨絕筋何補公家之急尚賴至明燭隱盛  
德包荒惠以初終免于顛沛田廬在望少休抱疾之身溝壑未填  
盡是報恩之日

轉官謝宰執啓

承流無補增秩爲榮洵懇避而弗諧終兢慚于非據伏念某學既  
老而益落氣被病而逾衰誤膺分闈之求僅弭弄兵之習兩年黽  
勉敢歎周南之滯畱六沴侵陵眞作漳濱之沈痼數祈罷免少道  
曠瘵豈尚闕于俞音復叨升于顯秩賣刀買犢欣暫反于農疇求  
牧與芻媿數關于朝聽顧撫字之心勞而催科之政拙功何有于  
絲毫繫高明之位列而亭育之功全物率歸于陶冶此蓋伏遇某

官懋格天之賢業建辟國之遠猷約以待人故每棄瑕而錄用醴  
于行賞將使趨事而赴功枯荻猥費于霑濡老馬徒勞于鞭策上  
流甚重誠非臥治之時下澤可乘終假投閒之便永惟未死之日  
期報不貲之恩

回賀湖州方侍郎啓

伏審光膺眷注榮領蕃宣公議稍伸輿情交慶恭惟某官受才弘  
毅稟氣中和早貢讜言藉甚外臺之譽晚疇賢望揚于法從之華  
一從祠館之游殊鬱摺紳之論起臨輔郡作屏行朝佗還漢橐之  
持豈容孔席之暖某久欽賢範欣覲除書屬弭駕之云初念慶函  
之未及遠貽翰墨第極感銘

回賀常待制啓

伏審得請眞祠暫諧雅志躋榮從橐稍慰公言恭以某官學問見  
于躬行直諒由于世濟扶持國是共高譽諤之風潤色帝猷不廢  
論思之益暫均勞于支郡實簡眷于淵衷自厭風波有懷邱壑直

西清之五閣仰觀出綍之優覲北闕之九重行被賜環之寵某比  
因假道幸遂披風屬稅駕之云初致賀牋之獨後先蒙翰墨第劇  
感銘

謝翟給事舉改官啓

竊祿鼎來未能暖席揆章甚寵實慰窮途佩德不貲寄顏無所竊  
以賢否異趣迹每混于淄澠貴賤相求勢實侔于胡越疑似之迹  
則每難于必見邈絕之勢則不能以自通故有公卿不揖客之譏  
英俊沈下僚之歎惟識解超世則賢否之淄澠相絕于千里以人  
物爲心則貴賤之胡越不間于一毫用能得真材于稠人之中卓  
然振高義于流俗之外如某者愚無一得窮有百罹龔科舉腐儒  
之常談無經術高世之遠見謀及親之三釜蚤餬口于四方一昨  
遭禍不天痛枯魚之銜索置身無地類窮猿之投林謬策足于詞  
場偶竄名于書局拜恩四易待次三秋訖無補于秋毫颯已垂于  
素髮加以秉性迂僻與世闊疏畱滯天都未暇三書于宰相竭來

鄉校正期一識于荊州豈徒斂版以走下風庶獲執經而趨文席  
潘令厭斗筭之役雖懷色養之違顏氏無簞瓢之憂蓋得依歸之  
所旣發藥其膏肓之疾復借重于布帛之言耳受心維日開月益  
悵遭逢之獨晚故蹇薄之是宜豈期酸寒流落之蹤曲致哀憐收  
拾之意茲蓋伏遇某官人倫標的吾道主盟立心則和而平故雖  
疏賤而接以誠意待人則輕以約于至愚陋而收其寸長不勞假  
借于先容雅欲振明于公論顧未能執筆輒獎借其藝文有意讀  
書謂博涉于墳史是欲一顧而增價端非兩喜之溢言豈獨推挽  
以脫于冗賤之中又將誘掖以堅其問學之志儻容卒業庶幾君  
子之歸固將終身以圖國士之報

回賀樞使張少師啓

伏審光膺鳳檢進秉鴻樞釋宣威疆場之勞茂洪化經綸之業中  
權增氣外境懾心恭以某官識洞古今望高夷夏忠烈貫于金石  
勳業煥乎旂常上眷素隆志渴告猷于左右外庸旣訖理難循次

以褒升用正機衡誕敷綸綍庶盡摠于遠略遂協濟于中興川陸  
非遙莫預造門之列山林待盡尚須奠枕之期慚慶贖之未馳辱  
榮緘之先貺感銘之至敷敘奚殫

賀林提學啓

竊審褒承帝渥就領使華董正師儒之聯振明庠序之教允符公  
論同極歡悰恭惟某官學極淵源文參經緯奮揚賢業光嗣家聲  
早闊步于詞林卽橫翔于英毅雍容學省夙傾衿佩之心畱滯泮  
宮久鬱搢紳之望惟義所在與時偕行果協僉言寢基鉅用星輶  
臨遣雖暫寄于行臺文陛對揚諒已膺于前席某猥緣寒陋特荷  
眷憐逃聞用之則行幾欲喜而不寐山川悠遠益睽眉宇之瞻竿  
牘敘陳難極心旌之戀靜言抃蹈實倍等夷

代賀提學孫宗博啓

茂膺宸渥出擁使華董正師儒之聯振明庠序之教涓辰視事揭  
節宣風伏惟某官學造淵微行成矩矱早飛英于藝苑遂擢秀于

詞場寢履亨塗允膺妙簡談經學省已模範于宗英將命使臺繫  
表儀于鄉秀諒令吳越之地追還鄒魯之風伫列僑功入登華貫  
某祇宣條教幸託芘輝望眉宇以非遙歧心旌而竊抃

賀王右丞啓

伏審光奉宸恩褒升右轄出聖神之獨斷符朝野之公言一札播  
聞多士交慶嘗謂經遠者實本乎器識垂後者莫大乎文章宇量  
宏深于以臨大節而不奪詞章超邁用能揚偉績之無前嘗歷攷  
其兼全蓋絕無而僅有絳侯勃能任大事特病其少文公孫弘號  
爲名儒或譏其多詐全才之士固不易得有道之時亦爲難逢間  
自負其所長輒每悲于不遇佐佑六經如韓愈未免流離度越諸  
子如揚雄終甘寂寞上方講求久逸永寧之計時乃登用協謀一  
德之人宜有卓爾不羣之才庶幾曠然大變其俗恭惟某官氣鍾  
英偉道極醇深碩學通乎九流懿德備乎三俊絕世之器識汪乎  
萬頃之波華國之文章沛然三峽之水身旣兼于數器會復際于

千年自膺密勿之知寢發經綸之蘊便蕃三接清切九遷鳳閣摛  
華復見坦明之制烏臺執法共高譽謬之風汲長孺之忠謂賁育  
不能奪董仲舒之道雖伊呂無以加亟召登于禁林繼入承于密  
命發揮典冊焜耀搢紳蔚矣邦家之光偉哉廊廟之具果由內相  
進轄中臺蓋將力振宏綱大明清論上以告嘉猷于后下以施實  
德于民若礪若舟卽正鼎司之重如綸如綍仁聞廷告之頒某江  
湖孤蹤口耳末學抗塵走俗自悲流落之餘舐筆和鉛尚泥平生  
之好比竊名于英散實借重于文衡緬懷贈袞之言妄起彈冠之  
志然而間關一命荏苒再朞謀生無負郭之資望祿有倚門之切  
自笑守株而待兔可謂迂愚念嘗披霧而覩天實爲幸會逃聞新  
命尤激懦衷雌霓連蜷故喜知音之誤辱大鈞坱圠端如播物之  
無遺恨阻川途之脩莫預門闌之慶靜言抃蹈倍越等夷

回賀知紹興府孫尚書啓

伏以聽尚書之履暫別宸廷懷太守之章復開盛府恭惟某官三

朝耆碩多士宗師學貫九流而獨探其精微文追兩漢而尤高于  
典冊蚤以人望簡于聖心直道而行柔莫甘于慕舌見幾而作後  
何悔于噬臍自詭侯藩益隆天眷教條惟舊遺愛常新入境抗旌  
擁歡迎之竹馬當亡側席行趣召于鋒車某久此周旋悵然離索  
褰裳濡足媿明哲之高風緩帶輕裘想蕃宣之樂事方深慶羨遽  
辱緘滕感悚之私敘陳罔旣

代賀應漕除直祕閣啓

伏審拜命帝宸登名冊府增寵輝于使節動榮觀于儒紳伏以某  
官稟姿粹明應變通敏洵厯光華之寄益攄經濟之才持飛輓之  
權邦儲已羨紀將明之效天眷有加膺王綍之褒崇登道山之清  
切是基持橐之選行奉賜環之榮某梓里備員久叨輝芘蘭臺寓  
直獲附英游抃喜之誠名言罔喻

回李參政啓

久嬰衰疾志在投閒忽徙便藩辭不獲命觸熱遵于遠道疾驅及

于近郊顧惟舊學之荒唐加以頽齡之晚晚千巖萬壑謾記于昔  
游十束三鍾第慙于虛受況帑廩一空之後仍邊陲多壘之時宜  
有傑才以當重寄豈伊名壤可付陳人此蓋恭遇某官惇大有容  
直方不撓暫去巖廊之邃尤傾海宇之瞻博采眾才陰借齒牙之  
論曲形高誼首勤竿牘之私獎與過情詞華溢目而某曩獲聞令  
尹之政今復玷鄭公之鄉條教具有竊詠翦棠之戒風化所繫願  
觀拔薤之規欣幸之私名言罔既

狀  
回汪相公遠迎狀

伏以四牡駢駢久涉川途之遠三台兩兩行瞻次舍之光父老駢  
迎江山改觀恭惟某官望高鼎鉉勳著旂常保佑潛藩成五龍之  
夾日贊襄清蹕竦八柱以承天久避地于炎荒實簡心于丹辰尚  
艤濟川之舟楫暫適高懷行聞鼓物之雷風亟還舊弼某曩竊依  
于陶冶茲喜奉于光塵候館已虛尚幸餼牽之未竭前旌俯屆莫

諧弩矢之先驅敢謂撝謙首勤華問感銘之切敷敘奚殫  
又回鄭侍郎遠迎狀

阻奉晤言恍迷歲月逃聞殊用大慰簪紳正從橐之清班洗沈僚  
之永歎伏惟某官才華廊廟之具器業邦家之光屹若老成表于  
朝著躋榮武部方有賴于論思將命朔庭復暫勤于行役顧衰殘  
之屏處望聲采以非遙莫遂披瞻過形問勞方際霜風之厲益調  
鼎飴之和速返旌旛上符旒辰

回知建州魏龍圖狀

魏時自饒州  
引嫌易建

輟烏臺之南榻增重蕃宣兼龍閣于西清式昭睠遇拜恩易地詠  
日下車伏以某官蘊識高明受才英敏片言悟主應龍飛天而雲  
霧來正色立朝猛虎在山而藜藿茂勉從懇請暫寄承流行即迓  
于賜環諒不容于暖席政途聯事久聞婉畫之優江國避嫌行遂  
寶鄰之託敢圖謙德先辱榮函欣感之懷敘陳罔既  
回知常州鄭右司狀

伏審輟從宰屬出領侯邦兼榮冊府之清華增重行朝之屏翰已  
頒條教第極歡悰伏惟某官學問淵深器資凝遠蚤擅搢紳之譽  
寢結冕旒之知冠豸霜臺已想聞于風采含香蘭省復詳試于猷  
爲旋升宰士之要途宜卽從臣之峻列勉從懇請暫寄蕃宣地俯  
控于江淮政資備禦人曩經于寇盜尤賴撫綏仁觀報政之成卽  
有賜環之寵某分符在遠阻修桑梓之恭視印云初竊聽矜襦之  
詠先蒙問勞第極感銘

回知常州陳檢詳狀

奉祠宮之香火病臥漳濱瞻刺史之麾幢喜依河潤塗詠何來之  
暮人爭快覩之先伏惟某官學以躬行賢由世濟踐揚要近盍登  
論思侍從之聯流落燕間允蹈用舍行藏之義比從人望暫領藩  
符斂大惠于偏州詎容淹久奉細書之一札仁有褒升茲以衰遲  
處于閒散獲併幪之託睇鷓首以非遙修桑梓之恭愧魚牋之不  
敏首蒙謙眷第極感銘

回知信州夏太博狀

衰晚投閒方養疴于畎畝聖明念舊復假寵于藩維已見吏民具  
宣條教載惟江右故號吳頭鑿馭在行尤謹上流之寄潢池未靜  
更深南顧之憂曾是疏遲莫知稱塞伏惟某官義敦久要學富多  
聞責以賤題寧論十部從事副之篇什真是五言長城旣增朽質  
之光仍託善鄰之寶庶幾黽勉少追譴訶感愧之私名言罔喻

回汪相公賀正狀

伏以王春肇序人正謹時惟國元臣受天純嘏恭惟某官厚德表  
世純誠格天早依日月之光功高弼亮晚避風波之險身遂燕閒  
茲薦祉于椒觴仁歸榮于槐鼎方圖修慶先辱飛緘感頌之誠敷  
宣罔旣

回賀九月墜日狀

伏以物華就實序極杪商月魄分中曆占旣望恭惟奉使飭躬謙  
慤秉志忠嘉順履肅霜之辰茂膺好德之福遽蒙華翰良極感悰

又伏以金風既肅民興築圃之功璧月載盈節紀降霜之候恭惟奉使天姿忠恪使節光華茂對休辰具膺遐福辱珍題之俯及仰厚德以難忘

謝土物狀

伏以暫偃旌旛獲展郊迎之禮遽頒箱篚分霑庭實之餘祇沐多儀益知厚意茲爲銘佩曷旣敷陳

又

伏以輶軒授館彌使節之光華聘幣造庭分土毛之珍厚媿無以報義不獲辭感悚之誠名言曷喻

回謝請大排狀

伏以貢珍遠屆良多衝涉之勤宴豆肆陳敢後獻酬之禮祇修薄具少奉清塵愧率爾以伸辭辱惠然而肯顧更貽尺牘彌激寸心

又

伏以航海奉琛仰使華之勞勩侯邦致館接燕語之從容特枉高軒祇慚菲具更蒙謙德曲示華緘荷意良深喻言罔旣

代越帥答高麗使副遠迎狀

伏以遠飭使航來從出日肅將貢篚入觀中天欣旌旆之俯臨辱緘滕之遽及瞻迎伊邇慰抃難名

又

伏以祇率邦彝遠輸琛賚風馳使傳俯次郊圻伫披奉于光儀遽先蒙于珍翰其爲欣抃曷旣敷宣

回賀除進大資狀

備位劇藩久慚尸素升華祕殿復玷寵光實不副名榮祇爲愧伏念某學雖泥古智昧知幾壯歲固已無聞投老安用平時僅能寡過遇事則疏曩強敵之憑陵固羣心之憂憤欲資調度訖無橫草之勞敢意褒遷叨拜出綸之寵懇辭莫獲忝冒難勝此蓋伏遇某官稟氣中和待人輕約念勸功必償名德之重故聞善陰借齒牙

之餘遂致衰遲亦叨擢序移書贊喜辱眷意之相先拜命懷慚識  
謬恩之有自其爲感激未易敷陳

回趙提點狀

聯事江湖久託提封之莛臥疴衡泌頓疏執訊之儀方深眉宇之  
懷忽奉誨函之及馳驅遠道審畫鷁之鼎來寤寐光儀欣景星之  
先覩其爲感抃罔旣敷宣

代答鎮江李尚書狀

伏審拜恩易鎮涓日開藩凡竊芘庥同增抃蹈恭惟某官學蚤窺  
于聖域望夙著于賢關親逢黼辰之知度越搢紳之右便蕃三接  
清切九遷亟登八座之榮久隆眷屢奉一麾之寄彌著休稱報  
政淮堧而莫遂借畱下車江國而已歌來暮諒履聲之旣識於環  
召以遄歸曾是衰遲久茲睽迓方結心旌之戀復欣眉宇之瞻念  
慶牘之未馳辱榮函之遽及悚佩之素敘陳曷殫  
書

代侯元功與宰執書

伏念攀附英游蚤辱金蘭之好棲遲田畝遽興露草之悲勉駐殘  
魂力伸危懼某奮身寒苦遭世盛明晚誤睿知叨陪政路奉身而  
退訖無橫草之勞尸祿旣盈已積負芒之愧更蒙起廢復俾承流  
敗材難追于人非豐屋復貽于鬼瞰乃嬰疾苦以迫衰殘瘍發枯  
顛謾勞砭劑毒乘沴氣遂逼膏肓念聖代之難逢望台閣而永隔  
懷恩莫報齋恨無窮尚勉須臾之畱以通咫尺之問伏惟某官懋  
昭賢業光輔聖時調御至和永肩許國之誼維持極治用廣格天  
之勳恩旣浹于幽明感難忘于存沒神離形瘁氣索詞窮瞻望門  
牆無任依戀之至

答晁公爲顯謨書

某頓首臨海使君子幕顯謨執事人至辱惠書一通并先公文集  
六十卷及雜論變騷等柳子厚所謂如入羣玉之府珪璋琬璜各  
有列位動心駭目喜可知也且欲求品題于固陋之一言以爲重



則執事不能無過也某童州時喜讀書綴文然絕無師承又少貧且弱不能裹糧重趼問道于四方每聞先生長者之風則服膺而心師之自東坡先生主斯文之盟則聞先公與黃魯直張文潛秦少游輩升堂入室分路揚鑣蔚乎其揚袂炳乎其相輝每文一出人快先覩某嘗窺見一二而恨不預執鞭之役也每念士生斯時獲游東坡之門如取平于衡石質疑于龜筮收名定價萬世不易借使後之君子問學詞采人物之鑒出東坡右者欲加損毫末亦不可得已況如某之固陋而強聒一言不惟不韙之罪是懼亦安所措詞哉來書乃謂揚子雲著書使不遇桓譚君山則十三篇之作遂有醬瓿之厄某竊以爲不然君子信道篤而自知明初不因人而輕重司馬子長著史記藏之名山副在京師以待後世君子而雄固有言曰世不我知無害也後世復有子雲必好之矣則子雲之書脫不遇君山其遂泯滅而無傳乎至于信道不篤而自知不明以得一人譽而喜一人毀而慍故左太沖賦三都以時人未

之重也乃欲取決于皇甫謐之一言使不幸而謐見小異遂棄十年之功于一夫之目豈不謬哉所以王筠誦郊居賦僅得其音律而沈休文拊掌矜衒以幸知音之遇亦云陋矣先公信道篤自知明者也固不假人言爲輕重少以文顯初無子雲一時之譏而有東坡器許之重閣下又欲增重于後人之一言不惟某所不敢舉世亦莫之敢也某固以爲執事不能無過也雖然厚意不可虛辱閣下所謂居上位則功業見于時在下位則文章垂于後信然君子處世必居一于斯二者矣達則行道窮則立言其志一也道行則有益于當時立言則有益于後世其爲效亦一也故達者不以功業自多而窮者不以文章自少然後安于義命而無苟免倖得之心雖然達則文章無聞窮則功業不著如日南而景北晝長而宵短天之賦與殆有定乎疑不得兼也先公名位屈于一時而文采表于萬代豈乘除之理固如是乎然閣下旣以文世其家矣方且力行先公之學而見之事業所以顯揚先公照耀不朽者夫豈

資于人哉閣下其勉之不宣某再拜  
爲外甥定婚書

合好所以繼後茲重大倫納采而復問名式嚴嘉禮占鳳鳴而協  
吉贊鴈幣以通勤伏承令姪女幼習婦規頗著言德容功之美而  
某小姪某長聞義訓粗免驕奢淫佚之邪猥緣瓜葛之餘敢卜絲  
蘿之好矧惟自出久辱深恩如母存焉固託渭陽之義非吾耦也  
敢忘齊大之嫌

代答書

事非人謀夙表刺眉之異理嫌自獻或先坦腹之求念雖擇對之  
有緣亦貴因親而曲照伏念令姪知名有自居然裴氏之甥而某  
姪女幾娘傳業無人貌是中郎之女來從萬里子爾一身得吾宅  
相之賢託此宗盟之重玉臺下聘綽著于風流荆帚贈行敢忘于  
訓戒

毘陵集卷十

毘陵集卷十一

記

福州州學釋奠記

郡縣之祀惟孔子社稷爲最重長吏親有事焉禮也福州自唐常  
公袞一變儒風多士甲于諸郡而鄉校特盛太守以二丁釋奠于  
先聖莫敢廢也自三舍行一切以法從事而禮固已輕舍法一罷  
學校僅存而禮幾廢矣繼以郊壘軍書略無竄歲春秋雖舉舊章  
取具臨時太守率委事于其次有年于茲某以紹興壬子秋九月  
叨領帥事竊歎儒冠之盛厥有來哉明年春猶有軍事有司遵故  
例而行實自愧焉旣而盜賊屏息閭里少安秋八月丁亥于是躬  
帥僚佐暨諸生執爵奉幣祇見祠下庶後之君子念風化之本原  
毋曰可緩毋憚小勞歲舉茲禮自今以始云晉陵張某記

植桂堂記

紹興十年秋毘陵蔡子戰藝于國子學捷居上游旣而試禮部不

合略不形意色益刻厲學問咨下師友以策其所未至卽居之南  
圃築爲游息之地士大夫過之則授館置醴將攷德問業以卒其  
志焉屬余名之余名以植桂圃廣數畝脩竹嘉木奇花名果分畦  
行列所植不可勝計而余獨以桂命堂何哉蓋士患無志志苟不  
奪何求而不獲蔡子朝夕堂上豈獨資燕居耳目之娛固將徜徉  
乎書林馳騁乎義路登高而放目漱流而洗心自是射策決科與  
鑷髡拾芥等耳郊生一枝可指日俟云紹興壬戌中秋日記

四老堂記

紹興十年余再承乏會稽明年春病甚求解郡章上恩賜可復領  
洞霄歸毘陵私第又明年金人尋盟歸我太母泊三梓宮于是疆  
場救寧淮浙奠枕而余以病瘁里居無復異時驚憂轉徙之患乃  
于舍西得荒瘠之地誅茅築垣結廬其中以養吾疾寄吾懷而娛  
吾老也屋纔五楹軒牖四闢飾以青黝不侈不陋隨我力之所及  
也中敞三楹以度暑東西北各爲室以御冬南有故池增植蓮芡

魚游而龜曳堂之前後雜蒔花竹鶴唳而鹿呦余旣以病謝客時  
曳杖步履徜徉其間老兄弟間來問疾則相與講衛生之經談出  
世之法醉賢人之酒而飽腐儒之餐有足樂者然地纔數畝東西  
徧迫無高山流水之勝無奇花怪石之玩無洞戶曲室絲竹歌舞  
之麗賓客寥落門庭寂然豪士貴公子往往過之而竊笑也然韓  
退之嘗云辛勤三十年以有此屋廬此屋豈爲華于我自有餘顧  
余寒士丁時多艱辛勤殆有甚焉天假之年及見中興使吾疾未  
及于沈篤俯仰笑詠于一堂之上固有餘于昌黎公矣且余四兄  
弟蒼顏華髮頽然四翁幸還里門獨季畱浙東方折簡趣其歸儻  
時會合婆娑堂上慰遲暮之餘日斯足樂已亦復何必如退之以  
鈞樞在坐爲誇耶于是名其堂爲四老時兄養正自權吏部侍郎  
以集英修撰提舉江州太平觀年六十六秦定自吏部郎中以直  
祕閣爲福建漕使待次年六十三余年六十弟師是以文林郎爲  
浙東鹽司屬官年五十八云紹興十三年歲次癸亥六月朔記

姚進道文集序

余頃客京師與姚致道遊因識其弟進道與之語詞氣倏然絕出塵垢之外若世之利害毀譽無足以動其心者余固已奇之矣及見其詩文一如其爲人一日出橐一大卷蓋日有所賦也對景遇物感懷遣興風花之朝雪月之夕贈遺唱酬操筆立成若借書于手興寄高遠句律超妙有老于文學而晝牕夜燭抽肝擢胃苦心罷精冥搜不能到者若無所賦則濡墨伸紙隨意而書亦復燦然有味其言余以爲駒龍雛鳳已具千里之駿氣五色之奇采會須跨康衢而翔煙霄未可量也未幾卒于京師年纔三十悲夫下世之後文字散落致道訪親舊間篇搜句掇得古律詩長短句與夫雜書僅成兩編特平生之什一且要余爲序其首余曰昔李長吉詩文絕出筆墨畦逕間卒年二十七杜牧之嘗曰使賀未死少加以理僕奴命騷可也進道天才何必減李協律雖奇詭驚邁差不

類而思致過之少假之年顧不下視屈宋輩耶進道撰著甚多而流傳者少又不以壽終皆與長吉合嗚呼天賦之才而嗇之壽不可致詰者古今所同也詎知進道不坐凝虛殿賦白玉樓乎進道名穀秀之華亭人

秦楚材易書序

皇帝以天縱之聖紹隆絕業英規雄斷視周漢宣光不足擬倫而勵精六學緝熙光明博綜兼該尤邃于易所以極深研幾開物成務範圍二儀之化躋登中興蓋有所自矣聖學之餘游意翰墨寶跗揮灑凌跨鍾王又非前代帝王所能跂及也敷文閣直學士秦公梓頃以布衣游太學嘗集朝士大夫共寫易書或以字畫之工或以名德之重或以位著之崇凡一百十八家自大觀迄于宣和幾二十年而書僅成然獨乾卦不輕以屬人而士大夫亦顧避莫敢下筆者久之後雖有以備數蓋歉然不滿也紹興十有三年公旣以儒學詞藻被上眷知視草禁林勸講經幄一日造膝有請上

欣然從之于是雲章奎畫鳳翥鸞迴赫赫巍巍冠于篇首羣臣盥  
手拭目傳玩嗟愕以爲四聖之書而河圖之畫眞復見于今日且  
歎公與此書皆千載之遇也日月麗天眾星滅沒羣臣筆于卷後  
者固莫能仰望清光然名列其下預有榮耀焉公欲鑿之金石以  
侈上賜而傳不朽屬爲敘引其敢以蕪陋辭某竊歎自魯壁汲冢  
之藏一出而漆書竹簡不復見于後世去古益遠學者苟媮而聖  
人之經僅出于鬻書之肆刊印射利乃與傳記小說巫醫卜祝下  
里淫邪之詞竝壽于塵閤大抵捐數千錢則巾箱五經可以立辦  
故士子于經亦褻慢不虔苟取名第則委棄藉躡黏牖覆瓿炷燈  
拭案不復顧惜蓋得之也易則用之也輕而傳之也不久凡以志  
于利而已矣公識慮超世服膺絕編心明十翼之辭神授三文之  
畫乃于窮陋未遇之時罷精悉力辦此奇事更靖康變故之後兵  
掠火毀一簪不畱而以易書自隨豈志于利者能之乎神物護持  
不至失墜卒遭遇上聖拜宸翰之寵則得之固非易矣潔靜精微

之道仰契聖學日侍燕閒啟沃贊襄措諸事業以幸海內則用之  
固不輕矣勒之琬琰墨本四出人快先觀且將什襲寶藏以爲子  
孫無窮之玩則傳之之久又可不問而知也閏四月十四日謹序  
大陽明安禪師古錄序

夫功以漸修道由頓悟漸修匪易頓悟匪難一宿九年非久非近  
昔我世尊憫佛子等厯劫漂沈周迴生死開大法門極力拯救措  
磨積習令不退轉垢盡明現始見本原猶在護持然後純熟今一  
世人無勇猛心及堅固力口耳所傳未證爲證墮落虛空無棲泊  
處又有甚者習氣未除淫慾貪嗔自謂無礙流轉苦海永無出期  
由世導師輕談空寂遂令末學迷眞逐妄不亦悲乎大陽明安延  
公禪師洞山玄孫梁山嫡子眞得佛祖所付心印事理兼融開遮  
自在機鋒覲面坐斷乾坤至其出力接引後學惟恐學人或墮邪  
見防閑譬具佛慈悲洞山以來家風不墮眞歇老人出示古錄  
一語一句具眞實法雖非卽此可以傳授亦非離此而能證明與

近世師繫風捕影疑語後學者異日道也因書篇首廣衍流布所  
期學者勿信口耳不忽所易不倦所難端的不差證無上道紹興  
癸丑六月朔旦東山居士序

雪峰慧照禪師語錄序

慧照預禪師提如來密印坐大洪山孤峰頂上轉大法輪文字性  
離言語道斷超佛越祖心如太虛至于隨緣應機接引調伏如大  
醫王對病與藥金毛哮吼百獸皆瘖建炎以來襄漢莽為盜區赤  
地千里大洪屹然其間豺虎環視垂涎而不敢犯道俗依師獲免  
者殆數千萬人夫豈偶然也哉余帥甌閩始挽師來乾元繼主雪  
峰與其弟了相後先宗風大振道價益高門人以師前後言句示  
余歎曰昔聞丹霞淳而不及識乃識其三子師蓋嫡嗣也次卽了  
住永嘉之龍翔其季覺住四明之天童一家三傑皆為東南大導  
師聞者奔趨見者厭滿所至坐下常千餘眾凡經印可便為叢林  
龍象亦盛矣哉慧炬所燭昏霾自消猶且開方便門以無說說普

度一切無弦琴上品就宮商白玉田中種成桃李卽見與聞而自  
悟入豈無其人耶紹興八年歲在戊午二月晦日序

跋

跋唐子方林夫送行詩卷

唐氏父子皆以論宰相南貶高名勁節冠映兩朝夫潞公之功名  
荆公之眷遇非異時宰相比而二公廷諍凜然不少回隱蓋亦一  
門盛事也當質肅公上疏昭陵震怒召執政示之公辯論不已樞  
密副使梁適叱下殿而辭益堅潞公遜謝不已獨畱再拜言臺臣  
言事職也願不加罪始貶春州別駕而御史中丞王舉正修起居  
注蔡襄相繼救之昭陵尋亦悔悟改英州而罷潞公且遣中使護  
送曰毋令道死不數月起監郴陽稅尋倅長沙而復召用矣嗚呼  
昭陵之聽納潞公之謝過祖宗所以致太平者可以概見也至林  
夫之論荆公于裕陵委已信任之時越班叩陛請對而極言其非  
亦難矣哉始貶潮陽別駕而荆公乃謂唐某素狂不足深責遂授

大理評事監廣州軍資庫其欲薄其罪僅似潞公而言則異矣時熙寧五年秋耆舊往往皆去朝廷莫有出力援之者卒不復召用而流落以死尤可哀也林夫之從姪遵以其送行詩謝表等編次而鑱之石既欲顯揚前哲之美且傳示來世飭稚昧于無窮則遵之居官行己必將無愧于其先云

跋劉紹先詩卷

文武之士互相舐排文人則曰兒輩挽兩石弓不如識一丁字武人則曰安天下定禍亂當用長槍大劍安事毛錐子蓋一偏論也文武雖異用皆不可不學而將不知書爲患尤大古之謀帥必以說禮敦詩爲賢此孫仲謀所以諄諄于呂蒙也劉君將種以忠勇智略世其家又能博采古名將事業而歌詠之意氣所期蓋不在古人後誠景慕力行棄所短用所長必有以自表于世劉君將赴官陝右出示詩卷要余志其後因以勉之

跋鄒舍人詩

古語有云孔子家兒不知罵曾子家兒不知踞生而見教也舍人鄒公于其子筮仕之初誨飭如此都官奉以周旋仕雖不達而清德著于家餘澤鍾其後至道鄉先生以讜言勁節冠映搢紳而子若孫皆有萬石君之家法蓋生而見之世守其訓莫敢墜失遂躋登茲念艱難以來風俗頹替父兄之教不先子弟之率不謹儻使家有此詩人識此義中興其庶幾乎

跋丁晉公詩

故龍圖閣待制唐公仕章聖朝名德顯著載在國史丁晉公乃能深知于布衣時其人物之鑒過人遠矣詩句清麗有唐人風氣晉公雖不以名節令終要其所長亦不可貶也待制曾孫遵出示所藏聯句爲題其後

跋唐誥

唐太宗收右軍蹟至三千六百紙當時士庶家藏固亦不少故唐人多能書雖小夫賤隸下筆皆有可觀豈非去魏晉不遠鍾王遺

蹟流傳尚多人人得所師承抑風俗慕尚莫敢苟作也耶武德告身殆非今世士大夫所能跂及況刀筆吏乎爲之一歎  
跋宋景晉金剛經偈  
無量河沙身須彌七寶聚布施獲福德不若信此經或書寫受持所獲更殊勝具茨老居士種無上善根游戲筆硯間成此大緣事今我得瞻觀歡喜同贊歎

跋唐千文帖

景晉所藏千文或以爲褚河南非也當是薛少保書凡闕五字曰世曰民曰秉曰治皆避唐諱則唐賢真蹟可以無疑而衡亦諱則少保避其曾祖道衡諱耳少保師褚河南又得外祖魏鄭公虞褚舊蹟刻意摹寫頗有典刑此書有膚肉差不類正書然艱難以來古蹟殆絕此書無一字剗缺當與夏璜趙璧什襲珍藏景晉乃摹刻諸石以永其傳且欲與好事者共之其賢可知  
跋趙表之所藏江氏民表帖

定力堅決故不退轉慧觀照了故不疑悔古人用能成辦大事況世間法乎至于死生去來殆猶戲事耳約臺老人將寂猶爲廣濟之民一行其出于此也歟諄諄于表之蓋爲道也

跋辛企宗所收名公帖

世人務收名公尺牘第知藏多爲榮間有非真蹟而不暇辨擇亦好事之過也此軸甚富無一紙贗誠可寶云

跋懷素帖

古人專一藝而無他好乃能名世傳後懷素正書行書非一所傳聞自謂得草書三昧殆由用志不分耳使草聖不傳天下後世豈復知有懷素也六一先生反以此譏之豈浮屠氏之學所在貶耶  
跋顏魯公帖

魯公剛正之氣凜然見于心畫之妙余平生所最嗜也晚見此帖猶天然遒勁初若無意于書而落筆自中繩尺殆非學者所能到也晉陵張子固題



跋周君舉所藏山谷帖

山谷老人謫居戎壘而家書周諄無一點悲憂憤嫉之氣視禍福寵辱如浮雲去來何繫欣戚世之淺丈夫臨小得失意色俱變一罹禍辱不怨天尤人則哀呼求免矣使見此書亦可少愧也紹興十年二月八日毘陵張某子固觀于會稽郡齋

跋歐陽文忠公帖

六一先生學識文章節概事業皆與日月爭光使尺牘不工人固藏之以爲榮而顏筋柳骨自不在古人後獨不以名世者蓋不足爲公道也世之操觚弄翰夸墨池筆冢以取名一時者其可同年而語耶

跋劉孝述司馬溫公帖

熙寧己酉春二月王荆公始參大政首定謀殺聽首之律吳興劉公孝述以御史知雜判刑部率同僚丁諷等封敕還中書至于再時論浩然歸重先司馬溫公嘗辨論幾數萬言廷臣以爲非者亦

十七八于是御史中丞呂獻可并其屬請如刑部議卒莫能奪其故謀殺人而聽首天下至今疑之秋八月公又率侍御史劉錡錢顛極論安石專肆胷臆輕易憲度驚駭物聽動搖人心以至曾公亮畏避固寵趙抃囊括依違反覆數千言又獨論中執法舉屬不拘秩任非祖宗法兼與治平手詔之意異故貶錡顛監當而劾公與諷等不奉詔之罪士大夫冤之上章救公如孫昌齡罷御史范堯夫罷修注溫公疏入不報諷等于是誣伏而公獨謂朝廷不當劾言事官卒不承乃貶知江州自獻可首以論安石得罪氣燄熏灼不變則懼矣公復毅然曾不爲身謀賢矣夫溫公時在翰林申理不獲旣造公敘別又以手帖勞之實其年九月五日也語法而意篤其端方剛毅之氣親仁樂善之誠可以概見于詞翰後六十四年公之孫嶠仲高提點福建刑獄出示此帖求志其後某念比年多故典籍殘缺國史所載世或不知幸此帖之存故樂爲天下道也溫公善隸故楷法有隸體云紹興王子除日資政殿學士左

中大夫知福州兼福建路安撫使張某子固題

跋司馬溫公趙清獻公帖

前輩至誠樂善獎勵後進不以名位自高觀文正清獻二公與鮑君手帖則後世恃才傲物矜名位以驕人者可少愧矣鮑君以掾曹受二公之知其賢于人者可不問而知也

跋了翁乞銘帖

竊觀夫請銘之書辭情曲折詳密懇到如此其誰敢辭銘字畫精勁蕭散有蘭亭典刑自應寶藏以傳不朽當不獨以名節之重文詞之工也

跋王摩詰畫

山水一變于吳道玄李將軍父子遂度越前輩至摩詰尤爲擅場張彥遠以謂人家所蓄多是右丞指揮工人布色在當時已如此則今人所藏可知矣疾風送雨圖精深秀潤未嘗設色非有胸中邱壑不能辦也所謂雲峰石色絕迹天機顧豈工人能措筆耶知

音者希真奇殆絕臨本之獲厚幣宜哉使出真蹟未必售也爲之一歎

跋章政平刺血上表乞父北還表後

士之爲親訟冤者有矣刺血之詞則未之前聞故河中使君章公孝愛天至如此事雖沮格而上章之明年丞相北歸茲豈偶然也哉曩封旣達御府後三十餘年復歸公家尤異事也其子傑出示余曰此非止手澤蓋遺體也襲藏巾笥猶懼遺逸乃龕石而瘞之先塋之側且墓搨以傳不朽念大觀間公牧吳興時余爲郡掾受公之知三復至于出涕

跋龍眠渡水羅漢

余昔于孫叔靜家見王摩詰渡水羅漢圖與此纔小異耳龍眠所作蓋有自也大士游行世間方便接物初無以異于人奚必隻履騰空一杯渡水常作如此狡獪變化以驚世駭俗哉山谷以阿羅漢具神通何至拖泥帶水如此便謂非王右丞筆然則龍眠豈效

尤者耶跋洪州西山十大士

紹興乙未歲夏六月不雨用邦人之請迎致西山十大士于黃堂日修淨供香華梵唄極崇奉虔祈之意閱半月遷奉于總持寺又半月而歸之旱勢既廣疑天數默定雖仙聖亦不能違也然始至之日將歸之夕皆微雨霑潤亦隨緣赴感聊答邦人之誠歟跋吳司諫命子名字所書

傅說躬畚築之勞一旦位廟廊之上輔成中興之業若固有之以所學素定也司諫公所期于子者學爲王者事而已矣遇不遇用不用則天也王儉乃字子以立成取仍世作相之義不亦陋乎

題後

題鎖樹諫圖後

嗚呼以僞漢僭竊割據之小國劉聰篡逆淫暴之虐主賊殺不辜如薙草芥陳元達數批逆鱗卒亦優容之至以納賢名園愧賢名

堂所謂盜亦有道也劉氏私勅停刑手疏切諫與勸撲殺此獠者亦有間矣元達安貧樂道之高人也一旦應聘而起知無不言卒亦死于非命雖昧擇木之智其忠于所事賢矣哉嘗怪士處明時事賢主履高位噤如寒蟬或至導諛以誤國視元達宜有愧豈非亂世有忠臣聖主無諫諍理固然耶紹興甲子八月望日書于建

康郡齋

題耆英圖後

某早衰多病年過半百而齒髮凋零意氣頽謝固將結廬荆溪之上而老馬上恩不貸復寘政地早夜黽勉圖報萬一而後乞身以卒區區之志而未遂也比得洛陽耆英圖想見方外蕭散之趣披翫不能去手況文富司馬公以元勳碩德領袖諸老一時勝集遂度越樂天之會嗚呼盛哉竊窺典刑歎慕之不足旣命工摹搨復手筆諸公詩于卷後以見志紹興丁巳六月上澣毘陵張某子固

題

題張表臣詩卷後

古之文士多託事寄言以發其意趣騁其詞華乃或夸而失實張公子詞采道茂師友淵源其來遠矣東坡追和淵明詩而發于夢寐樂令所謂因也耶其非寓言可知

銘  
銅雀瓦硯銘

銅雀瓦硯王氏舊物也去五十年而復歸承可毘陵張某銘之其製則甃其桓則石其澤則玉既潛而出既獲而逸既去而復神其護持不毀不墜文字之祥表于再世

贊

余舊供觀音比得蔣穎叔所傳香山成道因緣歎仰靈異因爲贊于後

大哉觀世音願力不思議化身千百億于一刹那頃香山大因緣愍念苦海眾慈悲示修證欲同到彼岸受辱不退轉是乃忍辱仙扶眼斷兩手不啻棄涕唾歛然于手眼照用無邊際至人見與執不在于手眼向來棄去時初無一毫欠乃至以于記我亦無贏餘是故將示寂還復本來相猶如大虛空雲電或風霾須臾各霽止太虛自寥廓我今仰靈蹤歡喜發洪願今生未喪世誓願永歸依更與見聞者同登無上法

畫像自贊

佩金章紫綬而躬韋布之行登金馬玉堂而有山林之想顧形槁木而心止水豈丹青所能倣也

頌

漢神魚舞河頌

并序

漢宣帝以英睿之姿勵精庶政齋居臨決登用丙魏綜核名實吏良法平民安其業滋溢滲漉百穀屢豐昆蟲闔懌熏爲太和天瑞地符若動若植應期紹至故甘露醴泉金芝嘉穀白虎威鳳黃龍神爵之祥史不絕書越神爵元年幸河東祠后土飭躬齋精祈爲

百姓東濟大河神魚出舞見于三月改元之詔嗚呼休哉竊嘗謂  
信及豚魚古人難之故魚鼈咸若紀大禹懋德之效於物魚躍稱  
文王靈德之應魚入王舟爲武王受命之符而鱉鯢鯉之盛多  
亦以誦周家治定而備禮蓋非至誠感格三靈嘉嚮則安能使潛  
淵之鱗翔洋濁流如游于濠梁而聽瓠巴之瑟也宣帝中興之業  
比迹于商宗周宣攷之于此端知其不誣是宜播之聲詩以侈盛  
德之事頌曰

物圓一形飛潛動植神者司之監觀帝德厥德惟盛天地報貺垂  
恩儲祉太平之象在漢孝宣邈隆大業輝威耀靈水慄陸讐龍荒  
朔漠奔走象譯人物昆蟲大小闔懌旣幸河東后土是祠誠昭靈  
億匪神之私乾符坤珍史不絕書飛有神爵潛有神魚鑿輿絕河  
天氣清靜非龍非螭發祥流慶囿洋洋如出禹穴頽首莘尾揚  
鬣奮鬣疾徐俯仰動于天機物得理所太和發之惟魚有生安于  
深渺動或躍淵靜或在藻豈伊濁流鼓動上下其發龍門竦踴變

化羽衛星陳弗驚弗眩具瞻龍顏喜欲鼈抃昔在庖犧河出馬圖  
神魚之祥允協皇符亦惟虞舜韶作獸舞神魚之祥克追帝矩東  
海之鰈北溟之鯢披圖攷異掩于前聞丕顯宣帝旣受帝祉改元  
之詔焜耀青史厥初武皇瑞薦郊廟詩章垂鴻詞雅義奧中宗中  
興繩其祖武時而颺之用綴樂府

祝文

奉安忠懿王廟祝文

維王生以忠勇英傑之姿撫臨一方歿以聰明正直之德廟食百  
世閩越全盛踰二百年生齒日繁衣食滋殖推原所自繫神之休  
某來帥此邦越今兩稔風雨時若兵民晏如德神之私其敢忘怠  
顧瞻廟貌頽敝弗嚴乃捐公帑命有司飭而新之以稱一方崇事  
于百世之意工旣訖事不敢不以告

上梁文

倦飛亭上梁文

伏以老馬伏櫪已無千里之心倦鳥投林惟幸一枝之託倦游居士效官三紀遇主十年再入政途屢臨藩郡易盈之器每虞富貴之危機多病之身復有煙霞之痼疾奉眞祠之香火收暮景于桑榆揚子一區足庇風雨蔣生三徑旋理林泉製東閣非曰宴賓倚南窗敢云寄傲冬延可愛之日夏迎解慍之風固將蘇病骨之支離亦復騁幽懷于眺覽小山秀發屹衡廬嵩華之奇方沼清深助渤澥江湖之趣景絕尋丈之內意超宇宙之間土木不煩工徒自力既諏辰于龜策遂趣架于虹梁聊贊歡謠且形善頌

兒郎偉拋梁東鼙鼓聲參警蹕中居士未忘憂國念吾皇十載尚行宮

兒郎偉拋梁西門去長安路已迷長願窮冬間夜柝臥看落日吐晴霓

兒郎偉拋梁南五柳陰陰翳碧潭小沼無風開曉鑑奇峰得雨上凝嵐

兒郎偉拋梁北瀕洞風塵何日息將軍有意定三關老臣願上燕然勒

兒郎偉拋梁上煦煦太虛包萬象悠然舉目送歸鴻不放纖塵礙清曠

兒郎偉拋梁下擊壤耕田陶聖化相期努力事軍須四郊幸有如雲稼

伏願上梁之後五兵漸偃萬乘言旋夷狄遂平于鳥竄邊陲永息于狼煙四海九州共慶中興之旦五風十雨長逢大有之年俾居士安山林而老矣與親朋接杯酒而欣然謝利名之奔走脫世俗之拘攣

昆陵集卷十二

祭文

祭辛中丞文

嗚呼猛獸在山惠及藜藿朝廷重輕實繫臺閣表表辛公勁節清  
 標蚤副臺端以直去朝晚從祠館拂衣高蹈屢詔不回望實彌邵  
 天子注想起公南牀念時多艱翻然來翔崇論宏議輩古遺直信  
 道而行不詭不激吾皇從善疾如轉圜虛懷聽納公亦盡言擢長  
 御史謂即大用被病乞身眷禮彌重臨漳便郡延閣清班暫煩臥  
 治跂伫言旋既歸里門告老稱篤奄即長夜百身何贖某晚守公  
 鄉始獲從公聚散存歿露電一空觴酒寓哀侑以斐詞公亦無憾  
 惟時之悲嗚呼哀哉尚饗

祭方少監文

嗚呼公家三秀定交茗川離合升沈逾三十年曩伯季氏繼踵下  
 世獨公惓然又以病廢念昔猶子贊我幕府因復見公齶齶笑語

倒指再閏計音忽聞賢人興嗟歲實在辰嗚呼哀哉孝友慈祥家以雍穆學問詞采士所傾屬越在靖康刷羽登朝螭陛蘭臺咫尺煙霄天嗇其予忽復垂翅其蓄不施老于跋扈抱疴十年衛生有經謂雖阨窮必永其齡蒼蒼不淑何奪之遽匪公是哀善者其懼某謝□里居欲弔道阻緘詞寓哀有隕如雨尚饗

祭謝參政文

維紹興四年歲次甲寅九月丁未朔八日甲寅具官張某謹以清酌庶羞之奠致祭于故衢州使君資政殿學士謝公之靈惟公學有淵源文有典則性介而通氣粹而直出入累朝騰譽赫奕晚踐政地言則裨益造次忠厚畏遠深刻網羅人材百恐遺一引疾抗章領麾均逸泉南三守綽著風績入侍經幄謂還丞弼出牧三衢會未暖席天平不淑喪我耆碩嗚呼哀哉某識公最晚傾蓋如昔同升廟堂聯巾接帟去國背面星霜再易我來于閩相望咫尺寒暄之閒每見情赤趨召經從一笑暫適歲律僅周計音在驛聲容

何許俯仰塵迹嗚呼哀哉食有干指家無四壁惟萬金產表表嗣嫡公實不亡人用慰釋我畏簡書悵望窳窳侑觴矢詞莫寫悽惻尚饗

祭范丞相文

維紹興六年歲在丙辰十二月甲午朔三日丙申具官張某謹以清酌庶羞之奠致祭于故丞相高平范公之靈建炎庚戌敵寇南渡將士辟易遠邇震怖六飛在行進退失據公猶執法入秉機務予忝西樞始與公遇同遭艱危晨惕夕慮竝扈東巡鯨波上泝明年回鑾東越是駐乾坤瘡痍海湖氛霧潰卒狂盜長驅竝驚王師單弱邦儲窘窶公時入相無喜有懼曰茲孔艱辭不敢固予亦泚升政事竊與公曰國勢如病沈痼駛藥下咽立致顛仆凡所施置勿亟勿遽補罅塞漏生息保聚拊摩飢羸洗剔緇蠹遠姦近偷以次討捕愛惜名器均節財賦詳慎精敏宏廓平恕雍容啟沃不吐不如慨念曩朝姦諛塞路爵賞猥濫衣冠垢汙爰舉舊章繩以尺



度畫一始頒貪吝竝怒翻然奉身有赫其譽予亦踰月復以病去  
公居于温脫屣世故島嶼雲水日尋杖履若將終焉儕友鷗鷺予  
帥甌粵懷絃南赴邂逅一笑置酒修具送于水濱意色疑沮解手  
背面數枉尺素後公守温上意益注謂公還朝共掖天步我歸里  
門奄忽聞訃朝餐未終驚失七筯盛德青春遽先朝露而我病瘁  
迫此頽暮益悲身世孰匪暫寓惟公之升駮襄飛兔凌厲煙霄良  
樂莫御會不朞歲正位台輔天故生之必有所付不少假年茫昧  
孰喻嗚呼哀哉某抱疴里門南北異處莫不臨棺送不及墓同朝  
之契生死慙負琢詞寓哀莫寫情愫尚饗

祭胡尚書文

維紹興十二年歲在壬戌四月甲子朔七日庚午具官張某謹以  
清酌庶羞之奠祭于故端明殿學士台州使君胡公同年兄之靈  
嗚呼昔在崇寧射策紫宸同里同年十有六人閱歲四十生存無  
幾公與孫公暨予而止遇主登朝名位略同白髮蒼顏頽然三翁

相期歸田幅巾杖屨三老往來以慰遲暮孫公居温尋復南遷尚  
仁公歸庶幾踐言天乎不淑遽喪耆碩奪我益友弔影自失嗚呼  
哀哉惟公淹貫之學典冊之文忠厚孝友表儀人倫老子從臣未  
究業蘊承明厭直把麾近屏時予守越將母經過置酒淹留抵掌  
笑歌我尋西歸音問絡繹書墨未乾訃音何亟嗚呼哀哉我雖少  
公久矣病衰公能衛生宜極期頤我衰而存公壯而逝幻影此身  
寧久于世別我逾年旃旆遄歸予心之哀公知不知有酒盈樽肴  
羞庶品寧如平生大嚼痛飲拂龜告吉歸窆有時侑觴以詞寧寫  
我悲嗚呼哀哉尚饗

祭許龍學妻趙碩人文

嗚呼清獻之德表于搢紳慶鍾其家綽有典刑猗歟夫人婉嫻靜  
淑秦晉是匹允宜右族承尊接下率禮弗違正順所格家道以肥  
舅踐政途夫持從橐炳蔚後先鸞臺龍閣名號顯榮袞袞蘭玉謂  
登期頤享有全福天乎難諶不假之年川流逝矣空華寂然某謬

領州麾稔聞懿德敢緣未契薦此薄物哀哉尚饗  
誌銘

朝奉郎陸虞仲墓誌銘

建炎三年春女直犯淮南余以史官扈屬車南渡抵錢塘亡友陸  
虞仲之子景端與其仲過余泣且請曰不肖孤奉先君子之喪至  
自京師既克葬而未有銘念先君子之友無厚于君者儻惠顧先  
君子之好施及不肖孤而賜之銘則景端死且不朽余方扈蹕行  
在未果諾明年冬待罪政府景端請益堅念余與虞仲交久且篤  
哀其生不遇而死可悲也乃以其實書之公諱韶之虞仲其字也  
世爲錢塘人曾大父滋以高行聞仁宗朝拜本州文學贈宣教郎  
大父逢休不仕父申累贈中奉大夫公幼孤鞠于大父器質嚴重  
如成人大父卒依諸父皆愛重之聰悟不凡甫冠舉進士爲榜首  
明年擢第益刻意問學時譽藉甚調復州景陵尉次蘇州常熟丞  
改宣教郎知開德府衛南縣稍厭吏役試教授中之除真定府海

州教授講說答問多自得之旨學晚益粹發爲文詞溫厚典雅試  
詞學兼茂科復首中有旨除書局官時宰相汨于勢利蔑侮寒俊  
命久不下公恬不介意亦不爲小屈或勉之則曰吾鬻技有司而  
幸中竊已媿矣天子有命寘之文字職而執政者不我與命也夫  
有直公于朝者宰相乃曰彼欲自致富貴耳久之除勅令所刪定  
官未上會減員罷遂授公大晟府按協聲律公亦無愠色或賦簡  
兮諷公公曰爲貧而仕豈曰能賢奚敢沽激爲高耶兼編集舒王  
遺文所檢討官會有詔裁罷在京冗局公斂版詣政事堂曰樂府  
有協律郎又置按協聲律冗孰甚焉宜罷後果罷通判宣州且攝  
郡事數月精明豈弟吏民愛仰之漕臣有挾宰相親黨椎剝爲姦  
利屬邑迎意風靡無敢迕者時徽州新殘蠲賦俾鄰郡輸稅以贖  
民方告病而徼偶能自辦漕臣乃檄諸郡曰已取給他州矣當以  
應輸見償且轉移之費斛追錢一千二百民益病之公率太守張  
公叔夜聞于朝宰相下其事漕司反劾奏奪一官益縱哀歛無所

惓令民租以次色輸十益六及賤估均糴追理積欠民不堪命一  
日至宣城公折之曰米之精麤斗校十許錢爾奈何欲十許錢取  
六升耶均糴本路惟以若干貫不以若干石蓋朝廷不欲多取于  
民也今斗米二百而以半價售之不太傷民矣乎積欠嘗蠲且多  
亡絕皆不可行漕臣怒誣奏公四罪寓家問中以聞得旨衝替人  
皆冤之公自謂無媿不復辯由是人益知公時相既免除太常丞  
繼擢監察御史未上以疾致仕而卒公端靖溫厚不輕愠喜人有  
過失不以挂口燕居接下未嘗妄戲笑見者必爲之正容莊語談  
經論文倫類該貫妙極理致所爲詩文以意爲主不事華靡所著  
五百餘篇遭寇亂僅存其半貧而喜施家人或難之乃曰我貧不  
愈于彼耶使我每有以予人亦復何幸至于親故婚姻喪葬不能  
辦不待請而助之坐是雖祿仕二十年家無餘貲與弟襲之友愛  
特厚妻俞氏封安人三男長卽景端次景莊次景寬景端迪功郎  
二女尚幼積官至朝奉郎賜緋衣銀魚宣和七年十一月二十七

日卒于京師年止四十六景端護喪敢于錢塘城外僧寺建炎元  
年八月陳通叛近寺皆焚而葺塗所在獨不及人皆異之以其年  
十月十六日壬申葬于南山履泰鄉之積慶原銘曰  
天旣生之而弗殖之纔予之名而復抑之宜且有年而又嗇之蒼  
蒼是非誰其識之

### 詹抃墓誌銘

政和某年鑿三山回大河復禹故道倚山爲梁調京東西河北之  
民三路騷動役至再三而功未就數百縣病之毘陵詹公成老知  
廣濟軍之定陶下車未幾適是役再舉也乃慨然歎曰吾邑小而  
貧力竭而役未已厲民以苟祿非吾志也遂拂衣而去焉于時儉  
人欺君幸寵爭立新奇之功以取勝至斷千載不可力制之大河  
使由山徑之蹊以人勝天逆理拂眾羣小靡靡和附并爲一談公  
獨以病民至于謝事嗚呼賢矣夫公諱抃成老其字也詹氏周桓  
王屬大夫家父之後曰强者仕吳爲會稽太守曰俊者唐武德中

爲雲陽令子孫家金陵至公會祖避亂始居于常遂爲常州人曾祖儀祖泌考誼皆潛德不仕考以公贈朝奉郎始朝奉饒于貲築館延客縱其子從賢士大夫游以至于貧不悔公幼警悟與兄揚俱稱鄉里號二詹王補之王平甫相繼主鄉校皆賞異之甫冠舉于開封俊譽煜然試禮部不中再舉復報罷繼丁從母內外艱不獲試于有司者十年益刻意問學以功名自期卒于五試禮部策于廷授某府助教主饒之樂平簿黃州司理用薦者升從事郎泛恩進文林郎就移衢之西安丞復用薦者改宣教郎知定陶以勞轉通直郎遂以奉議郎致仕時方年六十有六後五年而卒寔某年七月二十九日也公純孝天至每言平生惟飲酒貽吾母憂終喪因不復飲伯仲謀分異公曰先人之敝廬在其忍裂之西圃有小亭先人所游憩也幸而獲居敢以湫隘爲病伯氏許之凡別業他貲一不取由是益貧晏如也敏而強記讀書纔一過目尤遂于易方未仕也賢守令多以禮致公主學而士大夫率遣子弟從之

其收科第登禁從者甚眾最賢有聲如鄒公浩交游亦多名公卿陳公瓘俞公偉尤厚善嘗欲同薦公于朝會二公罷黜乃已公卒流落不偶以死有識所深悲也公吏事強敏案牘經目則宿姦積弊無復隱情而卒處以平恕其在樂平郡守曹宣符延致郡下事多諮決時學法峻急公權獄官有胡潤色者以傳授就逮特未嘗受賅公訊所傳義則伸紙疾書所自爲爲人者凡十篇不少畱思無一字牴牾公異之遂緩其獄卒會恩免其全護士類如此曾彥和守饒益器公遇以賓客終更率郡僚宴餞于郊門外州人榮之凡當塗賢部使者一見必改容加禮雖在州縣不知塵埃趨走之勞也其調定陶故人在要路欲稍薦用之公曰定陶事簡而俸優老而貧者幸也徑歸待次權鹽官令縣瀕海獄多鹽盜公稍寬其禁囹圄遂虛而課亦辦邑人德之旣至定陶以三山之役歸意決矣復會使者以度牒糴米數十萬公謂使者曰山東樸魯非江浙比俗不爲僧道故寺觀絕少而廣濟小壘止定陶一邑天寧一寺

而糴數與諸州等且僧牒數百將安用之使者怒語頗侵公公辯詰不少阻退又歎曰是趣吾行章旣上郡官挽留公不可曰某仕不如志祿不及養老通朝籍恩亦及泉壤矣而貧者吾所安也又將何求遂歸稍葺故居開軒名曰友陶自爲記大要謂與淵明之出處無媿云對親舊置酒盡歡不問家有無公雖不飲客必徑醉賦詩弈碁無虛日客退觀書不置家人勞苦之則曰吾對書史如見故人道舊耳不以爲病也寢疾且革處後事不亂命筆畱語如釋氏偈而絕娶邵氏封孺人賢能相其夫後公十一月亦卒子一必明性資孝謹承顏不違克盡子職故公居貧而樂女二長適具雲雲早卒女不復再適次適張宏皆舉進士孫男二惠迪允迪孫女二皆適仕族公氣韻高雅商略古今言辯而理暢音吐清越聽者忘倦詩文敏贍有思致談笑立成若借書于手至尺牘亦燦然可觀文集五十卷易書二卷語說十卷藏于家必明以宣和三年九月二十四日乙酉葬公于晉陵縣定安鄉求仲村下城之原旣

葬十一年求誌于某念從公游且久而公次壻某兄也知公爲詳敢辭銘銘曰

三山之役違天罔君吏規功利蠹國病民公獨有云吾職撫字忍毒斯民趣辦吾事挂冠神武如棄涕唾里居再閏郢唱絕和才豪氣剛噤不獲施老于下僚搢紳所悲有蔚其文有赫其名陵谷儻夷其考我銘

右通直郎曹君墓誌銘

左朝散大夫通判饒州曹璉狀其先叔父通直之行泣且訴于晉陵張某曰始璉之先伯父直講公登嘉祐進士第學行名東南後進生無遠近負笈執經履滿戶外時叔父羈州侍坐竊聽講論問答皆默識不少遺直講愛異之遂力學多聞議論有前輩風數試進士不合則刻意治生產業先大父晚致家事叔父談笑處決悉得理合衣食滋殖治居第園館延賓客無虛日公卿貴人時從之游振貧卹孤不問多寡士緩急叩門有請必悉力赴之旣去且貴

達往往不復顧念而叔父絕口不道也祕閣修撰蔣公圓爲布衣  
公兩以女妻其子樞密張公康國召與語奇之奏補假承務郎改  
官制授登仕郎宣和閒浙西置水利司部使者聞其才挽爲屬旣  
至見其謀畫乖刺拂衣徑歸後果敗事皆坐法而叔父獨不預其  
識慮過人如此不見施用以歿士大夫歎息之夷攷其行應銘而  
琿之先兄琿昔嘗爲無錫令所窘移江陰捕之先兄時以母疾迎  
醫他州琿具以訴令令遷怒併按追逮甚急賴叔營救乃免不肖  
琿報德無日矣惟是忍死乞銘于當世聞人俾叔父之實不泯若  
琿得沒于地戴面見先叔父庶乎其可也敢以死請念余與通直  
昧平生固辭琿繼來請益勤又以余族父之命鑄諭切至乃敘而  
銘之公諱礎字潤甫世居金陵上世避李氏亂徙江陰遂爲其軍  
人曾祖延訓祖維正父文雅皆隱不仕公至建炎元年以其子球  
升朝封承事郎致仕累封通直郎又以球轉官回授賜緋衣銀魚  
以紹興五年四月十七卒年七十五娶朱氏封安人先公而卒男

三人長卽球武翼郎前兩浙路都巡檢使次琿次瑤皆應進士舉  
孫九人峴嶧峒巖岱嵩岡二未名嶧預鄉貢以公喪未赴禮部試  
七月壬辰葬于縣之順化鄉黃山村從安人之域猶子琿賢業表  
于薦紳言可信不誣余旣載其語且系以詩曰  
維德有基維學有師有蘊不施天維顯思昌其本支黃山之陞納  
石琢詞萬世是詒

毘陵集卷十二

毘陵集卷十三

誌銘

左中奉大夫充祕閣修撰蔣公墓誌銘

公諱圓字粹仲蔣氏系出周公至漢左衛司馬員外郎散騎常侍  
鄭頴會稽郡子孫因家暨陽公卽其後也鄭弟山亭鄉侯澄居義  
興故禮部侍郎堂知樞密院之奇卽其後也冠冕相屬爲毘陵右  
族公會祖某祖某考某皆隱不仕考以公贈宜奉大夫母邱氏贈  
淑人初宜奉遣公就學年十五誦書史夜分不倦宜奉嘗異之謂  
淑人曰他日必大吾門恨老人不及見云宜奉臥疾侍藥糜不去  
側有爲人所不能者宜奉卽世毀不勝喪旣冠問學詞采日開月  
益雋譽藉甚邦人遣子弟師之常百數十輩毘陵故號多士凡四  
預薦書一爲舉首中元祐六年進士第調海州司理參軍治獄明  
恕當死者必求生路所全活甚衆遷潤州丹徒令有能名夏不雨  
行路多暍死公鑿井道旁九十有三人賴其惠或號蔣公泉曾丞

相布買山于邑人鄰者訟之曾爲上鄰法當得公直言之時蔡京用事怨于曾氏者不遺餘力也謂公奪民田爲曾氏葬地屬漕臣劉何劾治甚急何面詰公公恬不爲意斂版進曰與曾公無一日雅法當爾耳何怒語侵公公不少屈何卽悔悟謂州曰丹徒奉法如此吾其可誣人以徼福耶遂反薦公時人兩賢之丁內艱終喪除提舉在京外諸司文字用舉者改宣德郎知無爲軍無爲縣未赴改提舉西京北路學事司屬官知樞密院張公康國挽公爲編修官公謝曰足不登公門姓名何自聞耶張公曰知公理曾氏田不爲時相屈也修經武要略等書成賜對上問天下所以安危公曰唐李珣嘗謂文宗曰安危如人之身當四體平和必順寒暑之節恃安自忽則疾患旋生朝廷無事宜省闕失從而補之則禍難不作今承平久願陛下以珣之言爲鑒上嗟美之擢開封府刑曹時京尹苛酷少恩公約其過而濟之以寬吏民畏戢府中爲之語曰不畏府尹杖但服刑曹筆尹亦德之表公自代昭懷太后園陵

點檢頓遞橋道進官知鄂州陸辭上諭以荆湖多盜卿何以治之對曰唐崔郾嘗治鄂謂土沃民剽雜以夷俗非威莫能服臣雖能薄敢不竭犬馬力稱器使敷奏悉稱上意上謂輔臣蔣圓奏對有體議論可觀武昌今得人矣至鄂以軍食不繼洵洵幾變公慰撫之郡以無事明年辰沅溪峒黃安俊叛公以糧萬斛饒二州遣兵援之賊平被賞辭不受終更知普州未行徙知濠州淮西大旱濠爲甚公欲蠲賦其僚懼漕臣之督過也噤不敢應公獨銜以聞且乞蠲十之九會周武仲察訪淮右凡州不以旱聞者劾治之得公狀薦于朝敕書獎諭未幾徙知沂州宋江嘯聚亡命剽掠山東一路州縣大震吏多避匿公獨修戰守之備以兵扼其衝賊不得逞祈哀假道公嚙然陽應偵食盡督兵鏖擊大破之餘眾北走龜蒙閒卒投戈請降或請上其狀公曰此郡將職也何功之有焉除開封少尹輒乘驛詣闕陛見賜對上問宋江事公敷奏始末益多其才時年已七十矣贊貳浩穰智力不少衰以治辦聞被旨鞫浙寇



方臘畢賜三品服元夕從登樓上命中貴人以寶杯宣勸一府以爲榮御筆除大卿翼日拜光祿卿以疾乞補郡遂除祕閣修撰知通州復以疾辭提舉江州太平觀歲滿再任素清儉歸卽故居人不堪其湫隘公裕如也子時欲極溫清之奉稍易而新之公間與姻舊觴詠自娛終日夜無倦容子孫歲時爲壽極水陸甘毳無一日不滿意優游八年士大夫榮之靖康間聞二聖蒙塵號仆幾絕尤念太上皇眷知鬱鬱不得志疾寢革遂上章致仕嘗戒子姪曰吾疾殆不起矣歷仕四朝踰四十年以廉約自持雖無餘貲伏臘粗給慎勿嗜利玷吾清規一日跌坐屬後事訖手加額上誦佛而逝首項堅直經宿不變非了了于生死之際其能爾耶寔建炎四年七月十七日也享年八十有八積官至中奉大夫爵宜興縣開國男食邑三百戶娶扶風馬氏再娶丹陽葛氏皆有賢行先卒竝贈令子男二人時右從事郎旼將仕郎女孫女竝嫁爲士人妻孫男二人逢吉右迪功郎永吉登仕郎遺表恩及其外孫以其年

九月二十六日耐葬于安樂山宣奉之域公姿醇茂不妄語笑始居窮約時撫四女弟如其子皆擇配嫁之好學老不廢卷爲文有體要表章古今詩等二十卷藏于家後五年門人鄧旽狀公行求銘于某念頃同里黨不辭且攷其實宜銘之曰

惟得也茂惟積也厚以衍其壽以大其後

樞密院檢詳文字魯公墓誌銘

左朝奉大夫樞密院檢詳文字魯公詹卒季弟嘗狀公之出處行實治厯官壽而其尊奉議自樵李寓書南走三千里問銘于閩粵帥張某曰壽寧行負神明老失冢嗣悲不克自勝惟是詹之平生載嘗狀不誣得名世君子書之則老人死且瞑而詹不朽矣君其寵嘉之余念請之勤言之哀也敢不諾而銘諸公諱詹字巨山魯氏伯禽之後望出扶風上世徙居秀之嘉興今爲海鹽人曾祖延厚祖惟辯皆毓德隱居父壽寧始遣子宦學以公封右奉議郎致仕公幼卽警悟鄉譽熒然東書遊太學中崇寧五年進士第授將

仕郎揚州天長尉用薦者升通仕郎以勞遷文林郎移蘇州常熟丞邑事劇公攝令談笑而辦民愛吏戢豪右熱服郡人朱勗父子怙寵陵暴而禍福州縣吏于嘖笑之間眾皆媚承公獨不爲少屈延安帥趙公銓辟府儀曹以親老辭歸銓授亳州鄆合邑小訟簡治行益高七邑之訴冤獄滯訟者皆願以屬公部刺史交列其才凡十有四人故相張公商英樞密王公襄中書侯公蒙皆薦之俄丁內艱服除始改宣教郎擬知泰州海陵縣未行監裁造院提舉福建市船舶司遠朝廷而多奇貨吏鮮自潔商人亦困于侵牟公私兩敝公檢身律下一掃故習歲入倍稱會省提舉官以漕司兼之估客挽畱公遮道涕泣漕臣張穆以吏能自高亦歎公規畫之善還朝復論市舶費寡而利不貲官不可罷從之除提舉兩浙市舶尋遷福建轉運判官建炎三年金人寇浙江明年春車駕幸永嘉公慨然曰天子蒙塵旣不能捍寇難護屬車而職在轉輸宜具一日之積以佐調度乃同憲司裒一路經費之餘得銀八萬兩上

之賜詔獎諭且召赴政事堂仍賜對詔諭今秋議大舉器械未備已屬卿繕治甲冑數千儻以時辦當不次擢用公進曰陛下啟恢復之謀社稷大計也至繕治器械臣子當盡力不足煩聖慮退又白宰相曰修器甲易事耳利害有大者聞去朝廷遠守倅多罷老及自本路闕歸吏部州縣多權官苟媮蠹民皆害之大者于是得旨易守倅數人還漕司已擬官七十餘員一路便之尋上所造鎧六千聯宸筆稱善建州范汝爲反怙險跳梁官軍失利部使者多以招安爲便朝廷因遣謝嚮陸棠撫之嚮棠自謂汝爲故部曲也至則誅以美官幾幸有功卒不得要領公累言嚮棠儉人養寇滋患願別遣大將擊之旣而賊果熾嚮棠助爲聲勢脅制州縣建劔汀邵不逞輩和附蠶起卒遣大臣宣撫以神武軍討平之而嚮棠亦抵罪如公言尋以糴穀募海舟不擾而辦除直祕閣公自以才結主知益展四體修職業知無不言上軫聞盜連年詔監司牧守條安輯撫綏消弭盜賊便民利物之計公上疏其略曰盜賊滋多

由招安之非策安輯撫綏在縣令巡尉之得人便民利物乞悉罷  
行戶以至發常平粟以平穀價減上供銀以寬民力上顧謂大臣  
曰魯詹所陳皆可行于是縣令巡尉衰懦失職聽易置而免行之  
利及天下矣他悉如所請攷覈財賦未嘗加橫斂而用不乏至軍  
興或不免于率貸則約實費梟吏姦民不告病始建賊之張也朝  
廷遣貴將將萬人入邵武駐兵不敢進邀取軍須威震一路官吏  
跼踖趨命公曰本不相屬何至爾耶公事止移牒遂大失將意而  
忌公者從媒孽之既而將升制置使裒軍食益急促公至軍人爲  
危駭公卽往白事因曰朝廷倚制置辦賊而邵武餽糧未至乏絕  
今餉道梗戶知之乃責漕臣飛輓他州以取贏則某不敢愛死恐  
終非制置利耳將度不能屈改容謝之然公自是歸志浩然卒以  
親老求間除主管臨安府洞霄宮拂衣還家若將終焉未幾大臣  
有薦者上亦簡記召爲度支員外郎凡三賜對言切事機不爲甚  
高不急之論旣遷檢詳眾謂自是用矣謁告歸覲俄被疾致仕不

數日卒寔紹興三年某月日也官止左朝奉大夫春秋五十二士  
大夫識不識皆歎息至于流涕公至孝仕稍遠庭闈則不能一日  
安職以故進取泊如也淵聖登極以所賜緋魚回授其親及謁告  
而歸也曰一班一級不見其味當復旬間以終老人意耳晚學佛  
有得病劣無一語及他事忍死之言拳拳于老人可悲也已公頎  
然秀整醇白寬厚言動有法度雖與孩稚語必盡誠信端人正士  
一見則契說而儉巧貪鄙之流疾之如仇家饒于貲未始問出入  
而于公藏則稽較精詳不容毫髮欺也喜讀少陵詩以之箋釋爲  
文有理致所著詩十卷雜文二十卷奏議二卷吏役錄三卷杜詩  
傳注十八卷藏于家娶范氏故承事郎直祕閣致沖之女尚書左  
丞致虛之姪也賢能相其夫男一人可封捧公表賀上卽位命以  
官女三人一先卒二尚幼卜以三年十二月丙申葬于湖州歸安  
縣至孝鄉高峰塢余旣與公友善而余兄之子許妻公之子故得  
敘載其實而系以詞曰

才周兮德龐表粹溫兮裏方萬不試兮一出玉垂虹兮蘭芳入贊  
兮紫樞睇雲霄兮翱翔朝鳳儀兮帝庭暮鵬止兮君堂抱奇蘊兮  
弗施襲長夜之茫茫若之水兮清寫高峰之塢兮君歸坎石兮幽  
扉互千載兮騰輝

資政殿大學士左光祿大夫王公墓誌銘

紹興七年冬十月資政殿大學士左中奉大夫提舉臨安府洞霄  
宮王公以不起聞天子震悼輟視朝以左光祿大夫告第明年既  
葬其孤走毘陵奉吏部侍郎晏敦復狀號且訴于某曰先公頃同  
御史府相繼登政事堂先公平生惟夫子知之先公卽世盛德遺  
澤不絕如綫不肖孤懼弗克負荷以沒儻有詞刻諸石惟夫子銘  
之余曰嗚呼余其敢以不敏辭于是敘其世次官闕行實年壽卒  
葬而書之公諱綯字唐公系出遼西遷太原又徙河南至公之五  
世祖秦懿王審琦事藝祖以佐命功賜第京師遂爲開封人高祖  
承衍尚秦國賢肅太長主累官護國軍節度使駙馬都尉贈鄭王

諡恭肅于是爲京師甲族曾祖世融內園副使贈太子太保祖克  
存都官郎中贈太傅考發宣德郎贈太師宮師學行著稱元祐中  
應賢良方正直言極諫科有進策十卷行于世嘗上書論時政坐  
黨錮幾二十年公幼敏悟始冠游太學試藝數占前列士譽藉甚  
崇寧五年賜上舍第授將仕郎和州含山尉易襄州光化尉除辟  
廡太學錄辟廡正秩滿再任遷博士仕兩學十餘年恬于進取未  
嘗謁請權貴爲身謀士論歸重遂擢尚書禮部員外郎有吏代書  
文案爲姦利公案獲法當得賞公曰人被罪吾受賞安乎兼王府  
直講賜對徽宗曰卿德行素著宜爲人師由是宣和初皇子出閣  
必以公兼講席元年賜緋衣銀魚明年賜金紫拜國子司業遷祕  
書少監又明年爲廷試詳定官天子以得士爲喜褒詔有舉善以  
善知賢以賢之語擢起居郎試中書舍人宰相與公有舊嘗遣客  
私于公要結爲黨助公不納惟公事往見未嘗輒請閒也宰相不  
說畱掖垣四年而後遷給事中知宣和六年貢舉蔡京復用事根

排異己者公畏之上章求去天子固留乃諭京曰如郭三益王綯之賢不可去朝廷讒不得入公終不自安復力請以徽猷閣待制提舉西京嵩山崇福宮靖康中蒐用耆舊起公知壽春府及境而潰兵至公呼首領諭遣之皆俯伏叩頭去秋毫無所犯鄉民有嘯聚爲盜者逼府城聞公至相語曰給事非秦王家耶王嘗持中正節歸鎮有德于我邦今其子孫來奈何犯之一夕遁去視事三日謁廟堂出城忽復潰兵宵集城下有司請易日公不聽啟關則兵露刃立從者懼公沛然如平時叱馭而行衆有宣言者曰此雍邱王給事也揮衆就列聽命蓋公嘗居雍邱邑人識之其世德純誠馴伏強暴如此金人寇亳社壽春城惡岌岌不自保士民相邀引避公畱家城中不爲動衆恃以安今天子卽位覃恩犒軍郡帑空乏不能辦衆洶洶幾變時有經制使寄帛十萬有餘莫敢輒用公命給之衆遂定卽上章自劾朝廷置不問再除給事中自宋都扈蹕至維揚遷禮部侍郎兼權直學士院天子初詔取進士命公條

上所當行者公因論經義兼用注疏不當專王氏之說學者以爲然兼侍講拜御史中丞不務矯激亦無所阿徇近侍有超轉使額者引舊制論列時相遣客諷擊其所憎公曰中執法天子耳目可屬以私耶相惡之除工部尚書雖遷實奪之權建炎己酉歲金人渡河遠近驚懼以爲必犯行在所公率二三從臣對便殿陳迎擊退保之策得旨詣政事堂與大臣議宰相曰諸公之言三尺之童皆能及之不聽卒破淮南遂致南渡公倉卒扈駕不復至其家儲宮初建以公爲資政殿學士權太子太傅未幾元懿太子薨公惶恐上疏曰臣爲傅無狀故事當免不報卽拜中奉大夫參知政事兼御營副使蓋天子欲大用久矣移蹕建康遣大臣宣撫川陝公奏川陝重地不可專任宜求同心同德之臣協贊之雖不行士大夫以公言爲然其後大臣以專命被罪亦頗悔不以命副爲請也始上踐阼太學生陳東言事忤權臣被誅上自建康幸臨安至鎮江公言東以忠死此其鄉里也于是賜金其家而官其子退語人

曰乃知東死非上意上幸會稽韓世忠邀金人歸騎于揚子江公議遣兵與世忠夾擊雖格不行士論譴之在位幾年稍厭機務上章求罷遂除資政殿大學士提舉醴泉觀兼侍讀公雖得請上眷不衰嘗于講筵御書霖雨思賢佐丹青憶老臣之句于扇以賜公又嘗遣帶御器械辛永宗至私第宣示御製徐熙落墨梅花詩命公和進俾書于畫卷及扈蹕還臨安請外愈力上面諭曰卿潛藩舊僚豈宜遠去抗章不已改提舉臨安府洞霄宮還居會稽未幾就除知紹興府兼浙東路安撫使專務德化民不忍欺艱難以來鄉校隳圯上丁釋奠顧瞻而歎曰斯吾責也乃捐捧葺之齋館一新多士益集積次淮南軍衣絹及禁軍闕額錢糧數猥多朝廷責償甚急公度無以辦卽疏以聞且移書宰相曰寧以償次不足獲譴不欲以違詔剝下被罪也浙東地震詔求直言復申言之尋求奉祠復提舉臨安府洞霄宮徙居吳門雖閒退猶以國事爲念應詔上民間及邊防利害十數條優詔褒答曰有臣如此朕復何憂

公自登侍從至政府于時得失多所建明章旣上必焚橐故世莫得知晚喜佛書頗契宗旨寢疾家人命醫且灼艾公曰時至便行畱連無益至革不亂以十月九日薨于平江府崑山之僧舍前二日命筆書戊戌字示左右乃屬纊之日也享年六十有四爵至清源郡開國侯食邑至一千一百戶食實封一百戶娶高氏贈廣陵郡夫人再娶強氏封建康郡夫人子陔右奉議郎前通判嚴州孫男三人晞高晞會皆右承務郎晞祖未仕孫女二人尚幼以八年五月一日葬于湖州烏程縣永新鄉永定里公天資醇厚不事矜飾行己恭待人恕好賢下士與人語亶亶無倦容人一言善則手自記錄族旣眾大南渡以來往往流散失所公存撫調卹曲盡人意婚姻喪葬皆身任之官未仕者數人每以祿不洎親爲恨衣食裁取溫飽服用簡樸雖位通顯退然如寒儒處一室惟書帙縱橫無一種長物牕几蕭然不異在學校時人不堪其陋公晏如也博涉強記議論有根據屬文該贍落筆有至數千言不衰極師儒翰

墨之選人不以爲過也有內外制四十卷進讀事實五卷論語解三十卷孝經解五卷羣史編八十卷又掇取佛書密議號內典略錄一百卷藏于家銘曰  
王氏之先植德儲慶接武兩王開國秦鄭本支碩茂冠冕蟬聯篤生醇儒有光于前學以發身誠以悟主出入三朝不茹不吐晚始大用翊襄政經言必蹈義善不近名進退有餘始卒無玷鐘鼎山林孰羸孰欠俯仰一室左圖右書人或病之公則晏如忘筌佛乘脫屣世故臨絕之言不疑不怖卜宅茗溪山蒼水清勒銘弗諉萬世之靈

毘陵集卷十三

毘陵集卷十四

誌銘

徽猷閣待制贈左正議大夫陳公墓誌銘

公諱戩字冲休建州松溪人保寧軍節度掌書記傳正之孫贈奉議郎希正之子也母葉氏歸寧外祖朝議公夜夢朱衣吏道金章紫綬者入謁旦而生公少英邁不羣崇寧初貢于太學中乙科授懷州司理治獄平允郡太守賢之事多資決屬縣得盜上之州獄公察見其冤而尉挾姻黨之貴私請于公公正色曰殺無罪以希賞安乎遂釋之人益知其賢有旨跨大河繫橋以便北使公私病之守以訪公公曰兩朝通聘問百年未嘗以無橋爲病是必小人貪功幸賞然州縣論之必以爲避事也第飭有司寬期會以須必有指其失者已而兩河之民訴于朝役遂寢其料事明審如此除鞏州教授時童貫宣撫五路氣燄赫然方借寵賢德以取名然小迂意則禍辱隨之部使者薦公于貫公稱病不出或勉公一往見

以遠禍公曰內侍怙寵市權吾所切齒也忍復見其面耶朝廷聞而嘉之移處州教授未至除國子博士改宣教郎連丁內外艱終喪還朝權諸王府記室事上潛邸上踐尊極進官四等除虞部員外郎尋除監察御史車駕幸浙江前將軍范瓊捍金無功剽殘郡邑擁兵上流徘徊觀釁朝廷以爲憂公上疏請詣瓊趣使入覲從之單車至豫章徑造其壘瓊整兵列戟而後見屠剝人以懼公公神觀自若徐曰盛衰治亂何代無之漢唐亦皆中興況聖主勇智度越前代而又宵旰圖治注意將相將軍宜戮力濟難以遺澤于子孫垂名于竹帛召命之至當效郭汾陽朝聞命夕引道也瓊猶猶豫不決公復曰將軍不見苗傅劉正彥乎稱兵叛逆不旋踵而敗願將軍熟計之瓊翻然改容具朝服北嚮謝恩亟趨行闕公入對上勞問喜甚曰潛邸舊僚行擢用矣進官除戶部員外郎未幾拜太常少卿金人犯浙江扈蹕之永嘉上疏論事無所回隱其略以爲兵將用命則寡可以敵衆不用命則多適以致敗今之握兵

柄秉旄鉞非闖茸卽跋扈也國之典刑不能加之將將之威令不能施之軍宜申嚴紀律使進退左右惟命之從則敵可破也又謂守令非人或賄賂敗官或庸懦失職或貪功生事漢宣帝每拜刺史守相輒親見問有名實不相應必知其所以然唐太宗于都督刺史皆臨軒冊授後不復冊猶受命日對便殿本朝守土之臣得召見者七十有三州紹聖初節鎮守臣竝賜對外除者必先入覲而後之官願令節鎮守臣除罷皆引對上嘉納除徽猷閣待制兼侍講每入侍必從容進說嘗謂艱危之時宜循名責實以興治功論東晉之失以譏切時病所上疏無慮千百言賜告展省還朝除給事中益感激論事知無不言除授失當多所論駁士論浩然歸重時諸將握重兵有尾大之勢公論古今兵制以謂御營兵分隸諸將在某將則曰某將兵不復知有天子朝廷宜稍損益其制于是創號神武五軍始爲天子之兵矣又論齊桓晉文漢高光武皆身當矢石以集大勳願陛下躬耀神武收功馬上則將士賈勇而



醜敵知懼後上疏論五失其一謂執政尚寬厚示大體務姑息其二謂寵任將臣輕授之柄遂使冒功邀賞怙寵市恩至謂本兵大臣出其門下其三謂臺諫顧望朝廷交結權倖毛舉細務以塞責其四謂郡守監司身自犯法豈能律姦其五謂內侍之權漸盛附結將帥瀆亂紀綱恐臨安之變生于不測上歎獎其言有詔臺諫侍從陳保民弭盜遏敵生財四事公上疏其略謂省徭薄賦敦本厚生爲保民之道用光武策聽盜自相糾擿以追捕多少爲守令殿最爲弭盜之術占上流據形勢爲遏敵之策躬儉節用量入爲出斥內庫之藏以歸太府爲生財之計上納用之菽奉隆祐太后有司費出無節公上疏謂陛下念太后保佑之勞社稷之勳務極追崇而有司觀望輒因權宜菽奉而援異時園陵之制典禮失當中外竊疑他日歸祔泰陵將復用何禮耶內有都大監領以閹寺爲之而提點按行之屬復異其名外有總護使司以大臣爲之而頓遞修奉之類各設其所辟置官吏增加俸給賜予宴犒數亦不

貲至謂會稽之山無可采而欲取他山之石廂禁之卒不足用而欲調諸郡之夫竝緣爲姦騷動州縣又況梓宮僅取周身明器止用鉛錫而有司夸侈如此豈不違太后慈儉之遺訓而失陛下崇奉之本意乎由是敢宮一切鐫省論辛道宗不當除副都承旨編修官王銍不當改官又論諸將造政事堂與大臣狎昵紊亂朝綱恐緩急不爲用于是樞臣上章待罪諸將亦岌岌不自安人頗爲公危之公曰論事職也獲譴宜矣天子知公之忠公亦力請宮祠而弗之許也遂除寶文閣待制知處州慰遣加渥至則守法奉公政尚簡易吏民畏愛之時苦亢旱下車而霑足人以爲隨車雨云移守四明民遮道借畱幾不得去四明新殘屯兵防海道異時郡守畏懦姑息犒賜無度歲入不能繼而兵益驕公私憂危公至裁定多寡之數久近之節將士有過失一切以法從事于是軍政立而民始安身雖在外而政事得失密疏論之大臣頗不說而公恬不恤也久之以建州數被盜姻族散徙力勾就閒上乃移公守泉

州以便其私既至鋤姦發伏豪右惕息泉自軍興歲入不足以供軍費賦十而加五六貪吏乘時虐取而民不堪命公止收十一爲鼠雀之耗經理關市而收其贏總覈盈虛而節其費亦不至乏事會范忠肆竊松溪妻令人悸卒聞計痛悼復累章求外祠遂提舉建州武夷山冲佑觀觸熱還鄉感疾致仕卒于建州之水南僧舍乃紹興三年六月十日也享年五十三積官至左朝議大夫疾革自草遺表以聞上嗟悼贈左通奉大夫娶吳氏封令人二子鼎右承務郎次飛舉進士三女長適右承務郎監潭州南嶽廟任寶臣餘尚幼公資純孝承顏不違曲盡子職間遠去庭闈未嘗廢甘脆之奉居喪不踐戶庭赴急難賙匱乏惟恐後俸入分姻舊不爲後日毫髮計畱也人有餉予輒卻不受閨門雍睦內外無間言季兄早世撫其孤猶己子孀妹百指攜挈于官下復推貲產予之胸次曠達接人恂恂不與物忤至立朝則慷慨盡言毅然不可奪也然壽僅踰半百未究才具而齋志以歿可哀也已諸孤以五年正月

丙午葬于建安縣崇聖院之山下吳氏附焉邦人李公彥敘公爵里行實請銘余頃長御史公寔爲僚余備位二府而公又進用于時知之爲詳敢辭銘曰  
治極而溢政柄失授伊優在堂孤雄束咮皇綱失紐萬目隨弛天矯橫鶩禍越古始睿明中興蒐攬遺直寢饋龜鑑甘腴藥石矯矯陳公逮事潛藩騫翔禁途克昌其言罔避權雙忠而能力連章累牘展盡丹赤連牧三州風績有聞胡不永年究其經綸佳城同穴公安于歸惟公不忘斯銘不欺

### 太孺人時氏墓誌銘

太孺人時氏故贈承事郎嘉興陳公獻臣之妻監察御史確之母也年十八而歸聰敏絕人遇事迎解奉姑周氏恭以勤待姻族無親疏莫不滿意御下嚴而有恩婢妾慰且懷閨內肅如也經理生產業不避寒暑承事遂于醫務以藥石濟人而家事置不問姑且老于是喜曰自婦入吾門吾心泰然矣太孺人躬菲約辛苦以助

成其家然好施予雖服用物視人有欲得之色則不小靳也篋中常蕭然歸十有七年而喪姑又三十有三年而承事下世既專內外斬斬一如姑與承事無恙時晚年事付諸婦有不能決必資太孺人一言而定眾皆歎其不及遇勝日必修具命家人訪佳山水以自適諸子環侍笑語彌日不倦清尚之趣殆不類女子云御史通朝籍遇宗祀恩以紹興五年二月受封而其年十二月二十日無疾而卒享年八十有二明年正月十有七日葬于嘉興象賢鄉深葉村之原耐承事之墓子男八人長未名卒次公明公峻法昭爲浮屠氏公暘公晦公曜而確其幼也惟公暘公晦確奉大事餘皆先太孺人而卒女四人長適陸璋次吳堯佐次楊汝霖長與季亦先卒仲女早寡不再嫁孫男二十一人女十有九人已嫁者七人曾孫男十人女四人承事天資醇厚業醫而不利其貲鄉人稱長者先娶馬氏早卒壯未立嗣再娶太孺人而毓衍如此嘗謂承事曰自入君家資用粗饒羣兒戢戢他日所乏者非貨也況君以

醫活人多陰功其後必大恐不當僅仍故業承事曰是吾心也始命確從師讀書于是弱冠取科第起家而學行詞藻爲時聞人擢監察御史引疾請外提點江南東路刑獄餘皆修飭有立兄弟孝友諸孫亦彬彬知文藝族大而睦中外無間言里閭有鬪鬪者其父母必呵之曰汝不媿陳氏家兒耶太孺人素無疾歲時子孫上壽綵衣盈庭長幼序列膳羞豐甘慈顏懌舒御史亦不樂遠官多從諸昆侍左右壽祉康樂世亦鮮其比矣曾祖供備庫副使祖廉左侍禁父允不仕世爲安樂著姓父從侍禁至淮南生太孺人于真州遂爲揚子人攷其行應銘而御史頃官余里中從余守越復在幕府知之爲詳以狀請銘其可辭銘曰  
孰婦非順鮮正而義孰母非慈鮮賢而智夫人有家爲世才婦亦既有子爲世令母其德弗愆惟家之肥嶷嶷御史一鶚騫飛孫曾環旁蘭玉茂蔚旣壽而康逝不以疾惟公陰德啟其慶源卜鄰起家以成其天表于鄉閭備福全美鑿銘幽室以信彤史

宋故孺人邵氏墓誌銘

奉議郎致仕詹公成者卒之明年妻孺人邵氏亦卒既葬十有一年孤來泣且訴于余曰必明不天併失怙恃窳窳卒事久而未銘大懼先君子先夫人之事實泯絕于不肖孤之手重不肖孤之罪敢以死請余曰某從先公游且親已誌公墓矣于夫人敢辭乃爲之言曰邵氏其先吳興人乾符中右補闕安石以吳興卑墊徙常之宜興曾祖靈甫祖藏父宗回皆隱居不仕孺人鍾愛于父母不輕以予人公方英妙鄉譽藉甚貴人右族爭以女歸之公不爲意獨以邵氏女賢有聞又羣從光剛如叶相繼登進士第學行著稱因願交焉二家始平章各意滿卽以配孺人天姿靜淑入門事尊章曲盡恭順接姻族恩意周洽中外賀曰詹氏得賢婦矣歲時祭其先必親臨修具四女姪撫如己出諄諄誨以女工婦道女懷其慈以母事之識慮精敏遇事迎解公臨官有疑或謀之孺人則從容指說悉中理宜自奉菲約不喜華靡誦佛書日不輟夜諷祕咒

施餓鬼食風雨疾病不渝也數有異應自書觀音偈心念不空過五字于經行坐臥之地人初莫能曉及感微疾夜分索粥已興坐斥遣婦婢曰吾欲少憩遂枕臂側臥而逝當盛夏膚理如生異香襲人皆以爲好善奉佛之證云寔宣和三年六月十七日也享年若干一男卽必明二女適具雲張宏皆進士雲先卒孫男惠迪允迪孫女適張庭幹蔣天友孺人至孝居家事親先意順適旣歸詹氏安問一月不至則憂見顏間逮從公宦游去庭闈益遠寢食不自安髮爲盡白父母歿屏葷茹苦日常七八以終其身平生容色莊重不妄詔笑聞人之善若出諸己至過惡絕口不言救急難濟貧乏竭力弗少靳故死之日囊無餘貲必明以其年九月二十日與公合葬于晉陵縣定安鄉求仲村下城之原銘曰  
處而孝歸而正字而慈信上下睦內外具壺儀外百骸反真宅契圓機播清芬詔有永銘斯垂  
墓表

從仕郎臨安府錢塘縣令贈宣教郎朱君墓表

建炎三年冬金人犯錢塘縣令朱君死上嘉其節贈宣教郎而官其二子明年孤大廉等奉其喪葬于湖州安吉縣安福鄉之郎灣後十有三年大廉以行實狀泣訴于毘陵張某曰先君子之死節太史氏必不沒其實矣惟是葬踰一紀而無銘學行志業與夫死事之始末未及知之不肖孤夙夜是懼宜得當世聞人表于墓敢請余曰先君余友也將何以辭遂以狀證所聞而書之嗚呼金人初犯中原大將握重兵者往往聞風而靡矣州縣吏或引避或迎降無復施一矢出一語以抗者方其越天塹犯建業蹂桐川而窺臨安也君乃慨然請于郡太守曰賊逼境宜戍千秋獨松二嶺以扼其喉徐定守禦之計守嘻笑曰吾城可保吾人可戰否乎君變色曰如公言十萬戶赤子可若何或謂此成江潰卒耳非金人也願得半紙書往諭之不然當緩頰以款敵使杭民爲逃死計則某死亦其所也守媿其言許之于是檄錢塘仁和捕盜官率弓手土

軍卽日就道同僚或勸止之君曰此書生報國之日也策馬不反顧行二十里而遇敵始知爲金人猶驅部曲以進矢集如雨我兵潰君雨中流矢不能騎左右掖至天竺山而鄉民有識君者曰吾邑大夫也輿致于西溪敵人四略君裹創率里社以短兵邀擊再至再卻卒遇害寔二月十九日也嗚呼君之死可謂知所處矣君諱蹕字子美姓朱氏世爲安吉人朱氏出自曹姓顓帝之後周封其苗裔曹挾于邾爲魯附庸春秋後八世爲楚所滅子孫去邑爲朱氏世居沛國自質子禹坐黨錮誅子孫有避難丹陽者三國時故鄣人治輔吳有功封毘陵侯後徙封故鄣今安吉卽其地也至今烝嘗于安吉而朱氏爲大族君曾祖而上隱于農大父璘始起家爲池州青陽尉父南強從仕郎知越州上虞縣始高祖某有智識嘗自謂其後必大稍遣子孫宦學于是諸父從兄及從仕繼踵登進士科然皆仕不達君少有大志力學思自奮厲以亢其宗亦累舉始中政和上舍第授興國軍教授除辟廳錄出爲河東提舉

學事司主管文字三舍法罷去河南教授升從仕郎丁內艱卒喪除河東雲中府路經略安撫司準備差遣改荆湖南路轉運司主管文字易京西皆不行會金人大入京師戒嚴天子命吏部侍郎王蕃爲京畿制置使挽君寘幕府突未黔敵薄城下蕃跳襄陽坐罷君籍制置司金帛告敕等亟上之且爲蕃申理人皆賢之上卽位駐蹕維揚近臣薦其才召赴行在所除太學錄君每歎主憂臣辱之時欲效尺寸報國不樂爲校官旬使金國會遣宇文虛中報聞余爲殿中侍御史被旨撫諭京師遂挽君偕行時道梗公欣然戒途間關賊盜兵戈中相與爲存亡抵京師則金人渡大河破滑臺都城晝閉君略無悔懼意還朝復除太學正甫半月而敵騎至矣大駕南渡朝廷稍欲用之而君詣政事堂曰縣令近民類非才而民被害願得一邑自試遂除錢塘令治行有聞上自建康幸吳越呂丞相諸公薦對余因論前日撫諭屬官之勞故事當得賞有旨轉一官皆未及行而金人南渡矣死年纔五十有一紹興改元

四月壬午穿其妻史氏墓而合葬馬三娶先史氏次沈氏後賈氏四男大廉右迪功郎監衢州都稅務孝廉右修職郎鎮江府司理參軍士廉思廉皆從學三女長適右承直郎台州黃巖縣丞潘莘次右承直郎添差台州司戶金安雅次進士練紀二孫男尚幼君資孝友從事及兄疾衣不解帶嘗徒走數百里訪醫于他郡事繼母呂氏如嫡居家和訓子嚴鄉黨急難無親疏身任其事少以功名自期遭時艱難憂國如飢渴而志不少伸以死命也夫

神道碑

宋故贈太子少師劉公神道碑

資政殿學士權同知三省樞密院事劉公自贛上走使數千里狀其先宮師之行寓書于某曰珏不天逮事先君子之日淺不肖孤無以顯揚明德之懿忝以遭遇三朝躋登侍從旣又視秩二府數幸以恩追賁于九原位二品矣法得立墓隨之碑而紀實刻詞未有所託君其寵嘉之庶幾侈上恩表先懿薄不肖孤之罪敢以泣

請某竊自念宮師之歿諫議大夫陳公瓘誌其墓矣諫議一時偉  
人片言之重固已發幽光垂不朽寧復假寵于不腆之文乎敢辭  
既而請益篤不獲命則敘而書之曰公諱定國字平仲世爲湖州  
長興人曾祖文奎不仕祖承福贈太子少保父涉贈太子少傅母  
陳氏贈齊安郡夫人公幼警敏讀書綴文不煩督厲日開月益受  
詩書易于安定先生胡公瑗初名傳既壯則有安定國家之意出  
應進士科改今名一舉于開封府再舉于太學既不偶退益刻礪  
未嘗一日去書不觀自司馬遷班固范蔚宗等歷代史韓杜詩文  
皆成誦以至百家之言如醫經地志各究大指文辭雅健詩句尤  
清美所交皆名人魁士時譽翕然桐川太守胡公弼孫公覺皆以  
禮致公主鄉校後學師仰之元豐末以五試禮部策于廷泰陵初  
政大臣欲稍更熙寧元豐舍法而迎合者不計利病欲盡變乃已  
公獨極論利病因革數十條皆切于事情人稱誦之授某官調通  
判司戶參軍率職不懈歲饑郡守廩餓者公主給予檢柅吏臺拘

摩罷羸人家實惠後指公謂曰生我者父母活我者公也泰州瀕  
海歲苦旱議創函管引水公私持異議不決部使者以委公公卽  
究知利害所在置三十餘所迄今便之凡職所當爲不擇劇易也  
一時鉅公交薦其才工部侍郎賈公易尤知愛之工部在言路得  
公所條時政十事以聞時論稱善元祐五年七月感疾一日置酒  
會同僚慘然有惜別意呼子丕置珏屬後事且勉以立身大義無  
一語亂卒于官乃二十二日乙酉也享年五十有五囊無餘貲同  
僚共賻之置辭不受曰義不傷先人名明年三月甲申葬于其縣  
之尚吳鄉赭山少傅坐南百步娶嚴氏婦道母儀著聞姻黨間先  
公十年而卒始葬齊安之墓左後舉以耐公兆子男五人丕至此  
下似脫太學生贈承事郎丕早世置迪功郎主管潭州南嶽廟珏  
十數字資政殿學士朝散大夫權同知三省樞密院一女未嫁而亡孫男  
九人唐賓唐叟龜年唐俊唐牧唐稽唐舉唐任唐暨唐賓通直郎  
唐稽承務郎唐叟龜年早世孫女四人曾孫男四人曾孫女一人

珏尤以學行忠信表于搢紳出入三朝備著賢業公歿之二十六年而珏爲國子博士以郊祀恩贈宣義郎繼歷臺察郎省累贈公至通議大夫又除龍圖閣直學士贈通奉大夫除吏部尚書贈正議大夫建炎三年金人內侵天子巡吳越分百司之事于洪州置三省樞密院以總焉上親擢珏今職仍御宸翰賜之俾視二府于是贈公太子少師而嚴氏爲新興郡夫人公資孝友少傅臥病且久公方成童侍疾不解帶者踰年少傅薨號毀如成人廬墓左終其喪少傅藏書萬卷創橫經堂于家圃凡三從子弟皆肄業焉公卽堂南建善繼堂掇古賢遺事可以訓者筆于屋壁一時聞人賦詩自丞相公布而下凡三十餘篇公尚氣節人有過必面折之至其屈抑力爲伸救振卹貧匱赴人之急惟恐後友人霍孝光死京師公挈其柩以歸左班殿直李演卒于通州官下三司副使陳經之女弟歸顏氏而亡公皆爲收瘞如禮凡親故貧不能嫁娶喪葬者公身任其事力不能及則率同志助成之至其持身則廉介有

守不妄取予浮屠慧通者嘗爲鄉豪所誣幾坐法公爲直之浮屠夜攜白金謝公公驚曰我以義免汝于難何遽輒汗我耶浮屠媿謝而去每稱慕范希文義莊之美意命諸子曰他日有餘力必爲之今置珏市田給三族蓋公之志也公挾才具旣不克施用雖家居常以利物爲急邑有平遠尚吳二瀆及李氏埭湮圯不修邑多水患公率鄉黨浚築又爲石梁以便往來邑人德之號劉公橋始公兄弟起家惟仲兄早世餘皆登科季兄揮弟誼尤以學問文采顯于時公獨不遇而死然有劉公載張公舜民沈公括等哀挽之詞有陳公之碑以紀其平生而資政又以德業贊建炎之政則公之不遇而死固有以示後世矣某宣和中嘗與資政同爲御史至建炎又同爲侍從嘗歎服資政之賢而知其所自故書公之實且系以詩曰

身窘一世以仕則豐仕困下僚以德則隆旣闕其志且嗇之壽天積善慶以大厥後根植旣固枝幹茂碩是似之賢翊贊艱棘騫翔



華塗亦既顯揚累恩追榮有燿其光東宮之師登秩二品琢詞大  
隨用詔億稔

毘陵集卷十四

毘陵集卷十五

賦

小黃楊賦

余几案間有黃楊生拳石杯水間有年數矣蔚茂可愛喜而賦  
之

維黃楊之挺生表奇姿于弱植蟠霜根之數寸竦貞幹之盈尺濡  
兩掬之清泉占一拳之怪石攬以蒼翠之雕珉培以光明之碎礫  
朝假寵于陽暉夕蒙滋于露液受一氣之獨正紛眾葉之多碧已  
幸脫于泥塗靡爭妍于花實安徽分而自足貫四時而不易寘之  
函丈之間綽有山林之適明牕淨几陰敷硯席笑昌陽之瑣細與  
草芥而匹敵謂巴苴之凡陋望秋風而隕踣二物皆植水中能生故以為比傲冰  
霜之凜冽玩陰陽之消息配後彫于澗松得全生于社櫟雖蒙厄  
于閏餘初不辭于屈抑已無心于梁棟之用矣母或縱尋斧以求  
狙猿之杙也

五言古詩

方時敏倅濬歸浙江待次送行

嶷嶷玄英孫聞風自鄞川方為慈溪尉余丞揭來茗雪間王事亦

復聯相遇一傾蓋論交即忘年開口見城府落筆生雲煙尋春五

亭岸釣月雙溪船杯行各酣適箕踞忘拘牽放辭發奇偉搜句窮

鑿鑿我時怯欲降退壁常自堅俯首試外臺一矢雙鵬連聯鑣仲

與季三秀來差肩羣雋為辟易拱手不敢前折箠破大敵未足煩

戈鋌風低忽垂翅信命付諸天公飛東陽鳥我訪蘭亭賢雙魚數

流問五馬方薦延攝事古山陰晤語復粲然禪心扣空寂蔬飯捐

葷羶一洗盡玷缺皎皎尺璧圓繼從甘陵遊假道仍周旋飄零我

蓬轉渠敢自意全邂逅鳳凰關公亦仍迤邐宦學舊輩行金狨覆

文鞵以及後來秀青雲各聯翩公方駕別車去即三山顛俟期下

吳越寄跡無一廛尚及秋風殘飽膾鱸魚鮮我陋不足數生理亦

可憐爾來犯不韙策足英俊躔文羞白羽扇中豈青銅錢家風故

不惡蹇步徒加鞭迷途得蹭蹬奄奄如寒蟬別公起歸思端欲驅

其先經營一囊粟攀附嗟無緣摘耳聽知音拂拭朱絲弦一札行

亦馳兩檣定復還闊步白玉堂一揮筆如椽

貴溪道中寄信州夏蒙夫使君

薄晚雪逾密助寒風更顛長塗客衣薄僕馬僵不前緣林軫玉食

渠敢歎獨賢行喜見故人羈懷得披宣冰花散渺莽玉樹爭清妍

遙知坐歎餘鈴齋聳吟肩

再和

六花照老眼令我喜欲顛頃刻萬株玉巧趁春風前竝立聽風謠

誦言使君賢不事廚傳飾皇化憂不宜相見雖蒼顏妙語加韶妍

小邦猶射鼠安用彎黃肩

來詩過有稱譽再和

任重非所勝位高憂疾顛歸耕半頃秫榮枯付樽前來作江南牧

衰謝媿五賢郡有陳蕃范甯章丹等祠號五賢堂喜聞復故境中興頌周宣賢能不

復遺紆餘定爲妍勿笑百僚尾三署會須肩趙概爲太常博士有詩云何日肩三署終

年尾百僚蒙夫亦自奉常補外

謝孫仲益察院借示詩卷

客游跨兩春胃次飽塵滓無人抉河漢爲我一浣洗故人富清製  
放筆如翻水此間渺無津滂沛到筆底長鬚遣大軸光采照牕几  
我時食對案驚喜失筋七風雅間何闊稍復聞正始滌除塵想滅  
肝肺挹清泚早年上金閨氣摩諸彥壘風斤運無旁四座羞血指  
駸駸跨驄馬奔輪不容柅負大難爲力得坎聊復止熙辰崇盛典  
潤色待東里風雲吐憤鬱事業振奇偉餘暇賦天台金聲追祖禰  
洪慶善提刑罷官過建康惠詩和答

若人儒林秀俊聲自孩提振鬣日千里眾眼驚月題盍登要路津  
獻納蘇黔黎聊乘使者車枳棘非鸞棲戢翼下吳會客路秋風淒  
弭帆江之濱歸夢先茗谿寄傲水南北忘懷玉東西況乃味禪悅  
已知昔途迷坐笑老婆禪杖拂勞提撕祇應浩然氣中霄吐虹霓

功名儻來逼未免雲衢躋祇今寵辱際淵澄看旋鯢龍鍾秣陵守  
短髮那勝篔簹邂逅見壘壘野鶴羞凡雞言句謝筌杙未易窮端倪  
歸來見詹尹寧復問突梯

題王巖起樂齋

靜者說山林夸者慕鍾鼎人生各有適所樂滯一境王郎超世姿  
名教得深省窮通付風雨一笑萬累屏閒居祇疏水開卷味自永  
從事雖賢勞游刃失繁肯此心故休休閱世徒耿耿開軒理松菊  
畱客辨果茗得趣地自偏無塵句尤警他年觀出處廊廟卽箕穎

澄懷菴

詩中與君云云當有爲某人標識或卽連屬前題因承樂大典分韻錄載脫去

憶昨避寇亂與君連一牆別來幾寒暑杳如參與商君與喪亂際  
徜徉水雲鄉十年林下夢不到聲利場結菴劣容膝不爲大盜藏  
此懷那須澄已作冰雪涼花竹供四時飲水樂未央何當謝塵鞅  
解纓濯滄浪

嵐光臺

雲山屹長空煙水湛深渌築臺萬象表頷略在吾目凝嵐翠欲流  
澄光炯堪掬盡洗纓上塵長照杯中醪

四達亭

此亦脫去  
爲某人題

胸中浩無旁吞納九雲夢高懷有所寄亭中亦空洞涼月侵風櫺  
寒煙逼曉棟達人意有餘未許俗子共

題閭邱氏巢鳳亭以其子登科胡茂老名之

合君命卿家一經世遺子煌煌丹桂枝寂寞踰五紀竭來山水縣  
闢館貯書史竹梧森翠碧鸞鵠自停峙翩翩丹穴雛一鳴驚眾耳  
絳羽覽輝翔百鳥各披靡英姿凌雲氣玉頰編貝齒唾手取青氈  
父老爲驚喜寧無英妙年亦或拾青紫上堂拜重慶此事世無比  
勉哉尊所聞煙霄千萬里五斗暫折腰百鍊無繞指矯翼儀舜韶  
作瑞明光裏來者翫茲亭甘棠同勿毀

和曾宏甫告別兼簡幕屬

奉詔辭北闕把麾到南州向來政已拙老去語更媮條教雖屢下

創痍何時瘳猶喜豺虎息稍解聖主憂英英幕中彥紅蕖汎清流  
袖手聽婉畫藥石兼珍羞衰遲樗櫟姿萬一桑榆收吾人南豐秀  
未應仄席求飄泊乘別車惠然肯來游周旋見家規會合非人謀  
清詩日礪琢不厭枯腸搜束書赴嘉招掉臂不我留我無青玉案  
何以報所投從茲謝沮洳龍門看吞舟

秦楚材和六一先生秋懷因次韻送別

抱釁久羸疾兀若槁木枝別離故作惡未別意已悽況此清商時  
木落水潦歸艤舟話心曲未了舟欲移借問何恩恩直恐違官期  
念此登臨意何止騷人悲子行不可留子鬢殊未衰痛飲置人事  
江上鱸魚肥

客居聞鴈有感

涎涎社燕尾嚙嚙霜鴈聲兩物巧相避寸陰不得停我來燕未歸  
倏見鴈南征客游何當還節物凜可驚哀歌撫長鈇獨夜羞短檠  
念營堂上巢媿爾飛冥冥

常山神祠

籃輿破霜曉駕言郡城南雲山為好色風日仍清酣古祠據山腹  
深堂靜潭潭我來何所禱禍福久已諳頑冥亦天資乞靈謾懷慙  
同來得我輩勝處思窮探爽氣排俗慮濁醪侑清談臥碑一拂拭  
古鏡開塵函斯人已仙去寒泉獨清甘扶藜山峭崿放目窺渾涵  
前瞻羣峰翔九仙駐飛驂後俯歸路迷城郭埋煙嵐北望郡城在杏靄中平  
生邱壑姿回首不我堪歸來耿不寐青燈對書龕

姚志道有書輒不借戲呈

我來春未動兀坐秋忽老客懷飽世味塵土不容澡尚餘筆硯癖  
俯仰半華皓中年得異書夜諷或至卯爾來口生棘妙語時耳剝  
故人吾臭味囊帙富緗縹什襲祕不傳慄若壁在趙念茲訪逸遺  
從人掇殘橐何當發其藏困廩一傾倒窮途百態惡歸思疾飛鳥  
終當饋所有共此絕代寶歲晚同吟哦乘風上蓬島

七言古詩

客居坐無茵褥賓至常苦之戲作

廣文坐客寒無氊少陵人來坐馬韉胸中富等千戶侯不使囊中  
餘一錢嗟予久客貧到骨兀坐長恐藜牀穿才名未踏兩公闕窮  
愁何遽容爭先畫餅端知不餽口筆耕輒亦遭無年媿無文茵薦  
佳客促膝危坐如寒蟬君不見漢朝博士能說經五十餘席輸戴  
憑又不見袁尚索席藉凍地不意頭顱行萬里空榻蕭然亦安穩  
得失榮枯付天理金狨覆鞍容墜傷禍福由來相伏倚

題舍弟舒嘯亭

不羨高門聯甲乙欲傍林泉老蓬華田間築室路三义亭子蔭茅  
簷四出春霖竹牖上蝸牛夏夜藜牀吟蟋蟀茅亭雖小容舒嘯邱  
壑胸中故超軼晨窗晚徑足披風細柳脩篁長障日閉關已作柴  
桑趣況有腴田供種秫客來共醉甕頭春長嘯一聲百憂失遙想  
妖氛纏象魏忍見風塵侵警蹕勿學蘇門真避世要似武侯時抱  
膝我紆郡紱病且衰欲報君恩老無術簪裳未覺柴柵殊鼓吹殆

與池蛙一簿領幾回迷老眼沉復伸眉縱狂率已慙成瑨功曹諺  
空憶劉琨胡騎逸遐想東皋落成處欲往從之足雙桎夢君琢句  
俯清流春草池塘到詩律便應投絨賦歸來肯待子平婚嫁畢  
題畫

二松偃蓋勢曲拳二松竦幹凌風煙霜姿舒卷全于天笑看草木  
爭春妍杖藜誰子行蹢躅欲渡略約迴溪船令我清夢歸林泉章  
江流駛行可沿

和族叔祖古風

去年謝病辭黃屋夜夜鄉心夢相續今年罷郡理菟裘喜在家庭  
廁蘭玉阿翁年德冠吾宗時親典刑聽約束懷奇終待玉三獻世  
路不堪珠九曲愛酒惟憂北海空居貧不作揚雄逐如何疏糲肯  
淹畱不爲盤飧爲宗族忘懷一醉見天真窮達寧煩詹尹卜歸作  
長歌寫悲壯千載騷人可奴僕客星在天翁莫愁赫赫太陽升若  
木

送提刑劉嶠解印還朝二首

贈君吉水麝煤之玄玉毘陵兔穎之毛錐玄玉磨研勝點漆毛錐  
揮灑如印泥增光纏龍之大字煥發吐鳳之英詞玉旒光邊借前  
箸便好再勒中興碑

贈君西蜀衛生之藥南臺送別之詩藥驅陰邪葆貞氣詩敘平昔  
同襟期願言加餐錫難老念茲分袂送將歸時有平安寄來鴈慰  
我別後長相思

次韻范寥孟冬大閱之什

承平不用衛與英赤子頻弄潢池兵獬豸向恃七閩險彗孛欲翳  
三辰明吾皇南顧念彫瘵舊臣雖老堪一行奉詔褰帷問瘡痍一  
意摩拊無他營爾來松溪埽遺孽卒歲不聞枹鼓鳴九農豐登四  
郊靜孟冬大閱張軍聲摩天金鼓動霜曉井鉞色正參旗橫羽箭  
犀利七札薄鐵騎馳突一鳥輕是日射鐵帖頗多中的戰士人人  
逞驍雋猛將一一懷忠精吾軍如此粗可用縱有綠林何足平蜀

公之家雄洛京人物接武多名卿天涯邂逅見典刑豈止一善宜  
盱衡胸中韜鈴想餘事筆下文采嘗知名登場縱觀重感慨那得  
萬騎聽使合通和息戰固下策自古三王猶有征得君耆艾將神  
武定看卻敵賢長城

豐歲行

庚申年秋自豫章赴會稽

早禾飽熟收山場晚禾碩茂青吐芒五風十雨作豐歲一飽何以  
酬蒼蒼牛遭癘疫大半死挽犁豈誇人力強妻兒翁媪共耕鑿勤  
勞有此一稔償人言穀賤三農傷我喜不乏三軍糧邊騎長驅自  
送死卒致一怒煩君王將軍輸忠士賈勇獻俘獻捷來相望忍令  
戰士有飢色努力收斂輸太倉勿言無以飽妻子須知餓死勝兵  
死

五言律詩

晚霽獨坐戲呈周元舉劉希范許少伊同舍諸兄二首

吏散無人跡風回埽積氛虛涼簷際得遠響靜中間樹色深留暝

爐香細裊雲此閒應有句端合與君分

疾風迴急雨碧瓦散晴氛幽趣何人共微吟得自聞扶筇翻倦鳥

岸幘送歸雲病惱新涼夕孤斟負十分

出郊奉祠

薄霧林花潤微風沙水清鴻歸心共遠鷗泛眼偏明寸祿秋毫累

分陰尺璧輕滄浪端可濯藿食了餘生

題澗公看經室

澗公看經室山氣翠霏霏花雨當軒墮松雲入座飛鑿池泉繞雷

采木露沾衣欲覓三山石空慙心賞違

元舉希范見和佳篇皆有懷歸之意頗合鄙趣因次元韻

湖海關幽夢峰巒想翠氛詩囊閒事業禱衲舊知聞白簡畱任昉

玄文付子雲飛潛俱有適物理聽羣分

撫屬游君病起惠詩次韻

蛇影沈杯裏牛鳴震坐旁晦明生癘疫神物護忠良喜復神明舊

閒便日月長關心一枰上黑白已分行  
王承可惠官字韻詩次韻二首

才疏空許國老去謾爲官長病同玄晏多言媿嬾殘歸心隨贛水  
愁眼望桑乾自笑髮如鶴羞看鏡裏鸞

昔年畱建業授館厠嘉賓忝竊慙高位淹畱有故人相逢青鬢在  
誰信白頭新晚歲良田熟東阿豈謾云

獲從樞密徐公游者累月雖接名理不敢言詩念揮斤般郢之門  
古人所誚也日者惡語流傳不圖徹聽過蒙獎譽形之篇什輒

復次韻敘謝

詩壇推宿將一諾重千金長怯雷門過惟堪澤畔吟數篇真謾興  
三歎忝知音佳句如傳法慙慙慰渴心

和王巖起惠二詩

頻年分將閩那敢厭麤官花著雙眸暗霜侵兩鬢殘四郊纔罷警  
七澤忽憂乾時方關雨未報君恩重清高媿伯鸞

勝流還入幕賢否數嘉賓超婉畫無遺慮佳言更可人中郎才簡  
亮開府句清新淶水稱佳麗于今不足云

和答少伊

秋雨厭煩濁清詩靜垢氛向來佳句法不遺俗人聞少伊前和氣  
回霜簡閒心付嶺雲只應明主眷符竹未容分少伊卒章有衣袂

請補外

獨夜耿耿至旦蚤作偶書

久客迷歲月勞生念斗升寒侵風卷幔夜靜月窺燈暗穴鳴飢鼠  
晨窗上凍蠅起來看鏡嬾種種髮鬢髻

野飲途中所作

斜日明官柳飛紅綴客衣隔林鶯對語掠水燕爭飛野飲聊排悶  
羈懷得解圍言歸歸未得今昨兩俱非

胡已茂端明同年挽詞二首

孝友終身篤詞章一世英艱難扈行在憔悴老承明歸院花飄影



趨朝革履聲一磨隨逝水塵迹想平生  
道德文恭竝才猷修簡親中庸漢伯始清獻晉平春望襲高華  
身終侍從臣不諧三老約華屋總帷新  
公嘗與叔諧及余爲同年  
三老之約歸里社相從竟  
遂不

毘陵集卷十五

毘陵集卷十六  
七言律詩

送秦楚材使高麗二首

齋鹽太學鬢先秋乘興聊爲汗漫遊  
戲把漢旌行絕域不因叩竹取封侯  
波神侑飲鯨翻膾海雨催詩蜃吐樓  
不獨雞林傳好句會看弭楫上瀛洲

學士風流異域傳幾航雲海使南天  
不因名動五千里豈見文高二百年  
貢外別題求妙札錦中翻樣織新篇  
淹畱卻恨鴈行舊不得飛觴駐蹕前

送提刑劉嶠解印還朝

老懷欲別已辛酸再歲周旋瞬息閒  
誰遣暮潮催兩槳卻應清夢挂三山  
功名不許淹行色談話何時復解顏  
鴈鷺行間如借問爲言衰謝合投閒

紹興丁巳以大禮館客恩奏族叔祖有詩見戲次韻和答二首

少室山中計已成臥看朝市等蠅營對門山雪惟詩思過眼秋雲  
卽宦情長恐搢紳嘲捷徑勿緣升斗誚虛名翁看肉食顏如甲何  
似村醪一笑頰

衣冠相望兩卿家列鼎當年辦咄嗟後裔不應猶短褐除書未怕  
失丹砂恩光謾欲霑宗族品秩何勞問等差莫笑青衫同畫餅也  
勝辛苦踏槐花

送仲并倅湖州

仲時攝帥  
司機宜

佳麗江山得共遊一時賓主亦風流鳥飛魚泳青油幕虎踞龍盤  
白鷺洲坐席未温俄告別題輿催上莫淹畱苕溪尺五煙霄近入  
手功名不自由

伯恭侍郎自吳門謝事有詩和者無慮百餘人矣且命屬和不可

辭次韻

滄江洗盡眼中埃飽看江山句更裁風引前旌如挽去山迎歸棹  
欲飛來捐軀許國憂心在袖手還家笑口開應笑龍鍾豫章守沈

迷簿領日回回

次韻張輝惠詩三首

詩鄰可卜擬誅茅好句人間見一毫吟就鉢聲應未絕流傳紙價  
頓能高謬成燕雀追黃鵠已作蜻蜓避伯勞清夜月牕裁警句霜  
梧風竹助蕭騷

投老須營一把茅晚親珠玉看揮毫賦牛絕敏驚曹植刻鵠無成  
媿伯高已放閒身栖寂寞時憑佳句洗塵勞喜逢載酒經過客老  
去無心作反騷

老依背郭蔭堂茅寒夜微吟自削毫羨子筆迴霜氣勁驚人句與  
月魂高極知蹇足追隨苦便覺長鬚走送勞因識盧郎是佳器定  
能痛飲誦離騷

張子華作詩誤用事有詩訟其過因次元韻

咳唾成詩未許攀腹中應著綺千端畫蛇思巧因饒足倚馬才高  
肯駐鞍割肉固非方朔社蒸壺曾入老盧盤小瑕不揜千金璧能

事寧容俗眼看

子美以東方朔割肉為社日東坡以鄭餘慶蒸壺為盧懷慎

王承可再示次韻

為僚東越肯忘年南越相逢兩皓然杜守謬容居召後楊文那敢在王前誰能狡兔營三窟深羨神龍襲九淵便合從公下吳會濟時無術擬求田

張子華屢為唱篇有詩要余為首唱次韻謝之二首

百篇無一可譏評落紙銀鉤慕伯英足蹇向來甘後乘敵勅真合避先聲探驪君每珠先獲類鶩吾慙鵠不成十五大都須趙璧無勞鼠璞換秦城

詩名宗黨不虛傳又復春容見大篇李蔡名甘居廣下照鄰文合在楊前盤斜敢下長鯨釣引路須煩老驥先紙貴韋郎一千首不妨頻覓浣花牋

李漢老參政寄和文字韻詩次韻謝之

高誼天涯日講聞欲趨函丈畏深文佳言阻聽霏霏屑秀句欣披

藹藹雲鵲序略同慙晚遇鑾坡竝直記宵分中朝多少登龍客應擬沙隄御李君

楚材出示汪廷俊唱和詩次韻

大篇作者鬪春容肯為明時歎不逢通塞任分蝸兩角唱酬應禿兔千鋒光依日月從初載謂名在蓬瀛第幾重秦聯轡盍歸廊廟去支離容我受三鍾

丞相惠詩復次前韻二首

學道居慙邴曼容典刑今向海邊逢德容璞玉長涵潤才刃斨刀始瑩鋒養壽不憂潘鬢二趣裝行覲舜瞳重期公展盡調元手盛取勳名勒景鍾

開函三復似南容入眼清詩左右逢絕唱自應開奧窔全提誰敢觸機鋒朱弦清越宜三疊寶玉森羅富五重袖手吟邊無好句冥搜空恨五更鍾

李道士惠詩次韻二首

澤國秋霖漲渺瀰天都久客厭驅馳不辭短褐供萊戲苦憶長頭  
課楚辭悵望巾車陶靖節浪聞推轂鄭當時此身長恐儒冠誤已  
媿當年學稼遲

秋空目斷白雲飛過隙奔駒激箭馳愛日王符空著論悲秋宋玉  
謾徵辭問天擬決行藏計擇地猶難喜懼時負郭儻容供旨味窮  
年衡宇足棲遲

次川字韻

此生休問小行年合抱遺經老玉川處世長懷方外友羨君今作  
地行仙風塵京洛傷羈旅雲水江鄉渺接連歸夢但隨南鴈去嬾  
追鵬鶚上青天

再惠詩有學仙之意次前韻

紅塵飄轉任吾年羞媿丹砂葛稚川海上鼉鼉誰可駕淮南雞犬  
故能仙棄家似欲追梅福琢句何妨學惠連待爾藥爐丹就日御  
風同訪洞中天

雨中復惠詩仍次前韻

性靈陶冶賴遺篇秋水愁看灌百川索米誰憐身是客餐霞還恨  
骨非仙鳥驚急雨來還去雲敵衝風斷復連好句時時慰愁絕仰  
慙高義薄雲天

又詩有卜荆溪之意雅合鄙懷因次韻二首

短檠心醉養生篇擬築高峰看逝川野性合休林下鞅枯腸常媿  
飲中仙化羝未是左元放檄虎先煩顧少連何處羽衣從汗漫君  
山陽羨千刃水如天

心醉微言九九篇浩如滄海翕支川著書柱史家傳道辟穀畱侯  
世學仙蠹簡倦推三豕渡長弓那解兩禽連極知無用宜幽隱杜  
曲無田擬問天

被召赴經筵途中偶成

度嶺三年歎陸沈一拋城市洗塵襟雷霆激石泉聲怒煙雨埋雲  
樹色深食肉向無編貝齒憂時空有未灰心露門勸講高華地倦

鳥終當返故林

沐上小雨復霽

隄沙不起潤如酥坐看飛雲自卷舒麥隴人間牛舐犢柳陂波淺

鷺窺魚殘花糝徑東風後碧草黏天暮雨初分付榮枯蝸兩角濁

醪青杏送春餘

伯恭要賦薊林

相門耆舊典刑餘戚里豪華習氣除游徧雲山行樂耳種成香草

賦歸歟紉芳蘭晚餘幽佩辟蠹芸堂有舊書奎畫煌煌照林壑只

應門外看鋒車

次韻李丞相園亭二首

閒築池亭古刹邊厭將勳業寫凌煙柳湖寄傲王摩詰丹鼎怡神

葛稚川樂聖一樽濃琥珀平戎三尺舊龍泉一邱勿作淹畱計袞

繡歸時席夜前

疏泉斲石寄高懷仙藥名花取意栽履道醉吟齊步武平泉景物

付雲來菰蒲雨洗雙池淨松竹風傳萬壑哀怪底茅齋頻下榻故  
時賓客滿翹材

僦居城南人皆笑其陋戲作因以自解

紛紛甲第照清都誰信蝸牛亦自廬未厭囂塵聊近市不須高大

擬容車窺牀夜月陪清冷入戶風埃痛埽除豐屋從來招鬼瞰卻

因容膝得安居

題洗心亭次韻

不貲閒愁學子山此心分付水雲間臨池罷釣魚同樂隱几忘機

鶴伴間爲喜經臺依絕境故安禪榻面孱顏洪崖仙事皆陳迹戲

說遺巾笑李寰

豫章離濟江亭

擬上籃輿趁曉晴不妨小立聽江聲青山合處江疑斷野渡喧時

潮欲平雨腳又從天際起霜毛偏傍鏡邊明綠林未靜煩宵旰敢

爲龍鍾歎遠行

久客感懷

自笑行藏媿古人歸歟有意坐長貧霜毛不種自生鬢雲路無梯  
寧致身春韭秋菘聊當肉冬裘夏葛聽懸鶉何當即買扁舟去醉  
兀五湖煙雨春

夜坐觀書

青燈隻影夜迢迢賴有塵編洗鬱陶此事長慙作吏廢少功又笑  
爲儒勞行藏老驥思千里用否九牛一毛端爲鱸魚挽幽興擬  
飛煙艇破秋濤

睡起戲書呈葛魯卿席大光周舉同舍諸兄

午夢初殘日未西人情節物睡偏宜花開花落紛無定春到春歸  
謾不知香縷細縈環堵室槐陰清翳一杆棊此間粗有超然處雕  
琢天真卻坐詩

春晚卽事

風條日萼半披殘不用登臨意惘然宿麥吐芒風卷浪垂楊吹絮

暖生煙送春鶯友分明語竝水鳥雛取次眠觸眼風光渾有味人  
生行樂且加鞭

早秋書事

江城暑退葉驚秋環堵蕭蕭草樹幽埽盡塵心清似水靜看人態  
曲如鉤一樽楚醴醇無敵半榻湘波冷欲流午枕日斜呼不省夢  
魂還上五湖舟

次韻曾天猷贈知宗趙端禮展鉢詩

幾人能信見前因滿意肥甘參色身曾是鼎鍾華貴肯同瓶鉢  
苦空人招呼善友明初地降伏心魔淨六塵翻笑花間露醉客空  
看高冢臥麒麟

送德遠樞密初召赴經筵

長驅敵騎傍淮淝又是忠賢許國時扶義東吳回日轂宣威西蜀  
正參旗暫逢貝錦辭黃閣卻續金華上赤墀聯事烏臺餘病骨仰  
看麟閣寫英姿

舍弟寄和送行詩有倦游之歎因勉之

幾年頭角翳蒿萊今日寧辭盡一杯好向明時聊自試莫緣荒徑  
憶歸來白頭休歎從人後青眼多應爲汝開官長及諸司皆與余有舊老去豈  
堪頻作惡風帆目斷首空回

和人晚秋白菊

溥溥清露洗殘妝靜倚疏籬暗吐芳不逐黃花候秋節笑看殷葉  
隕風霜寒潭誰致南陽種晚徑宜登靖節堂我對冰姿麈雪唱騎  
騾無計度飛黃

游鳳池寺

鳳去池荒今幾年碧梧翠竹故依然鳴簷流水涓涓下排闥羣山  
袞袞前幸有清風繼蓮社不堪斜日近虞淵歸途滿眼春耕了勸  
課無功媿力田

友人惠猩猩毛筆一枝秃甚作詩戲之

猩毛意重鵝毛贈老不中書一悵然宜付削毫貧鄭灼政堪握筆

晉僧虔判冥卽合防拋失瘞冢寧甘便棄捐瓦硯蓬牕吾臭味秃  
翁相對且忘年

婢子翻羹

杯羹卓午薦朝餐一飽龜腸亦爾難窮鬼還來調韓愈夫人真欲  
試劉寬尚餘食案非三種早悟官亭鱠兩盤傳語廚人莫輟釜不  
應餓死悔儒冠

李似矩尚書挽詞二首

元禮清門有四龍雲孫遠跨舊家風持荷入侍聲名早仗鉞宣威  
節制雄晚歲獨拋塵鞅外高懷聊寄藥爐中堂堂玉樹埋黃壤何  
事凌煙欠此公

只今耆舊幾晨星又失三朝一老成許國忠規關社稷絕塵奇表  
照簪纓祇因鼎裏金丹就無復廷中革履聲才大故難供世用空  
餘拱木翳佳城

胡進彥挽詞

剗煩餘刃發劘刀使節藩符久謾勞腰綬六朝知壽考懸車一紀  
足清高光陰不用悲駒隙温清無違有鳳毛晚綴葭莩公已病送  
行無路首空搔

惠彥光挽詞

聲馳太學俊游先膏火窮年味絕編百戰收名丹桂籍一麾送老  
白雲邊心閒要路門無轍歲惡窮閭爨有煙全福略無毫髮恨更  
餘身後一經傳

趙約不遠千里命駕相過中道寄示三詩姑和答一篇

雪水論交今有誰兩翁華髮映朝衣功名晚晚君流落衰病栖遲  
我倦飛叔夜相思能肯顧子猷乘興卻言歸人生動是參商別三  
復清詩對落暉

七言絕句

題明皇聯鑣圖

風流誰復似三郎竝轡春風輦路香謾說宮中行樂祕畫圖千古

記興亡

戲題四老堂十首

四老堂中四老人飽經喪亂始收身蒼顏鶴髮團欒坐知是時平  
有幸民

兄弟當年七葉興精神如鶴齒如冰升沈存沒今如許且作隨堂  
粥飯僧

已是平頭六十人江湖身老寸心存明牕淨几翻經卷深炷爐香  
答主恩

一派荆溪過枕前喜從人境得幽偏直疑身在煙波上臥送飛帆  
落照邊

堂後堂前竹與梅老人多半手親栽何時更作閒花草亦遣羣芳  
次第開

四時花草逐時新袞袞年華過眼頻景物無窮人自老新花應解  
笑迎人



繫舟長傍柳隄陰曳杖時穿竹徑深  
薙草澆花課僮僕更無餘事  
可關心

多病經時不著冠岸巾長對倦雲開  
年來衰謝交游絕靖節柴門  
不用關

鶴養丹成鹿養茸羣叻對舞傍衰慵  
待看仙骨他年就同訪蓬萊  
第一峰

商嶺偷生計已疏橘中樂事亦區區  
洛陽耆舊今黃壤會有人傳  
四老圖

題荔枝亭

色味清香美莫名更憐圓樹碧亭亭  
結根得所天然勝爲對三台

第一星

上踐昨公  
首拜相

花塢

意匠潛符造物工笑談花塢出榛叢  
風條日萼隨時看須信春藏  
指掌中

桂齋

月裏移根傍小齋不惟收子看花開  
擣香篩辣歸春甕準擬高人  
勝士來

蘭室

分得騷人九畹香時人不服更幽芳  
小牕低戶維摩室萬萬奇芬  
春晝長

夢室

笑取功名指顧間歸來心與倦雲閒  
閉關不作南柯想睡起香凝  
金博山

圭沼

方銳新池臥介圭水光如玉夜騰輝  
不應只作韓侯覲更喜姬公  
著袞衣

菖蒲澗

蟠根帶石傲年芳秋雨春風拂水長  
不用引年勞服食相公勳業

似汾陽

雙蓮閣

小閣幽深枕淺波直疑湘水見英娥不將詩酒頻料理奈此風前

二妙何

和答錢文高四首

閉門不復過高軒夢蝶悠揚栩栩然睡起杖藜經略約靜看鷗鷺

浴晴川

聖髦精思媿鮑宣如如不動契金仙回觀爭奪紛華地已老吳蠶

不復眠

跡拋朝市不妨清心照空華故自明但憶滄浪時鼓枻肯從金谷

聽鳴箏

覓句高攀孟浩然藏經遠慕漢韋賢深林小隱成幽趣我得為鄰

媿子先

和答諸兄弟四首

昔向丹墀侍玉軒略無裨補髮蒼然元非食肉封侯相合抱遺經

老玉川

三州皇化未能宣山水清奇記九仙白首弟兄長挂夢喜聽夜雨

對牀眠

門對芙蓉碧沼清蕭蕭五柳似淵明遠聽林壑風鳴籟戲看兒童

草鼓箏

通塞升沈亦偶然山林高臥更稱賢似聞小築西湖上擇勝渾輸

一著先

兄弟各有別墅在瀟湖之濱

族叔祖示四絕句次韻

推頽病鶴怕乘軒歸路風帆任渺然環堵故能容兩膝掃除荒徑

老斜川

不樂從軍學仲宣那能辟穀慕飛仙直緣衰病干明主乞得南牕

一覺眠

衰懷底物能陶寫社舞村歌眼暫明誰似玉人供巧笑不勞長笛

與哀箏

追陪杖履已悠然把翫詩篇更覺賢局上頻煩問瓜葛吟邊端不敢爭先

竹亭詩和韻

直上煙霄碧玉抽靜搖月露冷光浮堂堂勁節冰霜後元老如今有壯猷

送客

南渡登舟卽水仙西垣有客思悠然因君相問爲官意不買毘陵附郭田

罷酒

罷酒尋花涉斷磯顛躋猶復強寒衣可憐醉眼無分別卻把旁邊柳折歸

人惠方竹杖

多病扶筇老自便得君方竹更輕堅平生正以方爲累擬付山僧

任削圓

題崔慤畫

風折枯荷蘆葦秋蕭蕭鷓鴣上沙洲關心滿眼江湖趣何日扁舟得自由

毘陵集卷十六

楚黃陶子麟承刻

毘陵集補遺

王孝迪中書侍郎制

朕以冲眇之身獲纂承於丕緒撫艱難之運思圖任於舊人眷時  
耆英久去廊廟肆加褒詔用協朝僉具官某進止詳華風度凝遠  
孝足以翊襄於帝載文足以潤色於王猷徧揚從橐之華入侍西  
臺之峻謀謨底績譽望映時曾未見於設施已見疑於讒間朕肇  
膺付託想見儀刑諒茲涵養之深益富經綸之蘊其還舊服伋聽  
嘉猷宰輔編年錄十三

賀天靈節表

下武繼文適逢昌運上帝立子甫屬誕辰儼圭璧以相趨舉臣鄰

而交慶

中賀

恭惟皇帝陛下功昭祖武孝格上靈三典用中普洽

好生之德五兵載戢坐收不殺之威允當華夏之心日致天人之  
助臣叨紆郡紱介處江關神色飛馳願上萬年之壽情深鼓舞實  
居百獸之先五百家播芳大全一上

賀天申節表

伏以瑞表榮河協千載一時之嘉會聲呼喬嶽罄九州四表之歡心凡託蓋容舉深抃蹈臣某中賀恭惟皇帝陛下禹功時懋湯聖日躋軫國步之多虞念時巡之淹久蓄威而待成道德之安強履順而行獲天人之佑助寢消外侮坐致中興迎二聖以回鑿置四方於奠枕必得其壽有驗於今臣叨領价藩欣逢聖馭葵藿雖晚不移傾日之心蒲柳固衰但祝後天之算播芳大上一全

賀恤刑表

秉籙御天屬聖神之在運對時育物均雨露以布慈翳畏景之方隆閔祥刑之未措上嬰宸慮渙發詔音邈及遠方一清幽圜中賀竊以泣辜流念見大禹之至仁扇暘軫懷仰周文之懿範欽惟前躅垂裕後王於皇本朝比跡振古恭惟皇帝陛下堯仁冒遠舜智燭幽欲躋羣物于太和不忍一夫之失所故雷號風令期四海于無刑玉律金科庶有生之難犯蠢茲未革尚干有司惟深惻於炎

歎重自罹于囚繫或匪惟良之吏必興慘獄之嗟特頒細札之丁寧痛喻守臣以欽恤臣敢不俯勤夙夜仰副哀矜播厥官僚謹茲訟獄職惟宣化躬佩服于訓詞國無冤民庶導迎於善氣播芳大上一全

賀九鼎成表

王春啟節陽德布和粲仙掖以凝輝絢龍文而發彩歡彌海宇喜溢民心中賀竊以文鼎出于山川甘露零于草木而前王以為盛事儒臣載于信書以彰不世之珍符以示無前之偉烈未見聖謨獨運寶器載成天鑿潛通殊祥降有如今日覓絕前聞恭惟皇帝陛下大明燭于萬方麗澤洽于四海嘉生繁植協氣薰蒸顯當天地之心密契神明之德故得九牧之金制器五色之瑞騰文神物護持豈止黃雲之下覆靈仙降格且瞻白鶴之來翔光播無窮允昭至治某邈居江介叨領郡章職在承流恭布十行之詔心存將美欣逢千載之期同上

謝除資政殿大學士表

心勞政拙宜在譴訶德厚恩深猥叨擢序采居官之薄效升祕殿  
之隆名薦控忱辭莫回聰聽終覲顏於虛受但刻骨以知歸中謝  
竊以學士之有大名儒臣之最高選景德創制示舊弼之殊榮康  
定限員見先朝之慎簡如臣質衰蒲柳景迫桑榆無牧民御眾之  
才第知不擾有愛君憂國之意其實甚疏蔑然橫草之勞行矣及  
瓜而代曩聞警急莫效馳驅虜在目中料敵愧伏波之略錢流地  
上理財謝劉晏之謀僅知謹于官常期不違于德意敢圖簡眷遽  
沐褒遷茲蓋伏遇皇帝陛下勵精以圖中興廣覽以收眾智謂蠻  
夷未免于猾夏每勤勸功故名器有時而假人靡嫌從欲遂令鴛  
劣亦玷龍光仰睿訓之過優體聖心之所屬循名責實未知塵露  
之酌居寵思危第謹淵冰之戒無任播芳大  
全四上

謝轉官表

紀十年塵腐之微勞申加訓諭增三節清華之峻秩莫獲固辭登  
受以還懷慙罔措臣中謝伏念臣名浮于實用過所長氣既衰而

當戒得之時位已高而有病顛之懼居懷退抑祈免悔尤況律令  
三尺安出哉率祖宗坦明之制所損益百世可知也實寮吏纂修  
之勤自惟罔功何有于賞敢謂制祿之書來上策勛之典遂行例  
辱進官之榮曲憐承乏之舊此蓋伏遇皇帝陛下以上聖之質啟  
中興之圖孝通神明坐復靈人之疆土恩被動植灼知臣下之勤  
勞既講信修睦以和諸戎故任賢使能以成其政口雖微而必錄  
功益久而不忘致令不才叨此非據匪言揚而事舉已虞竊位之  
譏顧政拙而心勞未識報恩之所播芳大  
全六上

謝獎諭表

臣某言近者本路諸處盜羣相繼平殄緣久勤聖慮略具奏知今  
月初三日伏蒙詔書獎諭者四郊多壘盡陶肅勺之和一札成文  
誤被絲綸之寵吏民改觀山水增輝臣中謝竊以盜起貧窮故詩  
人詠盈止而後寧止治貴清淨故循吏謂勝之不若安之矧惟江  
西稍遠闕下狃囂訟之習而稔熟其兵甲遭焚掠之暴而墮廢其

田廬蟻聚蜂屯既結而不散草薶羣獮垂盡而復生上軫九重之  
憂尤艱一路之寄如臣本無術略加以衰遲親承訓勅之音恭布  
寬大之詔人非木石固知懷德以歸心雖有豺狼亦或畏威而革  
面至於遣戍兵而督捕殲首惡以示懲政以罔悛殆非得已故稍  
戢弄兵之俗汔可小康未能臻奠枕之期曠然大變心既寬于憂  
顧跡頗類于言功乃蒙旌闕制之微勞降璽書而褒諭人所助者  
信也實由聖德之誕敷臣何力之有焉從愧恩言之重渥此蓋伏  
遇皇帝陛下懋湯大德達舜四聰孝通神明外默孚于強敵化行  
江漢內自格于羣偷欲獎勵于庶工故推揚于一善臣敢不仰體  
勸功之意銘深厚之訓詞俯思善後之方息愁歎于田里庶幾晚  
節不辱睿知播芳大

謝詔書獎諭表

全六下

瞽言冒獻瀆已懼于再三聰聽兼容慮不遺于千一肆頒溫詔俯  
賁寒蹤稽首拜恩銘心戴德中謝伏以凶雛狂悖挾虜騎以長驅

睿主憂勤正戎車而夙駕天威臨赫士氣賈餘紛萬里以爭先裒  
羣策而並用臣頃陪帷幄久備藩垣衰遲蒲柳之姿蹇淺芻蕘之  
論初非言責祝敢意于代庖竊歎時危嫠靡遑于恤緯輒披幅  
少助詢謀敢謂仰契廟謨特形天獎煥發絲綸之重慰增簪履之  
榮此蓋伏遇皇帝陛下文即康功湯昭聖武陳師鞠旅捷書屢上  
於甘泉舍已從人訪問每勞於衢室猥加勞勉誤及庸愚一札十  
行不替始終之遇四郊多壘可通遐邇之情臣敢不味深厚之訓  
詞體蓋容之大德老當益壯示九隕以爲酬知無不言庶萬分之  
或補上同

謝傳宣撫問表

下車問俗始欲布於寬條乘駟經途遽口頒於溫詔拜恩稽首懷  
感銘心臣中謝伏念臣向蒙特達之知久玷高華之選大恩未報  
已迫衰殘睿眷有加曲垂簡記復畀上流之重寄敢辭行路之難  
修念違睟穆之容未踰月律亟賁坦明之訓就遣星軺式慰羈孤

益隆禮貌此蓋伏遇皇帝陛下廓漢高之大度推光武之赤心雨露所濡天何心于遠近絲綸之出人自改于觀瞻仰恃寵臨庶逃罪戾儻少收于薄效敢自愛于餘生上同

謝傳宣撫問賜藥表

膚使寵辭載華原隰寶匱珍劑加賁邱園臣中謝伏念臣少出衡

茅晚陪帷幄德輻寄重才淺知深但念里居長負邱山之責敢期

宸眷尚畱簪履之矜此蓋伏遇皇帝陛下天幬無疆海涵不棄戴

難忘之盛德豈特銘肌拊易盡之餘生唯當結草上同

謝賜詔藥物表

輟宮闈親近之臣臨湖海寬閒之野投之藥物拊以訓詞尸厚祿

而無勞謂當誅絕捐大恩而不報彌所兢慙臣中謝伏念臣出本

羈單自甘淪棄晚由朴學上誤聖知智曾昧于保身忠每懷于許

國讒誣甚巧竊憂解免之難危拙更安特荷眷憐之至況遠跡久

孤之地實邇言易簡之時而離明昭晰于隱微解澤頻煩于疏逖

此蓋伏遇皇帝陛下以大仁含垢以大智容愚勿使南箕得侈簸揚之狀更令北戶坐蒙臨照之光藹然垂盡之病軀沲若橫流之感涕惟困窮無理猶致命于一餐顧冒昧不貲敢忘懷于九死上同謝傳宣撫問賜藥表

臣某年十二月五日伏蒙聖恩差入內侍省高班主管合同憑由

司王錫到府傳宣撫問並賜臣銀合臘茶香藥臨遣星輶速若置

郵而傳命俯頒險劑威無咫尺之違顏登受以還兢榮自失中謝

伏念臣叨分近輔莫著微勞頽齡浸迫于西山况嬰衰疾短景適

臨于北陸尤苦祁寒是資服食之良以禦晦明之沴豈藹然之枉

質特簡在于清衷既賁温言復加珍賜尚方修製靈于紫府之丹

御寶緘封貯以白銀之器王人俯洎父老歡迎此蓋伏遇皇帝陛

下居上克明使人以禮俾盡股肱之力克全體貌之誠念臣頃參

帷幄之疇義同休戚憐臣密備藩垣之寄眾所觀瞻特假寵靈以

榮觀聽起漳濱之沈瘵指日以須存魏闕之精誠戴天知感誓圖



九殞仰報萬分同上

謝獎諭表

遵奉聖謨繕修戎備載紆睿獎增激懦衷中謝竊以朔方奧區天

下重地神考講安邊之策盡古今之所長聖朝廣嗣武之聲兼細

大而畢舉惟是城守之具未完萃聚之功親喻德音往圖偉績遂

一新于戎器益坐震于天威實惟聖制之修明亟獲事功之建立

顧慙迂拙誤占寵褒此蓋伏遇皇帝陛下天運沈機日昭獨智務

講兵家之上策以究聖人之極功兼錄微勞用勸羣吏臣敢不勉

驅驚蹇圖稱使令定止山川荐克就緒惟茲一道方促奏功斯仰

體于顧懷誓永堅於晚節同上

謝賜戒石銘表

陛屺勒銘夙仰祖宗之猷訓輶軒傳詔載新郡邑之觀瞻踞受以

還兢榮罔喻中謝恭惟太宗皇帝削除僭偽統一寰區屬四方新

脫於干戈期百執恪遵於軌度肆頒聖製用謹官箴炳若丹青揭

訟庭而咸覩寫之琬琰垂永世之不渝吏有勸懲人亦康乂閱歲

華之滋久致睿藻之弗宣有懷在位之苟媮深軫斯民之困敝得

故人之遺墨見世口之宏規爰廣勤宣親加贊述大書深刻燦然

盤鼎之文俯翫仰思竦若韋弦之佩此蓋伏遇皇帝陛下寬仁厚

下勤儉保邦率由舊章紹復大業何必官刑之儆自然民瘼之除

紫詔相輝陋漢王之一札黃堂增煥配章聖之七條臣久遠清光

猥叨重寄湯然拜賜曾無咫尺之違顏何以酌恩尚勉期年之報

政播芳大

賀李參政啟

伏審顯奉制函榮躋政路正人登用固知道之將行善類傳聞殆

欲喜而不寐恭惟慶慰伏以參政議高而慮深學博而造微納忠

不暇于謀身嫉惡蓋由于稟性鑪錘烈燄莫摧百鍊之剛雪霜沍

寒不改後凋之操堂堂侍從之老赫赫蕃宣之勳凜難進之高風

蔚具瞻之輿論公道既闢天意乃回用汲黯于漢庭淮南自定見

夷吾于晉世江左何憂究觀宏規灼見興運唯是上尊隆于王德  
下博采于真才內銷姦欺朋比之餘外戢跋扈飛揚之漸裁抑奔  
競督責苟媮凡此數條諒關深念某支離病骨臃腫弁才謬託交  
承之私終慮責任之重蒙成矩矱固無假于施爲伏老江湖政有  
資于造化餘寒未艾機務方繁益調茵鼎之宜任正鈞衡之任區  
區欣頌實倍等夷播芳大  
全九

賀席參政啟

仰膺綸制入秉政機槐位久虛蓋簡求于宿望巖瞻既峻實大穆  
于師言欣圖任之得人知治安之有日竊以車駕自南巡之後廟  
堂深北顧之憂一人嘗膽而念寇仇羣公借箸而決成敗閱時滋  
久至計未聞欲陵厲中原而復土疆則敵勢尚強蓋懲車覆之戒  
欲棲遲江左而聽天命則國威日損或有陵夷之憂當亡雖屢興  
嗟盈庭莫執其咎豈中興之業難以速于得志而非常之事未可  
輕以屬人故茲黃閣之開宜慰蒼生之望非恃英傑孰副倚毗恭

惟參政厚德鎮浮大猷經遠想累朝之故老綽有典刑閱當代之  
名流蔚爲領袖雍容禁從密勿中□果膺黼展之知擢贊鈞衡之  
任方當協成長策宏濟多難力王室而復神州少快茂弘之志修  
政事而攘夷狄載賡山甫之章某比以病衰託于輝潤南臺冠豸  
早欣草木臭味之同西省賜環尤見松柏歲寒之操辱知固久歸  
老有期逃聞除命之頒切倍常情之喜上同

賀秦禮侍啟

伏審光奉溫綸益隆異數蓋絲稱職爰昭因任之宜卽所居官誕  
拜爲真之寵自聞除目靡不甘心恭惟某官道德淵源智略輻輳  
視儒者以百數經誼獨高課甲科其幾人策名第一上從眾譽俾  
貳春官凡所建明率遵周典之舊不爲疏闊盡存漢制之詳本乎  
六藝之文以定一王之法學師于古文便于今顧可見之事功其  
有識矣遂使正其祿秩何以假爲翳此殊恩無煩滿歲維太師嘗  
掌是禮而侍郎今貳其官父子一朝規摹百世上扶真主知皇帝

之彌尊下逮斯民歎官儀之復見某自惟鄙陋猥辱知憐雖翻倒  
喜心有不假寐而形容盛德曾弗能文更俟登庸以慰斯望播芳大全

三十  
帥到任謝兩府啓

竊廩真祠方遂投間之願分符巨屏遽叨起廢之恩頒詔旨以趣  
行撫孤懷而增惕伏念某知非絕俗才不適時蚤誤簡於淵衷遂  
叨陪于機務信道粗篤徒欲慕於古人謀身甚疏初不虞于羣小  
爭前者既逞傾擠之計附下者遂騰文致之言仰賴聖明既垂博  
照俯稽公議不入厚誣獲收無用之身退處不爭之地少休病質  
永謝榮途豈謂清朝簡託之深亟畀行殿保釐之寄懇辭不獲  
勉起行乃容趨便殿以對揚疑夢遊于帝所致屈台旃而臨辱降  
禮絕之朝規皆近比之所無豈孤蹤之敢望恩恩去國挈挈到官  
縱覽舊游雖喜湖山之清絕究觀遺俗獨驚閭里之凋殘深慨于  
懷罔知所措必欲撫循于彫瘵尚祈寬假于歲時茲蓋伏遇某官

重望鎮時遠猷經世材素優于任大功獨著于扶顛精擇蕃宣曲  
加推挽馬伏櫪而已老寧堪末路之難鳥倦飛而知還彌想故林  
之適尚期終惠遂懷私求銘感之深敷宣罔既播芳大全三十

帥到任謝政府啓

一麾出守徒書歲月之勞十國爲連益忝事權之重暨涉川而問  
俗遂涓日以臨官祇荷寵靈伏深愧慄伏念某江湖寒士章句散  
儒平時敢意于功名所願止期于州縣偶逢盛旦浸冒清塗璧水  
文昌入都華貫繡衣阜蓋出奉優恩矧江左之名城號浙東之都  
會遺風餘烈有夏禹甸踐之傳綠水青山極秦望鏡湖之美刑與  
事簡民因性淳使深便于養親庶少安于竊祿其爲優幸豈易名  
言此蓋伏遇某官學通天功在社稷奮盛德于百世之上舉吾  
君于三代之隆俊又旁招既悉烝于髦士巧拙雜進尚兼用于散  
材遂致孤愚亦膺付畀某敢不察視民隱講求政經惟朝廷法令  
之明既皆周密儻郡國推行之謹自可持循誓殫夙夜之勤少積

涓塵之效同上

謝漕使薦舉啓

涖職儒宮曾愧拔犀之譽升名京秩更叨薦鶡之榮左右吹噓始  
終成就竊以厥初受氏姬姓最自古尊賢周公莫盛惟握髮吐  
哺以招延多士故制禮作樂而輔成太平餘芳襲於後昆盛德傳  
于百世有能繼者是以似之恭惟運使太博道贊人文才堪王佐  
其來有自襲魯國之名宗有開必先鍾濂溪之餘慶蓋推賢舉善  
者固宜有後而激濁揚清者乃其所長皮裏陽秋皓皓乎不可尚  
已胸中雲夢休休焉其如有容每嘉善而矜不能故舉直而錯諸  
枉夫何踽涼之質誤蒙倜儻之知伏念某器小才疏地寒官冷未  
剗心于大體徒刻意于高風素無落落之奇寧有飄飄之氣爲貧  
于祿既壯登科刀筆何工方以三尺法而從事簡編旋棄豈知一  
卷書而立師偶登元禮之龍門遽瀆行成之金鑑自外臺而剗牘  
卽泮水以備員溫故知新豈謂教而不倦離經辨志庶幾學者有

成董帷漫欲潛心邊笥豈能滿腹知名教有樂地望絕覬覦視富  
貴如浮雲志慚饕餮顧盤根錯節之無用豈聳壑昂霄之可期誤  
遭許子之品題重辱山公之啟事雌黃冠眾聲價增前蕞爾何堪  
凜然失措某敢不益修身檢恪守官箴顧來事之可爲庶古人之  
必慕繼自今日效黃雀以報恩誓將終身附青雲而致顯播芳大

謝監司薦舉啓

無功而祿方愧平生之言宜黜而褒孰欺左右之聽伏念某器非  
世用學與道疏翰墨爲娛經病衰而已廢山林作計說夢寐以空  
存惟五斗之倦遊益十年之陳迹長裾不遂短製還新撫弔影以  
自憐捫苦心而太息尚繫造物以付我公半面立談爲降諸侯之  
重高堂坐嘯許陪下客之餘語有眷而姑容慮雖愚而或取傾蓋  
之交難值泣途之感易深常恐賤微永乖報德之所敢持固陋更  
累知人之明載念微生自孤昭代賢貴力推則意親而事遠英遊

並驚則人達而已窮雖平進誰所不能而數奇自亦中廢梟盧不就笑五白之偶然虎豹有神分九官之邈爾自非宏偉不主故常豈由煨塵之中猶分光潤之末相馬者失之瘦彼俗何知取人而拔其尤匪材曷稱此蓋伏遇某官體國重寄為時遠圖道尊前輩而善誘于後來政擅久成而兼收于未至盛矣孔融之坐巋然韓愈之門介以妄庸是為塵點某敢不益虔所事母替厥初噉噉寸誠徒記賞音之賜區區末路豈專媒進之思

播芳大全三十五

謝第三名及第啟

自惟陋質偶中魏科顧此遭逢出于幸會竊以六藝之學自昔以傳道三代之上無意于為文道既失而章句始興文寢隆而禮義愈晦上則設為科目以取天下之士士則競持枝葉以應縣官之須隨時抑揚與世馳逐苟以□取□□不知其非爭為巧說便詞用以自售明經者但懷青紫之意稽古者迺貪車服之榮以彼其人初若可用既施于事頗或不然蓋夫實不出而唯名之求利既

勝而于道為病今天子勵精求治崇化尚賢務惟政要之謀閱茲氣俗之陋俾造大朝承聖問勿事虛文方下明詔發德音詎應故事所宜各露肝膽著在簡編科別其條盡言毋諱上副諮詢之意敢懷利祿之圖而某性本蠢愚身更貧困竊習易象之奧粗識聖經之微謂開物成務盡備于此書而極深研幾斯可以御世蓋嘗探蹟索隱俯察仰觀內揆一身外稽萬事迺知文武之道未墜而猶存不歸堯舜之君持是而安往幸因策試獲事聖明自信于衷敢肆其說內既深慙于猥并眾猶或病其闊疏竊憂稚圭之文有不應于甲令又懼公孫之第且見貶于太常豈期偶當上心遽蒙親擢處之數百輩之上獨在二三人之中重以不才夫何所取得之非意可謂至榮此蓋伏遇某官親秉國鈞上毗王政居然化育遂茲品物之宜凡所稱量妙盡權衡之信故令么麼顯與甄收某謹當自省初心無忘故學年幾四十雖未登無大過之年德罔二三亦庶幾不遠復之吉或晚成于器業庶仰答于私恩

播芳大全三十七

謝及第啟

猥以瑣材濫登黃甲自惟何者曷克居茲竊以道德之科固有次第文藝之事至爲淺微雖在古則聖人之所弗先于今則儒者以此自見國家稽倣前制課試諸生苟無能稱類皆罷黜凡其尤異頗不棄捐惟去取盡出于至公而上下莫容于私意故失之者不敢有怨而得之者無所歸恩此本朝立法之良于進士得人爲盛如某者素不事學何所取材經固弗明道未有見至于自苦志力而莫致稽古之效粗修章句而無一應敵之能所以十年之間屢鼓不勝幸其氣之尚盛不至三竭而再衰顧于文則已卑僅出二中而四下況復年齡已壯時命未遭閱歲月之如流恐功名之不立抱其窮拙將老邱園迺有夤緣獲見天日方主上內懼有闕退託不能親屈帝尊下詢治道眾所條對皆可施行而某以朴野固陋之人奉盛大高明之問怵惕危厲不知所言敞罔遷延幾至失次本已無心于上第何意尚列于丙科視彼在前邈焉弗及使他

人處此或悔其大謬不然而以某居之則固亦甚喜過望此蓋伏遇某官主持王化樂育人材行以至誠非但崇于空語稽諸故事固不止于具文方將獵天下之英擲國中之秀皆歸錄用惟所指呼致此凡庸亦蒙甄取唯兼收並蓄願推君子之廣心而報德酬言敢負小人之素志

播芳大全三十七

謝及第啟

受蔭人

猥以不才獲與諸生之列自惟何幸輒叨六藝之科匪實其能于茲有媿竊以進士之選爲法最詳得人之多莫此爲盛初以待未命之士而不及已仕之人顧于收材或有未盡又爲之制以廣其求雖旣與于官聯苟未登于名第許從韋布之列同奏翰墨之功所以執經相高習業愈眾如某幸蒙世賞不廢父書粗知師友之淵源未究天人之分際唯恐典刑之失弗克繼于老成故于禮樂之間每務圖于先進然而嘗持所學見黜有司姑忍一慙敢懷二事至于屢辱不以爲尤況夫平世之尚文時乃異人之間出風聲

所暨造化一新其有所長孰不願試則以安能碌碌于俗吏至于  
沒沒以終身竊伏惟思用自砥礪寧知將老僅克有成茲蓋伏遇  
某官道大經邦德隆輔世薰陶品類盎然元氣之中教育人材浸  
如時雨之化致此庸陋能與選收昔德裕不喜決科茲實太高之  
論而王吉欲除任子病夫不學之流某志在適中善惟從眾不敢  
為唐賢之異而或免漢人之非將益行其所知庶以報于有德上  
撫幹與交代啟

仰高浸久竊懷慕用之私從宦于今將踵仁賢之後以茲幸會實  
慰生平伏惟交代撫幹學士質性高明問學通博持其能事顧無  
往而不宜凡所居官必有政之可紀尚淹幕府而仕諸侯頗聞當  
路之見知固已上章而交薦會膺除召亟即顯揚某自視非才何  
堪任職往思夙夜勉遵可守之規曷有歲年能盡無窮之好敢陳  
書牘少布腹心若其精微未易敘述播芳大全四十五  
上秦少保啟

頃罹憂患幾隔死生不自意全得以至此雖自念疾困凶衰之迹  
未宜踵高明盛大之門仰託知憐敢忘冥昧伏念往歲比試羣儒  
方時于經最高唯公奏策第一京師尊貴材鮮可踰天下想聞人  
爭先覩而乃獨韜藏能事謙禮諸生不間賤微悉敦契好而某也  
竊科甚下進謁云初獨于眾人之間而以國士見遇傾意氣以相  
許非流俗之敢期方幸從游更蒙鈞禮士固伸于知己誠豈能忘  
生而得此于人蓋實所寡每思磨厲用副推稱夫何某殃罰及身  
喪亡無日生理不治氣息僅存迺者某官榮升諸公下澤四海顧  
嘗有嚮者慕用之意而適當在纍然憂服之中書疏不修禮文俱  
廢獨竊聽輿人之誦而益欽長者之風未省餘年猶有見日恭惟  
某官道德純懿學術通明既迪簡而在庭用承弼于厥辟正直是  
好有勤勞王家之勳寬裕以容懷長育人材之意顧如衰陋何所  
短長姑襲衣冠以持門戶固知夫時命有所不敢以賤貧為羞然  
而踵父之業未能事生之道或缺負米有志乞食何顏持是安歸

非公無可惟大臣務爲國得士而君子樂以祿及親論其爲士則  
或有可慚至于養親則尤其所急于斯二者儻垂著芘冒之仁則  
有一焉願力竭始終之報播芳大全四十八

回張閣學啟

祇奉宸恩猥叨郡寄方密依于大庇側聞長者之風將冒布于尺  
書已辱一介之使寵貽牋翰下逮鄙人竊窺筆墨之光華仰服德  
意之謙厚內顧不敏罪焉所逃恭惟某官材任大臣望隆法從文  
章爾雅蓋盡見于典刑論議有餘宜與聞于政事尚淹在外未使  
居中方今神明之不遺必圖柱幹之固守會聞詔下亟以公歸某  
自分迂愚何心游宦顧甚矣衰殘之久聊復此來而鄉者慕用之  
誠于今增劇敢意曲全于契好迺蒙備賜于拊存匪惟小子之增  
榮益使孤蹤之有恃炎暑正爾燕處裕如諒繁祉之方來相直道  
之所履願體眷意加輔寐興瞻頌之深敷宣罔既播芳大全四十八

回蕭提控啟

鄉忖謙勤驅後車而來過方欣晤語悵行李之言歸政欲裁書少  
陳謝意遽貽翰墨具見情辭伏惟提控學士師友淵源文章爾雅  
有聞于世偶時命之未遭以彼其才尚陸沈而在下稽諸論者孰  
謂其然顧豈無人爲言于上會見詔書之來聘亟聞除目之新頒  
某僅接從容又將乖隔重荷褒揚之過實豈其愚陋之敢蒙旣感  
德以彌深唯嚮風而增邈播芳大全四十九

賀丞相正啟

伏以堯曆開端夏正啟旦肇天陽之來復慶人道以更新伏惟某  
官海岳統靈華夷重望勳業久書于竹帛謀謨動應於典刑從容  
黃閣之經綸密勿清衷之簡注羽儀元化久施兼善之功領袖上  
台式副具瞻之美方三朝之順履宜百福之駢臻某叨領藩符阻  
前槐舍永言祈頌曷罄敷陳播芳大全四十九

賀魏尉啟

山城攝事滿懷三斗之塵函使將勤有寵雙魚之貺於德固謙矣



斯心其謂何恭惟某官韻宇儲崧彌文倒峽刃游餘地翩翩信公  
子之佳吏隱仙官鬱鬱豈此居之久伫膺奏最式大前修某伎止  
於斯老之將至云胡不喜得平生口識之人惠然肯來賴王事同  
寅之助所藏胸次未竟毫端播芳大全二十四

沐上小雨復霽

隄沙不起潤如酥坐看飛雲自卷舒隴陌人間牛舐犢柳陂波淺  
鷺窺魚殘花糝徑東風後碧草黏天暮雨初分付榮枯蝸兩角濁

醪青杏送春餘

前賢小集拾遺

建炎丞相成國呂忠穆公退老堂詩

大老歸周慶有源中興吾宋屬雲孫五龍夾日三辰正一虎當溪  
百獸奔何事雲山遽招隱向來金鼎厭調元追鋒早晚求黃髮三  
徑還荒靖節園

聞道抽身向急流海邊暫艤濟川舟功存社稷推元老人向漁樵  
識故侯綠野江山供笑傲赤松儔侶伴淹畱間棋小酌懷疇昔清

夢時追杖履遊

天台續集別編

昆陵集補遺

附錄

宋史列傳

張守字子固常州晉陵人家貧無書從人假借過目輒不忘登崇  
寧元年進士第中詞學兼茂科除詳定九域圖志編修官以省員  
罷改宣德郎擢爲監察御史丁內艱去建炎元年冬召還改官賜  
五品服上在維揚黏罕將自東平歷泗淮以窺行在宰臣汪伯彥  
黃潛善以爲李成餘黨不足畏上召百官各言所見葉夢得請上  
南巡阻江爲守張俊亦奏敵勢方張宜且南渡守獨抗疏上防淮  
渡江利害六事又別疏言金人犯淮甸之路有四宜擇四路帥守  
繕兵儲粟以捍禦之疏再上又請詔大臣惟以選將治兵爲急凡  
不急之務付之都司六曹二相滋不說遂建議遣守撫諭京城守  
聞命卽就道三年正月還奏金人必來願早爲之圖上惻然除起  
居郎兼直學士院金人果渡淮上幸臨安遷御史中丞苗劉旣平  
詔赦百官表奏皆守與李邴分爲之守論宰相朱勝非不能思患

預防致賊猖獗乞罷政疏畱中不出既而勝非竟罷政呂頤浩初相舉行司馬光之言欲併合三省詔從臺諫集議守言光之所奏較然可行若更集眾徒爲紛紜既而悉無異論竟合三省爲一上幸建康呂頤浩張浚叶議將奉上幸武昌爲趨陝之計時方拜浚爲宣撫處置使身任陝蜀守與諫議大夫滕康皆持不可曰東南今日根本也陛下遠適則奸雄生窺伺之心況將士多陝西人以蜀近關陝可圖西歸自爲計耳非爲陛下與國家計也守又陳十害至殿廬謂康曰幸蜀之事吾曹當以死爭之上曰朕固以爲難行議遂寢六月久雨恆陰呂頤浩張浚皆謝罪求去詔郎官以上言闕政初守爲副端時嘗上疏曰陛下處宮室之安則思二帝母后穹廬毳幕之居享膳羞之奉則思二帝母后羶肉酪漿之味服細暖之衣則思二帝母后窮邊絕塞之寒苦操與奪之柄則思二帝母后語言動作受制於人享嬪御之適則思二帝母后誰爲之使令對臣下之朝則思二帝母后誰爲之尊禮思之又思兢兢栗栗

栗聖心不倦而天不爲之助順者萬無是理也至是復申前說曰今罪己之詔數下而天未悔禍實有所未至耳且曰天時人事至此極矣陛下觀本日之勢與去年孰愈而朝廷之措置施設與前日未始異也俟其如維揚之變而後言之則雖斥逐大臣無救於禍漢制災異策免三公今任宰相者雖有勳勞然其器識不足以幹旋機務願更擇文武全材海內所共推者親擢而並用之上書論事或有切直宜加褒擢以來言路先是守嘗論呂頤浩不可獨任張浚不可西去與上意異乞補外除禮部侍郎不拜上命呂頤浩至政事堂諭以正人端士不宜輕去守始受命殿中侍御史趙鼎入對論守無故下遷上曰以其資淺鼎曰言事官無他過願陛下毋沮其氣於是遷翰林學士知制誥九月拜端明殿學士同簽樞密院事扈從由海道至永嘉回至會稽四年五月除參知政事守嘗薦汪伯彥沈與求劾其短以資政殿學士提舉洞霄宮未幾知紹興府尋以內祠兼侍讀守力辭改知福州時右司員外郎張

宗臣請令福建築城守奏福州城於晉太康三年僞閩增廣至六千七百餘步國初削平已久公私困弊請俟他年遂止尋以變易度牒錢百萬餘緡輸之行在助國用時劉豫導金人寇淮上次平江諸將獻俘者相踵守聞之上疏曰今以獻俘誠皆金人或借諸國則戮之可也至如兩河山東之民皆陛下赤子驅迫以來豈得已哉且諭以恩信貸之使歸願畱者亦聽則賊兵可不戰而潰金人既遁詔諸將渡江追擊守復上疏以敵情難測願畱劉光世控禦諸渡上既還臨安又詔問守以攻戰之利守備之宜綏懷之略措置之方守言明詔四事臣以爲莫急於措置措置苟當則餘不足爲陛下道矣臣請言措置之大略其一措置軍旅其二措置糧食神武中軍當專衛行在而以餘軍分戍三路一軍駐于淮東一軍駐于淮西一軍駐鄂岳或荆南擇要害之處以處之使北至關輔西抵川陝血脈相通號令相聞有脅齒輔車之勢則自江而南可奠枕而臥也然今之大將皆握重兵貴極富溢前無祿利之望

退無誅罰之憂故朝廷之勢日削兵將之權日重而又爲大將者萬一有稱病而賜罷或卒然不諱則所統之眾將安屬邪臣謂宜拔擢麾下之將使爲統制每將不過五千人綦布四路朝廷號令徑達其軍分合使令悉由朝廷可以有爲也何謂措置軍食諸軍既分屯諸路則所患者財穀轉輸也祖宗以來每歲上供六百餘萬出於東南轉輸未嘗以爲病也今宜舉兩浙之粟以餉淮東江西之粟以餉淮西荆湖之粟以餉鄂岳荆南量所用之數責漕臣將輸而歸其餘於行在錢帛亦然恐未至於不足也錢糧無乏絕之患然後戒飭諸將不得侵擾州縣以復業之民戶口多寡爲諸州殿最歲覈實而黜陟之如是措置既定俟至防秋復遣大臣爲之統督使諸路之兵首尾相應綏懷之略亦在是矣究其本原則在陛下內修德而外修政耳聞自范汝爲之擾公私赤立守在鎮四年撫綏彫瘵且請于朝蠲除福州所貸常平緡錢十五萬累請去郡以提舉萬壽觀兼侍讀召還甫兩月復引病去知平江府

力勾祠以歸六年十二月召見即日除參知政事明日兼權樞密院事七月張浚罷劉光世兵柄而欲以呂祉往淮西撫諭諸軍守以爲不可浚不從守曰必曰改圖亦須得聞望素高能服諸將之心者乃可浚不聽遂有酈瓊之變及臺諫交章論浚御批安置嶺表趙鼎不卽行守力解上曰浚爲陛下捍兩淮罷劉光世正以其眾烏合不爲用今其驗矣羣臣而媒孽其短臣恐後之繼者必以浚爲鑒誰肯爲陛下任事乎浚謫永州守亦引咎請去弗許八年正月上自建康將還臨安守言建康自六朝爲帝王都江流險闊氣象雄偉且據都會以經理中原依險阻以捍禦疆敵可爲別都以圖恢復鼎持不可守力求去以資政殿大學士知婺州尋改洪州兼江南西路安撫使人對時江西盜賊未息上問以弭盜之策守曰莫先德政伺其不悛然後加之以兵因請出師屯要害旣至部揭榜郡邑開諭禍福約以期限許之自新不數月盜平後徙知紹興府會朝廷遣三使者括諸路財賦所至以鞭撻立威韓球在

會稽所歛五十餘萬緡守旣視事卽求入覲爲上言之詔追還三使時秦檜當國不說守亦不自安復奉祠建康謀帥上曰建康重地用大臣有德望者惟張守可至鎮數月薨守嘗薦秦檜於時宰張浚及檜爲樞密使同朝一日守在省閣執浚手曰守前者誤公矣今同班列與之朝夕相處觀其趨向有患失之心公宜力陳於上守在江右以郡縣供億科擾上疏請蠲和買罷和糴上欲行之時秦檜方損度支爲月進且日憂四方財用之不至見守疏怒曰張帥何損國如是守聞之歎曰彼謂損國乃益國也卒諡文靖孫抑戶部侍郎

故資政殿大學士左正議大夫張公諡議

朝散大夫行太常博士婁機撰議文

議曰嘗謂真儒之用至無敵于天下自古撥亂反正將大有爲也未始不知兵夾谷之會夫子動容變色遂使魯轉弱爲強儒效何如哉國家靖康之後四郊多壘國步未安高宗皇帝撫艱難之運

念將圖回經理擇所用人爰有雄雋寶臣以道德緝熙于初載力挽中流共濟之舟風雲一時自然相感天同神化夫豈偶然故資政殿大學士左正議大夫張公經世正君之學淵源周孔自少策勳翰墨之場軫軫三光手織五雲踐揚冰清亦既極文章禮樂之選上方愒日太平責成輔佐公雍容暇豫以應天下之變事物之幾藏于眇繇眾人甘寢于細娛而公獨出千慮之表前知如著與蔡曰治軍旅選將帥嚴守禦搜人才專意政事之大者凡細微不急之務悉付都司六曹俾廟堂惟防秋是圖曰處宮室享膳羞服輕煖對嬪御以及視朝臨人之際必思二聖母后謂淮西兵政不可改謂荆蜀駐蹕爲非宜撫諭京城而料敵必入寇初破淮南以命帥非其人所以盡忠竭節于干戈俶擾之際惻怛懇到用能輔成龍德遂躋登茲非有道德人所爲能若是乎博士婁機得其議則閱讀銘志證以所聞攷按諡法且以文諡吏輯官于寺者以議白其長合辭爲然不可易也然公以忠信誠實親結主知寬洪之

量不見涯涘當言者論斥時相上以章付公倚公相矣公竭力爭辯上稱歎其賢且以近世不相傾奪者爲無幾蓋公惟務靖國協和羣辟并包翕受尺寸不棄雖時相意所不快者公悉調護潛爲銷弭上每有不盡用之歎閱十五年王淮時在諫垣上指似宰輔以形貌肖公嗟賞莫及後亦以語阜陵淮卒正鼎席夫能使人主追記遐想于既歿之後眷眷不忘顧何脩而臻此耶搢紳相傳爲美談公未老卽退就閒逸視中興之佐前後幾公功名盛矣鮮克全備獨公優游里居身名俱泰生而望尊歿而禮崇平生無一毫之玷可謂善終如始者矣按諡法道德博聞曰文寬樂令終曰靖今加靖以儷文尤爲當眾從機爲議機曰文且靖議之盡也其敢有異遂諡文靖謹議

朝散郎祕書丞兼權尚書郎官兼權考功郎官鍾必萬覆議議曰嘉泰元年九月丙子太常上故參政張公易名于部曰文靖于是命考功鍾必萬覆議必萬謹按諡法道德博聞曰文寬樂令

終曰靖備是二美自昔實難竊觀國朝故老若李公沆之直道事君燮調百度呂公夷簡之沈靜有謀鎮安社稷諡之文靖孰曰不宜維公學問淵源文足垂後孜孜論建合古便今可不謂之道德博聞乎安于命義正色立朝推廣上心始終一節可不謂之寬樂令終乎跡其乞增臺諫以廣耳目所以明君道之公論時宰宜專意大政遠謀所以明政體之要念二聖之未復請于居處飲食之際莫不致思所以明天下之大義應天當以實則謂不可徒恃罪己之詔言路所當廣則謂宜加褒擢切至之書方時相之見斥于言者也蓋倚公相矣力爭以爲國步未安一月而再論相何以繫天下之望其識量宏遠徇公忘私類如此至于夙夜寅恭協和羣辟惟靖國是務善類之進當路有不快意者公悉力調護之歸休里門身名俱泰歷數公之言行而揆之以李呂二公行事之迹豈非異世而同符者乎大抵易名之典貴得其實告于當時而莫不服垂諸後世而不敢議以公平生大節炳炳若此攷之碑志質之

僉論太常議是謹議

右毘陵集十五卷宋張守撰守字全真一字子固常州晉陵人崇寧元年進士歷官參知政事兼權樞密院事以資政殿大學士知建康府卒諡文靖事蹟具宋史本傳傳言守家貧無書從人假借過目不忘其所著撰書錄解題云毘陵集五十卷平園續藁云文集五十卷奏議二十五卷均已久佚厲鶚輯宋詩紀事僅於前賢小集拾遺中收其詩一首而已乾隆中館臣從永樂大典輯出遺文錄爲十六卷止存十分之二然本傳所載諸疏具在其中亦爲僅見之本惟葉適寶謨閣待制知建康府兼沿江制置使制據建康志開禧二年六月二十二日朝請大夫寶謨閣待制江東安撫使葉適知府事七月十一日兼沿江制置使在子固後約廿餘年又辭昂除尚書左丞制昂以大觀三年政和三年兩拜左丞子固建炎遷知制誥時代不值兩文不知何人所作皆當削去今別搜得五百家播芳大全有文三十篇宰輔編年錄有文一篇天台續集有詩兩首編成一卷附刻於後光緒乙未三月武進盛宣懷跋





